

KEIBIGIBOGWA



(Matouna i mebogwa o misini Gusaweta i ginipela mapilasina. Lei nigada tomota bi livalasi wala kaina kukwanebu, kaina libogwa, kaina tomwaya si biga, kaina liliu, kaina avaka, magila wala bi le-ga biga, bi sawa biga Boyowa. Lageila i katoki matosina i pilasisi, i ginipela si biga i seiki.)

MAKEIBIGASINA

Kawal'okuva	pila-3
Keibigala Mwalova	6
Kwaroto	8
Keibigala Tokilupalupa	9
Dugawina (Tovileu)	10
Tudava (Tovileu)	12
Keibigasi Topileta	21
Keibigala Kaduguwai	24
Keibigasi Gumagabu	25
Kwenadaya	26
Kaitaki	30
Nunuli	33
Douli	38
Katuyausa (Tovileu)	43
Biyalelo (Tovileu)	47
Kalauwata (Tovileu)	50
Kailavasia (Tovileu)	58
Tobutatala	61
Dokinikani	62
Vinaya	63
Topulupwalala	66
Tokabibogwa	72
Kukupwa	75
Tokunabeibai (Tovileu)	76
Tomadawa	80

Puluma	(Tovileu)	pila-81
Waila	(Tovileu)	87
Bubuna	(Tovileu)	92
Biniyala	(Bometu)	97
Molau-Uyuwa	(Tovileu)	99
Navavila	(Tovileu)	103
O-Lubeku	(Tovileu)	106
Ilu-Myuwa		111
Togatu	(Tovileu)	114
Momovala		121
Gumasilalaya		123
Uyuwa	(Mwakasala)	125
Kalasia		127
Kailavasia		130
Towasi		132
Magilodu		135
Kuvivia		136
Gilibwala		139
Kiu	(Tovileu)	142
Pwatamelumelu	(Tovileu)	151
Tosuvaseva		157
Keibigala Usi-Tuma	(Tovileu)	159
Kaliva		165
<i>Tudawa</i>	<i>Tolosi</i>	168
<i>Sunapula Labai</i>	<i>Tolosi</i>	172
<i>Mohilanyuwa 3</i>	<i>Michael Gijomatala</i>	174
<i>Tojiluwakuma</i>	<i>Michael Gijomatala</i>	182
<i>Ilakei - kawan</i>	<i>Joseph Moyoyawa</i>	186
<i>Topupiwana</i>	<i>Andrew Kalubaku</i>	191
<i>Kaimagu</i>	<i>Daniel Monsiwa</i>	194
<i>Migiyaweda</i>	<i>Daniel Monsiwa</i>	196
<i>Ilapokai</i>	<i>Patrick Toligowa</i>	198

KAWAL'OKUVA

Kwaitala la valu i sisu Guma-Kawal'okuva (kawala-wokuva), kwaitala valu selaya i sisusa. I bagulasi. I sikola la bagula matouna. Lei ma sola i vataisi peila si baleku. I vataisi i basisa kabilia, i lai kayala Kawal'okuva. I weiya sola.

Touna-kayala i kabi kulu-tutu. I seiwa vaiguwa, i seiki mwali, i seiki soulava, "Beisa kam kulu-tutu beisa tomata." Gala. I peiki sola. Magila bi weiya kidamwa. I gisemwa Guma-Kawal'okuva i biu luleta. I lau kulu-tutu, bogwa i katumadi. I siwa sola.

Guma-Kawal'okuva taiyu la kwava i bagulasi. I bigubagulasi sena kalasia. I luki la kwava, "Nabwaya bita veiwas. Ku losa ku vaulasi da ulisa. Yaegu ba veiwas. I veiwas matouna i takudu la valu. I takudu bogwa i lalavi i mineina nanola. I suvi we la bwala la kwava i nenei bua. I bani beisa. I kau uraitala bua, i meya i kaui kala bua la kwava i seuma. I kaui i wokuva i sisu wa bwaima.

I kalobusisi la kwava igau i lalavi. I ma-keisa si pweya bogwa i katugeya. I keibiga la kwava, "Avaka peila ku tasau ma pweyasi?" "A nenei bua, a bani beisa som, a meya a kaui." I keibiga la kwava, "Avaka peila ku bani ula seuma. Sitana ba dubweni nanogu." I vatai la kwava i luki, "Mabwailim bua kala kaui. Ku loki Kawal'okuva. I mkusa matam. Mabwailim kala kaui bua." I mwasila la mwala. I siwa wa bwaima. I sisu bogwa i kwayavi. I pwesi kala kauya, i kau la kayala, i vitubwalola, i lolo i kalobusi o valu. I weiki luleta, kadala, luboula i sisusa.

I koana luboula i gisi. I tokaya i luki bwadala, "Natana kula i laguva o gu bwala i sisu." I bogi ta losa t a kanamweisa wa keda, bita weiya.

Kadala i lukweisa Kawal'okuva, i keibiga-
 si, "Avaka peila ku ma?" "Peila a kaui bua, kala
 bua numwaya. I tokaya i lukweigu, Ku la ku kwaui
 bua, i mkusa matam, buku mwa." "La ma a kaui bua."
 I mweinasi kadala. ~~I~~ Salima i leku molitomwaya,
~~Salima~~ i leku bwadala. I meyeisa i seilisa, i
 kaui bua. Kala mwaya pwatai bwadala, kwaitala
 pwatai molitomwaya i valugwasi, i meyeisa i kaui.
 Luleta i sulu kala, i menu i yaya i seili i kam.
 I tututu kala mona. I tututu bogwa i masisi luleta.
 I yoseli la uguna, i vina luleta, "Mamata Bevo Ma-
 mata Bevo Mitabelobelo ~~Midi~~ ^{igul}idi Mamama O Youya Kwam."
 I vavagi luleta, "Mm!" "Ku mamata kwau. Kwaitala
 buala Kawal'okuva. Lubom i la i utu kam kweyala
 wa bwaima toya bwadala."

Tili I mamata luleta i kaui kala bua. I koma i
 babi kala pwaka i seili. I kapu kala mwaya. Kala
 gumguma i kasau. I masisi. I vadobula luleta kum-
 kumla i valam. I valam bogwa i uguna luleta. I
 valam, i vina, "Mamata Bevo Mamata Mitabelobelo
~~Midi~~ ^{the Tili}idi Mamama O Youya Kwam. Ku mamata ku kaui kam
 bua, ku masisiga."

I mamata luleta i gisi kala bua i kau.
 I babi kala pwaka i seili. I bisikapu kala mwaya.
 I gigali i kasau. I masisi. I valam luleta bogwa
 i lubulatola. Kadala i mweinasi kala bua. I va-
 pwataisi ~~Salima~~ taitala, ~~Salima~~ taiyuweila,
~~Salu~~watata. I woulisa pwatai, i vaputaisi kala
 bua kadala I masisisi.

I mamata luleta i katubayasa. I luki
 latula, "Ku mamatasi bita lausa kadami i siwa.
 Bita meisa." I katubayasasi i wokuva, i gebila inasi
 i keula kala bua kadala. I l~~asi~~asi. I tokayasi lu-
 boula i losa wa keda, i siweisa. I tulatulasi bi

Kam Kweyala
 = Kayala

kolasi
 Your murder

wa lubesi. I lolasi latula. I lolasi wa keda, i sekeilasi tamasi. I tokayasi luboula toya bwadala i weiyasi Kawal'okuva. I waweyasi i katumatisa. I keibigasi kadala, i lukweisa tamasi, "Bi losa bwadamwa, yokwaga tamama ku sili, igau ta vatisa kabala lubom." I losa bwadala, i vat-tisa kabala luboula i wokuva, i lupisa i kanamwa wa kebila. I lukweisa tauau, "Buku lau la pweya inama. Kasi bua ku leku, ma samakuku ku leku, ku meya beisa. Tabudasi maka laugwa. Luboma ka baku kailalavi wa tabodasi. I lukweisa inasi, "Ku valamsi toya ivamta. Baka laga baka kiwada tamama."

I lolasi. Si kayala, si kema o tapwala keda i seilisa. I tulasi tamasi. I tulatulasi bogwa i lalavi, i lagisa tamasi lei ma. Kala kapukwapula bogwa i tomati la koni. I meiki litula. I tokaya molitomwaya i seiki o kukula. I tokaya bwadala i seiki o lopola. I kovalisa i mweisa i katumatisa. I taginasi kasi sauwilo, i losa o si valu. I kalobusisi i siweisa i sagalisa. I kausa ilaovau kala sagali i seweisa. I ligabusa kaula i wokuva, i karaiwaga sola bwadala, i keibiga tuwala, "Ilaovau yoku um kwava, ilabogwa yaegu ula kwava. Inada bi vakapula kadasi bita kamsi. Bogwa Nabwaya bita la ta karaiwaga da bagula." I losa o bayagu, "Ilaovau la bagula, mi bagula ku seiweya. Yaegu ilabogwa ula bagula ba semwa. Bogwa i wokuva da karaiwaga.

KEIBIGALA MWALOVA

Yaegu Mwalova tolegu Teiyava, ula valu a yamata, tomwayala ma yaegu. Sena a tomwayaga, latugu Tabagoni bogwa i tomwaya. I poulasi to-luguta a simwa. Pali a wala a lumwelova, a mwaiyuni wala, taga i nanotasi. I valaguvassiii lukweigusi, a weya bulubwalata a bulati kidamwa.

Palavala yaegula tabugu. Luleta Wadamata, i pwasa yamala. I solavi Teiyava i vagi i bwaina. I kau kema i simwa. I teya meku, i likubali i kapu-si. I losa i vilovausa. Palavala Imkwasisiga Videka. Wadamata i la Oyuveyova. I peiki Oyuveyova. I koluluvi i keibiga, "Ba la Teiyava. A peiki O-Yuve-yova. Ba lau ula guguwa a siwa Teiyava." Bogwa i kolululivi i ma. I uni Mwayavata tabugu. Kadala Wadamata i uni latula taitala Mwalova. I uni Vi-upona. Luleta Mwalova i uni Isivata, Bovayausa.

A yausi ula pwaipwaya Teiyava.

Ula tuta tokinibogwa Mtawa valu kweveaka, Kasanai valu kweveaka. Topilaveaka i guyau Kasanai. I kariga Topilaveaka i tubwa Mtabalu. I kariga Mtabalu i guyau Kwaiwaia.

O-Marakana i kariga Pulayasi i guyau Numa-kala. I kariga Numakala i guyau Taulisa-Guyau. I kariga Taulisa-Guyau i guyau Toulawa. I kariga Toulawa i guyau Mitakata.

Tukwaukwa tokinibogwa i guyau Mosilibu. I kariga Mosilibu i guyau Molauma. I kariga Mola-uma i guyau Monagoi. I kariga Monagoi i guyau Kaboka. I kariga Kaboka i guyau Mosilibu.

7

^{Hawa} Tokinibogwa Sineketa i ^{guyau} Moyadudu.
I kariga Moyadudu i ^{guyau} Moniyoyuya, i kariga
Moniyoyuya i ^{guyau} Moniva. I kariga Moniva i gu-
yau Mokaikima. I kariga Mokaikima- sena bidubadu
gweguya Sineketa i karigasi - i ^{guyau} Toudawada.
Toudawada gwadi, Mwalova tobwabogwa. Toudawada
i kariga makiteki wala (1936). Kadala Toudawada
Saulasi, i sisu i ^{guyau}.

Moyadudu i seiki kaula Pulayasi. Kaiboula
i seikim kaula Pulayasi. Pulayasi kalamwaguta i
sisu.

A utu wosi Kasisaveaka. Gala wosi mokita,
a utu wala yaegula, a mwaigini. Bi gigilasi ula
tomota. I weyeisa kwaita valu, lageilaga Teiyava
wala i keiwosisi.

Bogwa i wokuva ula tuta. Ba kariga gala
bi valamsi litugwa, tabugwa, peila sena a tomwaya,
ula tuta bogwa i wokuva. Ula kariga i yobali, bi
bakweigusi wala. Ba la ba gisi veyagwa i lobogwasi,
wa Tuma i sisusa.

18
kema i losa i takaiwost pwasasi la baleku. Matouna-
ga i simwa i sulu towamata. I suluulu bogwa ei
menu i toli. I lalavi i kalobusasi tuwala, i kan
pwanetala Dokinikant i salla wa kulis i lupi i mwa.
I lalavi boge i vanowasi takaiwa tuwala, i kalo-
busasi, i yaya pwasasi kaai beisa kaimela, "Ku
yaketas litumia i kamai, yokwami kami towamata
ku meisa buku kamai." I kenlasi ai kaneku, i meisa
i kamai. I kamkwamasi i seilasi ai kaneku o luwan,
i sekelias makw pwanetasi. I busasi, i keidiga
pwasasi, i kenlasi ku meisa, ku komasi kada
pwanetasi.

Fi beisa i kanlasi i wokuwa. I livala
pwasasi i kanlasi i wokuwa. Bogi i busi-
putu o milaba. Ku nenelasi i lala o pwasiti. I
valutu beisa yagru. I distiputu a mamata, a mweiki
i kutakota. A lupi a sammu wa busasi. Ie nula la
kabutu ula baleku putu takaiwasi. Iyatu buku
giseisa. Bogwa lei wokuwa. Ku yowasasi mi waga,
pita lokyasa ludeasi ta giseisa. I yowasasi,
i keipaisasi i kolasi ai laya boge i wokuwa.

Fi wani i keidobigasi kaai tallima wala.
I keidobigasi i wokuwa, i kawasasi. I keipasi kaai
tallima. Kadasi o kabodora i eisa. I gisi i do-
lapula kadala. I katupoi inala, "luma kaai tai-
vira?" "Tallima!" "O kaillima makasina i dola-
pulasai." I tobus kadasi i la i kakaya. Kakaya
i wokuwa i ma i salla o kabodora. I sinata kulula.
I sakuiliasa kadala. I sakuiliasa bogwa i meisa
o kwadewa, i wolasi o kawalawa.

I sivila kadasi. I mi tapwala. I sakuilias
kadala, matale i la o la ogila. I ulawolasi kadala

KWAROTA

La valu Kaigau. I vagi kala wosi. I kikei-wosisi toya bwadala Kolitolela, Kolitapipina. I vatowa Kwarota kala wosi, i keibiga, "Ba vina, Kwarota Kwalitolela Yeyuna Ne Bogi Taigoigola Kiki Kikiki Kiki Degula Degula Degula Kwaroto Kwalitolela Yeyuna Ne Bogi Taigoigola." Komwaidona valu i giseisa wosi beisa kwaroto.

I kalobusisi Mi-Bwoitalu, i keibigasi, "I lalavi bita weiyasi mauna wala komwaidona." I kalobusisi Mi-Bwoitalu o kulumatana^{ki} pipila. I kausa si lewa Mi-Bwoitalu. I gelasi i keiwosisi pipila,

"Sogwe sogwe
Bwadagwe bwadagwe
Kalavana
Kakalogwe
Pipipila kala vana
Kwalitolela
Kwalitomyego
Yeyuna ne bo taigoigo
Kiki kikiki kiki."

I tokayasi ~~Mi-Bwoitalu~~ weiyasi kwaroto. Matosina i lovasi, kwaroto i losa o raibwaga. I kapusisi kwaroto, i yousi kulula Mi-Bwoitalu, i lausa o raibwaga. I kilovasi mauna, i kapusisi Mi-Bwoitalu, i losa i katumatisa. I karigasi Mi-Bwoitalu kwaroto toya bwadala bwaina i sisusa. I karigasi Mi-Bwoitalu i biyasi, i lausa o bwarita, i laisi. I simweisa kwaroto.

TOKILUPALUPA

9

Tokilupalupa gala tomota, baloma wala, makawala Topileta. Kulula kweveaka, kabulula i busi i la o kaikela, taigala sena pilaveaka i busi i la o kuvalila.

Topileta i luki Tokilupalupa, "Ku la Bomatu ku sisu, ku yamata si keda kariga, si keda yaluwa, si keda lou, si keda bwagau, si keda gudimata. Gala o ku yogagi, ku yobwaili, bi meisa o vilotoula.

Tokilupalupa o Bomatu i sisu o valu o tanawa makawala Topileta. I yamata tomota i karigasi, i vitulaki keda. I sulasi gala gaga-bila bi bani si keda. Tokilupalupa vivila tokubukwabuya. La bwala dakuna Kapwani i toto. Kwadewa yagala Bomatu.

Kadatala keda kedala lou - kaina wa kai, wa luya ta mweina ta kapusi. Kedala o rokaiwa i towa kwaitala dakuna peila bwagau. I toma kwaiyuweila dakuna peila kariga, beisa gudimata.

I towa matosina, i towa bobwagau. I tavilaki peila vailau, peila kala bulukwa, kala, i tavilaki bi wokuva, i yasigila. Bi keibigasi baloma, bi katupoisa, "Ku gisi tau?" "Gala." "Komwaidona i bowa, gala ba vitusi bi bwaina." O luyeki i karigavau, i wa i vasiulisa. I sili o dakuna, i kuvisi wowola, boge leila.

DUGAWINA

Tovila

Mei sikeya Silaketa. I kariga taitala
 Bwadela. I keibiga Dugawina, "Kaina ba la ba bagu-
 la, kaina ba weiki si valam? O ba la ba valam,
 A Sigwalolu Gwalolu." I tokaya i kau moi, i seili
 o kulula. I lolo Bwadela, i kalobusi i keibiga,
 i valam, Tau Ta Bugau Vivina Ta Bugau Tauga Tonena
 Wa Kulula Tolela Kabudaka Tolela Kala Wayola Gala
 Ta Bugau Ki Ki Ki." I kausa kaula, "Kam lumi, kam
 sibula Dugawina." I keibiga Dugawina "Yei Yei Yei!"
 "Kummeyeisa pwatai, ku valugwasi tabumi kala."
 I keibiga Dugawina, "Gala. Bwaina ba ~~sidayena~~ *Silavemi*."
 I sila o sisuna i valugi o kala seuma. I lau o la
 valu. I suvi we la bwala i keibiga, "O Dugawina
 Sona Sosona Tu Tu Tu." I kapusi kaula o lopola bwa-
 la. I katupoi luleta, "Dugawina. Avaka butula?"
 "O si katudewa tomota, yakamaga butuna, kama kanaki,
 kama duwedua, ka legalega o ma bwala." I sulu kaula
 i masisi.

Ei yam i lagi kariga O-Kayaula i keibiga, "O
 kaina ba la ba bagula, O kaina ba lau si valam, O
 kaina ba sigwalolu gwalolu." I kau la moi, i seili
 o kulula i lolo. I kalobusi O-Kayaula i valam, "O
 Gwadi Ta Bugau, Vivina Ta Bugau Tau Ta Bugau Tau
 Tonena O Kula Tonena Kabudaka Tonena Kala Wayola
 Gala Ta Bugau Ki Ki Ki." I kausa kaula, kuvi, kai-
 magu, "Kam lumi Dugawina, Kam sibula Dugamwina."
 I keibiga Dugawina, "Yei Yei Yei!" "Ku kausa vataga
 i valugwa tabum." "O gala, ba ~~sidayena~~ *Silavemi*." I valugwa
 i seiwaya o kala seuma. I seiwaya kaimagu gola kala
 pemkwala, i katubwadi kala seuma.

I kavila kaimagu i gadi. I sagaga Duga-
 wina wa keda. I kaminimani kaimagu. I keibiga
 Dugawina, "Sona Sosona." Gala i dubwali kaula.
 I lolo i sagaga Dugawina. I sagaga i sagaga o
 la bwala i suvi, i keibiga, "Sona Sosona." Gala

i dubwali. I siviyeuweila, "Sona Sosona." I semwa bi dubwali, gala. Bogwa i katubwadi kaula kaimagu. Sena gidageda i keibiga Dugawina, i vakikila kaigala, i pikekita, "Sona Sosau!" Bogwa bi kariga Dugawina kawala i lolewa i lolewa, "Sona Sosau." Bogwa i katuni kala vavagi kaimagu, i tatava Dugawina i kariga.

I katupo i luleta, i keibiga, "Dugawina, bulagala sagali bita legasi." I keibiga luleta, "Ku weisa, ku giseisa Dugawina, bi livala bulagala sagali, bita legasi." Taitala vivila i la i ulemwa bwala i suvi, i gisi Dugawina boge i kariga. I keibiga menana vivila, "Boge i kariga!" I makeisa katitaki luya, kaula, kaimagu, i keibigasi, "Menana kaimagu i teya vivila i kariga." I kausa kaimagu i laisi. I tayelu kaula i mwa o lopola bwala, i kanamwa.

I kapwalisa Dugawina, i lausa i bakusa o pwaipwaya. I simweisa.

(Tovileu i kukwanebu)

Tovileu

Mei sikeya Tudava Labai. Dokinikani mei sikeya Mtawa o raibwaga. I koma tomota tilolela valu i vinau. Matosina Labai i supwepunisi. I gisemwasi. I kokolasi, i teyasi si waga kailima. I taisi si waga. Tataisi i wokuva i yowagasi. I yowagasi i wokuva, ei yam i keidodigasi si kwava matosina, litusiya i keidodigasi. Keidodiga i wokuva i kalilovasi.

I kalilova molitomwaya, i katubayasa lusita. I seili guguwa o la vataga, i luki luleta, "Ku meya waga a sila." I keibiga luleta, "Boge i beku waga. Igau i ma moluwala buku sila." I kaliyagila moluwala i meiki luleta i sisu. "Ku meya waga a seila ula guguwa." I keibiga luleta, "Bogwa lei beku waga deli tabumwa. Igau bi ma lumta moluwala buku sila." I kaliyagila moluwala luleta, i keibiga luleta, "Ku meya waga a sili." "Bogwa lei beku waga. Igau ku sisu bi ma taivasila lumta buku sila." I kaliyagila taivasila luleta, i meiki luleta i sisu, "Ku meya waga a sila." "Bogwa lei beku waga. Igau bi ma monagwadi lumta buku sila." I kaliyagila monagwadi, i luki luleta, "Ku meya waga a sili." I kalidudila luleta, "Ku ma ta sikolasi deli tabumwa." I sila i beku waga. "Bwaina ba keiita ba wa o dubwadebula." "Ku simwa baka kewasi toya tabumwa."

I keimali luleta, i katubiasi la guguwa. I la i utu la kaikwala, la kova. I luki luleta, "Ku vakanoti um kova, tabwa bi bwau umseu, bi gisi Dokinikani. Bubwayu um kova, ku kweikwala. Bi bogi bi bwau umseu, yam gala bi bwau." I kewa luleta i lokaya tuwala i losa. I simwaga luleta. Matosina tauau i losa Kaili. I siweisa i bagulasi. I simwaga lusita i sisu.

Bi kuna i kenu o dubwadebula. I busi litukwa o kaibua. I basi wila, i suma. I valulu Tudava, i doki yagala. I siweisa. I vinunu bogwa i sili. I sisu bogwa i lolo. I simweisa bogwa i sakaula i lau mwotila, bogwa i vakayala, bogwa i yagila kayala. I simweisa, i sisu bogwa i ulatila, bogwa i ulita-bwabweila, bogwa i toveaka. I katupoi inala, "Avaka ta sisu o la odila?" I keibiga inala, "Taga ku mwa-gega. I lagi Dokinikani, bi ma bi komeda."

I simweisa, i sisusa, i luki inala, "Makaina avai kai?" "Kaiboma. Kayala ta keiviki." I likubali i kovi la kayala, i meya i teya. Tateya i wokuva. i kabikwali. I yiku i tawola. I luki inala, "Kawam kayala! taga a yiku i tawola." I kovi milikutu, i ma i teya. I teya i wokuva, i yiku, i tawola. "Kawam kaipeula." "O ku la ku kovi gavi. Kayala ku meya ku teya." I teya i wokuva i yiku, i tawola. I luki inala, "Avai kai kaipeula?" I keibiga inala, "Makaina avai kai?" I keibiga inala, "Kwebakwebila. Da kayala guyau yakida." I lukubali, i simwa i teya. Tateya i wokuva, i gabu i wokuva, i yiku kaipeula. I yiku siviyuweila kaipeula. I keibiga, "Makaina ula kayala."

Ei yam i tokaya i lolo. I keibiga inala, "Ambeisa buku mwa?" "Ba mwa a lolo wa keda." I gili la kayala i lolo i wa. I weiki bulukwa i toto. I weiya. I keimali i meya i luki inala, "Inagu, matouna?" I keibiga inala, "Menana bwalodila, bomada guyau, gala ta kamkwam. Ku lau ku lai o bwarita, ku maga."

Ei yam i tokaya i lolo i vayali o kwadewa, i weiki kwau i lilolo. I weiya i keimali. I meya i luki inala, "Inagu, menana?" "Gala!" "Kwau kada inia yakida? Bitu koma?" "Gala. Ku lau ku lai." I masisisi.

Ei yam i gili la kayala i lolo i weiki waila i toto. I weiya. I keiita i loki inala, "Inagu, menana?" I keibiga inala, "Menana waila. Minuwala la odila. Ku lau ku lai." "Mitaga ambeisa la valu i sisu Dokinikani?" I keibiga inala, "Sena kadanau. Igau buku loki o-raibwaga i sisu." I lolo. I lilolo i toli Kwepukoya o kadilalavi. I pukoya, "Kaina ba suma makadana, kaina ba suma makadana? Bogwa la keda Dokinikani i lolo. Bogwa lei wa o la valu. I lai la kayala, i yoyowa o la bwala matouna i sisu.

I sunini o la odila Dokinikani. Tokosikuli i sisu o valu. Tokosikuli latula Dokinikani, i yamata la bwala. I yoyowa la kayala Tudava o la bwala Dokinikani, i viya. I keibiga Tokosikuli, "Woe! Availa yokwa, ku ma ku visi la bwala Dokinikani?" I valapula Tudava, i weiki i sisu Tokosikuli, "Avaka peila o ku weiya la bwala Dokinikani?" "Gala. A sisu, a ma a gisi. Ambeisa lei mwa?" "Ei la i sunini." "O ku mweini bwaibwai a mom, ba keiita." "A ku sili, igau i ma Dokinikani i gisem, buku la." "Gala. Ba keiita." I mom bwaibwai, i keiita. I tawola la kayala, i seila o kayola i tubwalola. I keibiga Tokosikuli, "Ku la." I keibiga Tudava, "Nabwaya ba ma. Bi ma lubeigu, ku luki bi tulatula ba kalobusi. Nabwaya gabogi ba ma." I la i simwaga.

I kalobusi Dokinikani, i keibiga, "Avaka wawala luya buku seili?" I keibiga Tokosikuli, "Taitala tau sena toveaka ei ma lageila. Gala bita keibiga." "Ambeisa lei ma?" I keibiga Tokosikuli, "Boge i keiita. A keibigi, Igau i ma lubem i gisem, buku laga. I peiki, bogwa lei la. Nabwaya la tuta bi ma, ku tulatula." I keibiga, "Mokita!" "Bogwa nabwaya bi ma, la kayala ku gisi. Kaisikalu i towa wa keda, i lai la kayala i viya um kwesikalu, i lusilai i la i kanamwa. I keibiga Dokinikani,

Kasi kahu

"O matagugwa a kaguguna yamam!"

I la Tudava, i weiki inala, i keibiga, "Bogwa la bani la valu." I keibiga inala, "Bwaina, nabwaya igau ta gabu kam mana." I gabu i semwa. I yopwi kala bisila i semwa. I gabu kwegapani kala vana i semwa. I mwam milukwebila. Borogu i mwam i tomwa. Kala borogu Tudava i mwam, i tomwa, i mwam kala borogu Dokinikani i tomwa. I luki inala, "Ku gisi agu borogu bi tatai, bogwa la wei-ya Dokinikani. Ku gisi bi dagugu agu borogu, bi tatai Dokinikani kala borogu bogwa ei weigu. Ku yamata, ba laga a lolo." I lolo.

I lolo Kwepukoya i toli. I lai la kayala, i yoyowa wa keda i toli. Lei i lulu. I seila o kayola i lolo. I lolo bogwa lei wekeya la valu, i lai la kayala. I tulatula Dokinikani i tola o kailabeta deli bunala. I lai Tudava la kayala, i yowa i la i weiki kailabeta i la i kanamwa o pwaipwaya. I katupoi Dokinikani, i luki Tokosikuli, "Bogwa bi valapula?" I seilakkaliyala i valapula?" I keibiga Tokosikuli, "Bogwa lei ma!" I kau la kayala Tudava i kalobusi i ma, i keibiga Dokinikani, "Weu! Lubeigu, bogwa luku ma." I keibiga Tudava, "Bogwa la ma." "Ku sila o kabudoga." "Gala ba toto wala." "O igau i mweini bwaibwai Tokosikuli ku mom, igau ku veiwas!" "Gala. Ba keiita." I lulu la kayala, i seli o kayola. I vitubwalola.

I tokaya Dokinikani, i keibiga, "Tokeiligu lubeida bita wa." "Gala. Ba kugwa." I vitubwalola, i gisemwaga Dokinikani i wekeya. I keibiga Dokinikani, "Tokeiligu bita wa." I lolasi. I lolasi wa keda, i veva Dokinikani, mwada bi koma. Tudava i lai kapwatata kala vana i koma. I lolaga. I lolo wa keda. Bogwa lei wewa Dokinikani i veva mwada bi koma. I lai kapwayuweila kala vana i koma. I lolaga Tudava. I lolo o tapwala keda, i veva Dokinikani

"O matagugwa a kaguguna yanam!"

I la Tudava, i weiki inala, i keidiga,
"Bogwa la bari la valu." I keidiga inala, "Bwains,
nabwawe igau ta gawu am mana." I gawu i semwa. I
yopwi kala distila i semwa. I gawu kwawonin kala
vana i semwa. I mwam minkwebila. Borogu i mwam
i tomwa. Kala borogu Tudava i mwam, i tomwa, i
mwam kala borogu Dokinikani i tomwa. I luki
inala. "Ku wisi agu borogu bi tatal, bogwa la wei-
ya Dokinikani. Ku gisi bi agugwa agu borogu, bi
tatal Dokinikani kala borogu bogwa ei weigu. Ku
yamata, ba laga a lolo." I lolo.

I lolo Kwebukoya i loli. I lai la kayala,
i yoyowa wa keda i loli. I lai la loli. I seila o
kayola i lolo. I lolo bogwa lei wekeya la valu, i
lai la kayala. I tulatula Dokinikani i tola o kai-
labeta geli bunala. I lai Tudava la kayala, i yowa
i la i weiki kalilabeta i la i kanamwa o pwaipwaya.
I katupot Dokinikani, i luki Tokosikuli, "Bogwa
bi valapula?" I seila kalyala i valapula?" I ket-
diga Tokosikuli, "Bogwa lei ma!" I kan la kayala
Tudava i kalobusi i ma, i keidiga Dokinikani, "Wen!
lubeigu, bogwa luku ma." I keidiga Tudava, "Bogwa
la ma." "Ku aila o kabudaga." "Tala ba toto wala."
"O igau i mwam bi pwaipwaya Tokosikuli ku mom, igau
ku veiwasi!" Gala. Ba keita. I lulu la kayala, i
seila o kayola. I vitubwalo.

I tokaya Dokinikani, i keidiga, "Tokel-
ligu lubeida bita wa." "Gala. Ba kugwa." I vitubwa-
lola, i gisemwaga Dokinikani i wekeya. I keidiga
Dokinikani, "Tokeligu bita wa." I lolasi. I lolasi
wa keda, i veva Dokinikani, mwada bi koma. Tudava
i lai kapwatata kala vana i koma. I lolaga. I lolo
wa keda. Bogwa lei wewa Dokinikani i veva mwada bi
koma. I lai kapwayuwela kala vana i koma. I lolaga
Tudava. I lolo o tapwala keda, i veva Dokinikani

giziyani - drift to fro
laba - throat held

16

mwada bi litaki. I kilai kapwatala kala vana kwegapani, i koma i wokuva. Bogwa nanola i paniwa Dokinikani. I lolasi.

I losa bogwa o raibwaga. I veva bi koma. I kilai kapwavasila kala vana i koma. I losa i weiki pilipali miyawena. I pela i tula. I katuyuwali kala bisila Tudava. Dokinikani i doki i kugwa. I veva mwada i weiki. Gala. I mweiki. Gala. Tudava i kapali si keda. I tomwa i ninei. Gala. I koana, "Mwa! O ku ma ku tomwa beisa. A doki ku kugwa, kaigi ku tomwa." I livala Tudava, "O wotuna! La ma la tola, a gisem ku nenei." A doki ambeisa buku mwa." I keibiga Dokinikani, "A doki yokwa ambeisa buku mwa, kaigi ku toto wala." I doki Dokinikani igau gala i nukwali, i keibigivau, "Ku toto ambeisa buku mwa?" I keibiga Tudava, "Ku toto ba tolaga we lavam ba wa." "E, ku tolaga ba gisi." I kau kaikela i vawosi, i katuyuwali kala bisila. Dokinikani i doki bogwa i tola, i mitavila i lasi, i kapituni titolela yamala. "Wei! Yamagu!" *Katuyuwali*

I keibiga Dokinikani, "Ambeisa manikeda buku mwa?" I keibiga Tudava, "Ba tola o kwayuweila yamam ba wa." I keibiga Dokinikani, "O ku tolaga ba gisi." I kau kaikela i vawosi i keimali, i katuyuwali kala bisila. I mitavila Dokinikani i lasi, i kapituni kwayuweila yamam, "Wei! Yamagu!" "Ambeisaga ku tola buku mwa?" I keibiga Tudava, "Ku toto, ba tola o kaikem ba wa." I keibiga Dokinikani, "Ku tolaga ba gisi." I kau kaikela Tudava, i vawosi i keimali, i katuyuwali kala bisila. I doki Dokinikani bi koma kaikela. I lasi i kapituni kaikela titolela, i keibiga, "Ambeisa buku mwa." "Ku tolaga, ba tola o kayuweila kaikem ba wa." I koana Dokinikani i gisi Tudava i toto. I kau kaikela i vawosi i keimali. I lasi Dokinikani, i kapituni kaikela, i kapusi i la i kanamwa o pwaipwaya. I keibiga Tudava, "Ka! Bogwa o ku sopa." I tobusi Tudava i kapituni kayola Dokinikani. I wai la ka-

yala.

Inala i sisu i gisi borogu. I dagugu Dokinikani kala borogu, i tatai Tudava kala borogu. Inala i gisi i keibiga, "Bogwa latugu i weiya Dokinikani. Kala borogu Dokinikani bogwa ei dagugu, latugu kala borogu i tatai." I tulatula latula i kalobusi o valu. I keibiga Tudava, "Inagu, matowena?" I keibiga inala, "Avaka ku vigaki?" "Bogwa la weiya, debana la meya." "Ku weya ku sewa beisa. Igau i bogi bita vagi o kailuya, bi loki kadamwa i simweisa."

I kwayavi i luki latula, "Ku weiki kailuya kaiveaka, ku meya. Ta didagi pwaneta bi loki kadamwa." I seili latula, i lupi pwanetala Dokinikani, i seili o kailuya. I talaguguya, i seili o kawalawa, "A Buku La Buku LaBeisa Tomwaya Ku Basi We La Laba Ku Kweiita Ku Mwa O Bwarita I Giyamem." I sakauli i valutu Kaili i kota. I basi i la laba molitomwaya. I sunapula i mwa i nei. I keiita kaboma i la o bwarita. I nenei. Gala. I masisi.

I giyami makaina kaboma, i lau we la bwala moluwala. I basi i mamata. I nenei. Kaboma i giyami i keiita i la o bwarita. I nenei. Gala. I masisi. I giyami i la beisa moluwala taitolula. I basi we laba. I mamata i nenei. I giyamiga i la o bwarita. I nenei. Gala. I masisi. Kaboma i beu i la taivasi-la moluwala. I basi we la laba. I sunapula i nenei. I laga kaboma i giyami. I nenei. Gala. I masisi. I giyami we la bwala i basi. I sunapula i meiki i kutakota. I lupi deli kabomala. I lau we la bwala i sewa. I masisi.

Kaukwau i luwawala, "E! Tuwagwa, nabwaya buku takewasi ulo baleku, a mwaga. Ku meisa ta yowagasi da wagasi, bita losa, ta giseisa ludetasi. Igau ku takaiwasi ula baleku." Ei yam i kolekusi kama, i losa o

kema i losa i takaiwosi bwadasi la baleku. Matouna-
ga i simwa i sulu towamata, I sulusulu bogwa ei
menu i toli. I lalavi i kalobusisi tuwala, i kau
pwanetala Dokinikani i seila wa kuli i lupi i mwa.
I lalavi boge i vanowasi takaiwa tuwala, i kalo-
busisi, i yaya bwadasi kasi beisa kaimelu, "Ku
yakeisa litumia i kamsi, yokwami kami towamata
ku meisa buku kamsi." I keulasi si kaneku, i meisa
i kamsi. I kamkwamsi i seilasi si kaneku o lubwau,
i sekeilisa makwa pwaneta. I butusi. I keibiga
bwadasi, "Kweilitasi ku meisa, ku komasi kada
pwanetasi."

Ei meisa i kamkwamsi i wokuva. I livala
bwadasi, "Ludetasi bogwa i banena. Bogi i bisi-
butu o mi laba. Ku neneisi i laga o bwarita. I
yalutu beisa yaegu. I bisibutu a mamata, a mweiki
i kutakota. A lupi a semwa wa bwala. Ma uula la
kabutu ula baleku buku takaiwasi. Magigu buku
giseisa. Bogwa lei wokuva. Ku yowagasi mi waga,
bita lokayasa ludetasi ta giseisa." I yowagasi,
i keibasisi i kolasi si laya boge i wokuva.

Ei yam i keidodigasi kasi tailima wala.
I keidodigasi i wokuva, i kewasi. I kewasi kasi
tailima. Kadasi o kabudoga i sisu. I gisi i do-
lapula kadala. I katupoi inala, "Lumta kasi tai-
vila?" "Tailima!" "O kailima makaisina i dola-
pulasi." I tobusi kadasi i la i kakaya. Kakaya
i wokuva i ma i sila o kabudoga. I sinata kulula.
I sakaulisaga kadala. I sakaulisa bogwa i meisa
o kwadewa, i wolasi o kawalawa.

I sivila kadasi. I mli tapwala. I sakeiwa
kadala, matala i la o la odila. I ulawolasi kadala

bi losa. I keibiga kadas i luki inasi, "Kwatupoi lumta, litusia taivila?" I luki luleta, "Litumia taivila?" "Tailima litumayasa kasi tailimasi." "Ku loki lumta, ku luki bi vilakulisi bi meyeisa ula kwava."

I simweisa bi valaguvasi, i luki, "Ku losa, ku vilakulisi litumia. Ku meyeisa ula kwava. I simweisa. Buku valaguvasi."

I losa i vilakulisi tailima wala, i meyeisa i silisa. I keibiga Tudava, "Komwaidomi ilaovau yokwami. Latula monagwadi agu vilabogwa ba vigaki." I meyeisa si guguwa i silisa. Tudava i luki kadala, "Yokwami tamimia bukunsilasi o mi kabosisusa. Mi guyau ba simwa." I keibigasi kadala, "Yoku bu kwaraiwaga. Bogwa laka meisa, laka keibasisa kam, bita simweisa o du valusa. Yoku muku tatama valu, taga yakamesa ta keibasisa."

(Tovileu i liliu)

KEIBIGASI TOPILETA

Topileta tolivalu Tuma. O pwaipwaya Madawosi i sisu. Madawosi valu dakuna. Igau i sisu Tuma Topileta i yamata baloma. Igau bi karigasi tomota bi seiki bilomasi kaula. Kamkwamsi boge i wokuva, bi katupoi, "Avaka peila luku ma?" Bi livalasi, "I bugwaweigusi." Bi keibiga, "Ku ma bita la." Bi luki litula, "Ku lausa tuwami, O ku vavisi butia kaveaka. Makadana mi keda o kabokaimwana. Bi silisa bi mwasawasi. Bi losa o vilo-veaka wa, ligisa wa bwaima Umnava, O-Gegela, O-Luta, O-Yowitu, Kwemilawosa.

Topileta baloma bi sigagaga. Topileta towanau, todedaya, makawala Toulawa. Sena tomini-bwaina, boge i tobu. Eaubada wa labuma, Topileta wa Tuma. Eaubada i yamata o rokaiwa. Topileta i yamata Tuma. I luwawala peila tomota peisi bagula, mayuyu, kayala, gidageda, kema, lou. Tuma kabokaimwana, kabomwasawa, boge i kavili migidasi. Gala bita bagulasi, gala bi tateidasi, gala bi baseidasi gala ta kapusisi, bita sisusa wala ta kaimwanasi.

Bi kavilisa tomota, bi talilisa kaina pwasa, kaina gunugwana mita lilisa. Bi yopu kaidoba bita gigisi bi wokuva pupagatu, migalela Boyowa, bi kanamwa migalela Tuma. Taulilisa baloma tominibwaita bi vagi.

Bi karigasi tomota bi losa, bi tolasa wa Dauwosi. Bi salilisa, bi valisa Katupotepwa. Bi valaisa bi valisa Dukupwala, bi lavemweisa bi valisa Dukumeyoyu. Bi valisa Dukupwala bi kalivilasi we Yaboma, O-Tutuna, Kulatubwa, Kwemilawosa, Kadavakaiwa, Sisiyogwa, Gilela. I kakayasi bi winisa mitasi, bi lulusa kaitabwasi kabululusi kanavisila. Bi winisa soba, talu, seyakwa, kwebila, bi wokuva migalela Boyowa. Bi sikamsi vaiguwa, bi katububulasi tomwaidona, bi yolapulasi komwaidona. Bi katupoisa baloma tovau, "Avaka makwaina?" "Kilivila! Ku tovila, ku

gisi inam, ku gisi tamam wa ligisa wa bwaima. Viluala puwali, viluala lagisa. Kunweya kiga tubwalom. Viluala kulu-kululu, viluala valiu, viluala kwola. Ku laga ku kwemwana wa ligisa wa bwaima.

Topileta la valu O-Tumaveaka. I sibwadi luwalawa. Latula Guyoula-Tuma, bwadala Tosila-Tuma. Lusita Inena-Tuma. I sisusa i keiwosisi. Mi-Kaileula i kikeiwosisi Usi-Tuma i keibigasi litula, "Baka la, baka gisi wosi Usi-Tuma." I losa i giseisa. Ikwayavi i meisa i makayasa tamasi, i lukweisa, "Tamamasi, sena mabwailima wosi." I keibiga Topileta, "Magimi wosi? Bwaina ba luki bi meisa i keiwosisi." I lausa la biga Topileta, i lukweisa Mina-Tuma, "Magila Topileta, bita lausa kasi wosi litula."

Kaileula
I keibigasi Mina-Tuma, "Taga ambeisa bulukwa bita kam? Ambeisa kaula bita kam? La bwaima kaiyu kai i dodiga kala." I livala, "Bogitolu bi meisa. Igau nabwaya, bogiu ba katubayasa. Bulukwa natinidesi tunutunu, bwabwau, sosou, nadedaya, - i luki latula - ku sabusa ununula bulukwa. I sabwi yasosou i sabwi yabwabwau, yadeidaya, yaliada, soula i lau i yaki tamala Topileta. I keibiga, "Ku semwa igau nabwaya."

Ei yam i tokayasi Mina-Kaileula, kasi dagula, kasi katububula komwaidona, i woyesiakai-lagila we la bwala Topileta. Kweilalima kulia pilatala, kweilalima kulia piliyuweila kailagila. I kebwana kaula sola la kwava, kwaitala kaula kweilatala kulia, i kebwana i wokuva. Topileta i sakaula i loki la kwava, i keibiga Topileta, "Koiyu ku kebwana? Tabwa senem koiyu ku kebwana, i koviga kulia." I kau kwaitala kaula Topileta, i seili o tabunebuna. I luki makwaina kaula, i basi kanivi-

nela i wokuva. I yopwi tauya, i yopwai lubala, i yopwi bulukwa, ununula i tamwau. Bogwa ei meisa Kaileula, i luki Guyoula-Tuma sola Tosila-Tuma, i keibiga Topileta, "I yuvi tuwam tauya, yokwa kwidiⁿⁱimi kapwalela bulukwa." I yuvi tuwala tauya, i lai bwadala kapwalela bulukwa. I vavagi si bulukwa "Hao! Hao!" I gelagelasi bulukwa. I kanukwenusi.

I kalobusisi Kaileula i keiwosisi. I yousisa litula bulukwa, i yeyayasi kaula sola la kwava. I keiwosisi Kaileula i wokuva, i makayasa bulukwa i kamsi i somatasi. I kamsi kaula i somatasi. I keibiga Topileta kawala, "Kaileula, Kawami, Gala bulukwa. Kawami, Gala Kawala. Ta makaisa bulukwa, kaula sena bidubadu." I kamsi i wokuva.

Ei yam i lapulasi, i yousi bulukwa buluwalima. I lukwemwa la bwaima. Kaula wala i kasewa. I mtuli bulukwa i kanamwa, i ligabu kasi. I lilgabu i wokuva, i tapelasi i bogi. Ei yam i tapelasi, i tapelasi i bogi. Ei yam i tapelasi, i tapelasi i bogi i tubwa uwasi. I kanamwa o lu valu Topileta. Bulukwa i lausa. I siweisa Mina-Kaileula. I siwa Topileta o la valu tuwali. I losa Mina-Tuma i keiwosisi litula.

Yaegu Igali, ula mwala Uweilasi kasi tokugwa tokaraiwaga, ma valusa Tobowada, a bani ma wosisa Kaduguwai. Baloma i sakeigu. O uula i kariga Kolaleu latugu. Ka losa ka nigabubusi. A kowagala a sisu, i ma i lukweigu matouna baloma. I weigu, i lauweigu O-Budibudi. I sakeigu wosi Kaduguwai. Igau i tagwala Uweilasi, ka mweyeisa wosi o rokaiwa. I meyeisa baloma, ta sipolusa o du valusa. Ta sipolusa i wokuva, ta tomiliwalisa ta wosisa.

A kariga yam yam natana tubukona. A masisi ei bogi, yaluwa i weigu. Deli Kadalai deli Dubiligaga ka keiwosisa wala. Magisi bi kaimwana Uweilasi, nigabubu bi wokuva.

Kaduguwai i kugwa. I sekeili O-Kubelisa, i sekeili Usi-Guyau, i sekeili Usi-Lauma, i sekeili Usi-Kayelu. Kaduguwai yagala Uweilasi la bwaima, la bwala. Usi-Pukoya wosi wala yagala. O-Kubelisa Uweilasi la bwala.

Bwaitavaya i wosisa, o luyeki Tobowada. A seiki taitala Kaduguwai, a seiki taitala O-Kubelisa, a seiki taitala Usi-Guyau, a seiki taitala Usi-Lauma, a seiki taitala Usi-Kayelu. Bogwa i nukwalisa, i tagina tauya ka losa komwaidona valu Uweilasi deli ka keiwosisa. I sakeigusi peila wosi, bua, kaula, vaiguwa, i kogugulisa. Igau Uweilasi i mapu veyagwa bulukwa, kaula, vaiguwa, i gabusa mona.

KEIBIGASI GUMAGABU

Gumagabu uula Bulakwa. I kou la waga Tokalamwa. I sakaula o bwarita. Igau tomota i lukweisa, "Ku la ku kweula um kwemapu wa koya, i weiyasi kadam, i komasi kinana." I la i kewa wa koya, i kota. Tokinana i ma, i makaya wa waga. Kutou i kau i kapituni kayola. I kau kunula i seili wa waga, i meya Bulakwa. Butula i keiwosisi.

(Taitala kawala)

Tomakam veyala i losa wa koya, I weiyasi i gabusi i komasi. Igau i sisu i valulu inala. Igau boge i toveaka latula, i teya la waga i kewakewa, i keibigasi Mina-Kaisiga, ninisila taigala, "Ku la ku kweula um lugwa, ei weiyasi veyamwa wa koya."

Ei yam i la wa koya. I kota i luki bwadala, "Ku mwa ku pali. Ba sisu wa waga." I vabusi bwadala. I libukena sola, i tadoyai. Igau i ma tokinana, i kapituni kayola.

Igau gala i kewasi i luki bwadala, "Kwatutulisa kopa. Bita losa o bwarita." I meisa Nubiyam i gabusa vana.

Ei yam Bulakwa i kota. I guyau, boge i weiya tau.

Wawela mei siki, tamala Gilibwala, latula nayoyowa. I keibiga luleta, "Kwenadaya, ku meya sitana mwaya a kaui." I keibiga Kwenadaya, "Gala, o taboda a sisu wala." Lei yam i keibiga tabula, i keibiga Kwenadaya makawala. I keibiga Kwenadaya, "Gala bua." Ei bogi i la i mwaiyuni Kwenadaya. I tokaya tabula, i suvi we la bwala. "Beisa availa kabala?" I keibiga taitala gwadi, "Yaegu." I katupoi siviyuweila, "Availa kabala manakwaina?" I keibiga Taiyuweila, "Yaegu." I katupoi taitolu-la, "Availa kabala makwaina?" I keibiga Kwenadaya, "Amakwaina?" I keibiga tabula, "Makwaiwena." I keibiga, "O bwaina, ku sisusa, ba laga." I masisisi.

I masisi lubulatola, i tokaya tabula, i weiki Kwenadaya i masisi. I kau kabala, la moi, kala kauya, i yowa i lau Myuwa. I visilili i visilili i lau o lopola raibwaga. I vaguli i luki Kwenadaya, "Availa ku masisi? Ku mamata, ku gisi valu. Ku kanukwenu?" I kanayewa i masisisi. Ei yam i luki Kwenadaya, "Kwanukwenu, ba laga." I ma i masisi Wawela. I katupoi Gilibwala, "Kwenadaya ambeisa lei mwa." I keibiga bwadala, "Kabala kwewokuva, i lotumila la moi, kala kauya, la guguwa komwaidona boge i tamwau." I nei tamala, i nenei i bogi. Ei bogi i yowa tabula menana nayoyowa, i vina, "Kata Kata Kwenadaya U U U." I yowa i valutu o raibwaga. I suvi o uvea. I keibiga, "Kwenadaya, Ku masisi." I keibiga Kwenadaya, "A masisi." I keibiga tabula? "A nigada mwaya ku yusi, a nigada ^{ven} bua ku yusi. Lageila a meyem o raibwaga. Baka ~~kan~~ Ba kalimatem. I kanayewa i masisi. I kankenusi i gela sakau. I luki Kwenadaya, "Kwanukwenu, ba laga." I yowa. "O Kata Kata Kwenadaya U U U." I valutu wa Wawela. I suvi we la bwala. I kau kaitanei, i tanei la valu.

Tamana i valam Gilibwala. I valam tabula nayoyowa. I mamata Kwenadaya, i gisi yatala wotuna ei sona lei ma o uvea kayaula. I tokaya Kwenadaya

27

i biya. I kasai. I keibiga, "Bwaina, ba mweini."
I mweina. I mwemweina o raibwaga. I mweina o
dabwana raibwaga, i keibiga, "O we ma du valu!"
I simwa i veiwasu. I veiwasu bogwa i lolo, i la
o kwadewa, i kalobusi o la bagula Gum-Myuwa,
kedala la bagula i lolo. I weiki tou i gudu i
kuli. I kau usi i kam. Bogwa i loya bagula. I
tavina o lopola bagula, i weiki tou lukuvatala
lukuveaka, i simwa i liku. I liku i kapwagega
tou. I suvi i la o lopola. I towa, i kau wotu-
na i seilavi deli tou. I la o lopola i towa.

Ei bogi i yowa tabula. I nenei o dabala uvea.
I suvi, i vagi bubula i nenei o raibwaga. I tapi
i keibiga, "Kwenadaya, ambeisa yoku ku tamwau? Am-
beisa buku ma? Ambeisa buku la? Gala ambeisa um
keda." I tapi komwaidona raibwaga i vinau, i tapi
baleku i vinau, i tapi kwadewa i wokuva, i tapi
keda i wokuva, i tapi buyagu i wokuva, i tapi to-
keda i wokuva. I liku tou, i liliku komwaidona i
wokuva. I loki malukuvana tou lukuveaka. I siwa i
liku yuwotala. Mwada bi liku yayuweila, i vavagi
sakau, "Sakou!" I yowa lopola, i kilai malukuva-
na tou, i yowa i ma Wawela.

Ei yam i tokaya Gum-Myuwa i keibiga, Ba la
a vakawali bagula." I lolo i pela o kalapisila, i
gisi la tou i keibiga, "Ula bagula availa i va-
vagi?" I simwa i seili tou. I seili bogwa i woku-
va, i loki malukuvana tou lukuveaka. Mwada bi
seilavi, i gisi tomota o lopola, i keibiga, "Avai
tau yokwa?" I keibiga Kwenadaya, "O yaegu Kwen-
daya." "Amtolem?" "Toleigu Wawela, latula yaegu
Gilibwala. I mitugageigu tabugu, i kaweigu, i me-
yeigu o raibwaga. Ku gisi um tou, i liliku i
wokuva. Bi yam i la." I keibiga tomwaya, "Ku ma,
bita la o valu. Kaula boge i menu.

I yaya la kwava Gum-Myuwa. I suvisi i
kamsi. Kamkwam i wokuva i masisisi. I bogi i
nenei menana nayoyowa. I nenei o la odila. Gala.

I nenei wa bagula. Gala. I nenei o kwadewa.
 Gala. Ei yam i ma Wawela i simwa. I siwaga
 Kwenadaya O-Myuwa. I sisu boge i peula wowola.
 I kau kema i teya la waga. I tutu i wokuva, i
 lali i wokuva, i yuwali pitapatila, la liu, la
 vatotowa. I yuwali i wokuva i luki Gum-Myuwa,
 i keibiga, "Tamada, Nabwaya ba la." I keibiga,
 "Ai seiki yokwa. Kala biga bi bwadem o bwarita.

Ei yam i keidodiga kala mwala, la vaiguwa,
 kala seyakwa. I kopituki liu. Kakaya boge i wo-
 kuva, i keibiga, "Buku sila, buku wola." I ula-
 wola bi bogi. I luluwai la biga tomwaya, "Ku
 lagi bi ma tabum, ku kwau lamila, ku kwatukovi
 waga." Bi maga bi teta o sibula um waga, bi la.
 Kwatuviliga um waga, buku wola." Mokita. I wola,
 i ulawola, i lagi ei vina, "O Kata Kata Kwen-
 adaya U U U." Lei wa i katukovi waga. I teta o
 tapwala la waga, i keibiga, "O ina kaita kabilab
 bala!"

Boge i la, i katuiviliga la waga, i sila, i
 wola. I ulawola bogwa ei yam. I keiita tabula i
 vina, "O Kata Kata Kwenadaya U U U!" Bogwa i
 meiki, bogwa lei ma katitekina, i kau la lamila
 i katukovi waga, i la o lopola i kenu. Ei maga
 tabula i teta o tapwala la waga, i wa. I ula-
 wola matouna o luyeki, i ma Wawela.

Ei bogi i yowa menana ei weiwa Dauya, i
 bwadiga lei ma i keibiga, "Ina makaina kabilaba-
 la i nanakwa i beu." I la i nenei O-Myuwa. Bogi
 i ulawola Kwenadaya, i talaguva Wawela. I meiki
 tamala. I katupoi Gilibwala, "Avai tau yokwa?
 A valam latugu. Ku maga ku nenei?" "A gala. Yaegu
 Kwenadaya!" I liku la bwala tamala, i suvi Kwen-
 adaya. I katupoi tamala, "Ambeisa muku siki?" I kei-
 biga latula, "I mitugageigu lumta. I laweigu
 O-Myuwa, i laweigu o raibwaga a siwa. Tabwa yatala

Wotuna a mweina, a ma o rokaiwa." "Ki." I kei-
 biga tamala. I valam, i wewea. I keibigasi, "Avaka
 guyau i valam?" "Gala. I mimi latula i valam. I va-
 lam i yam, ei maga luleta. I valam i simati kema
 tamala. I toto wa taboda. Lei maga menana i kei-
 biga Kwenadaya, "Ku loki lumta ku valamsi." I lolo
 i pela o kalapisila, i keibiga, "Ku loki lumta o
 tatom." I pela makawala (i vitulaki). I lisema kema
 luleta, i kapituni kayola. I tataba luleta i kari-
 ga. I biyasi Mina-Wawela, "Ku losa ku bakusa kami
 tomata. Kaipota. Latugu i lau o raibwaga, lageila
 i katulaguva."

Boge i kariga vivila. I simwaga i guyau
 Kwenadaya. Wawela i karaiwaga. I simwa, boge i
 wokuva.

(Taitala i kewa pilatala libogwa)

Kaitaki i sisu o si valu. I vai taitala vivila i simweisa. I sisusa i valulu la kwava. I valulu i keikwala wa bwala, latula tau. La mwala i ulatila deli vivila. I losa o la odila. I kudubwausa, i kauliasi. La kwava i sisu o valu navalulu.

Matowena, taitala vivila i teya nanola, i kwakwadusi o la odila. Ei yam i losa o la odila. I sisu la kweva, bogwa i kavagina latula. La mwala deli vivila i kamalisa, i kukusa matala, i meya i gisi la kwava. Ei yam i luki la mwala, i keibiga la kwava, "Nabwaya ku bokuleigu, bita la a kili kada sopisi." Ei yam gabogi i valugwa kala sopi i gebila. I losa wa sopi, i luki la mwala i keibiga, "Ku wa ku siwa wa dakuna tau, vivila i kilikili sopi."

Kilikili bogwa i wokuva i tokaya vivila, i luki dakuna, "Vilemi Bwemisiga! Vilemi Bweimisiga! Kwapwagegasi Kwapatusa Tau." I kapwagega dakuna, i kapatusa tau. La mwala i la o lopola dakuna i kapatu. I gebila kala sopi la kwava, i la o valu. I katupoi yawala, "Um mwalaga?" I keibiga yawala, "Boge i la o la odila i sunini. A tulatula, gala. La ma sena kasai."

I tulatulasi i masisisi. Ei yam i neisa la mwala. I neneisa, gala. Ei yam i valugwa kala sopi i la i kili. Kili i wokuva i valugwa, i vina, "Kaitaki Ole Ole Nuagu Sasobu." Kaitaki i um, i tama tau wa dakuna. I keibiga la kwava, "Ku la o lalavi, ku la ku mwaigini ku la kaibwita. Gogebila kam mitukuku, kam kamakamila, ku meya a gisi. Lageila i gadem dikulela Bwemisiga. Gidivilém, giditanem." Kaitaki i vagi tauya, "Mm." I keibiga la kwava, "Kwanukwenu, ba laga." I gebila kala sopi i ma o valu.

Ei bogi i tulatulasi. Gala. I ma i katupoi inala, "Yokwa, avaka ku vigaki som?" "Ai seiki. Boge i i lausa vivila o raibwaga. Yaegu agumwaleta wala."

Ei yam i sulu kala i kam. I kam i wokuva, i valugwa kala sopi bi la, bi vakawali la mwala. I gebila i kalobusi wa sopi, i kili la sopi. Kilikili boge i wokuva, i towa kala sopi, i vina, "Kaitaki Ole Ole Nuagu Sasobu Nano Nano Ku La O Lalavi Ku La Kaibwita Ku La Ku Mwagea Gogebila Kam Mitakuku Kam KamaKamila. ku meya a gisi. Lageila i gadem dikulela Bwemisiga, gadivilem, gaditanem." I tama la mwala. I keibiga menana, "Ku kwanukwena. I meisaga tauau baka losa, a kudubwausi." I kanukenu la mwala, i gebila kala sopi la kwava, i kalobusi o valu i taya. I katupoi inala, "Bogwa ku kwasopi luku ma?" I keibiga latula, "E!" I masisi.

Inala i gisi i keibiga, "I mtugagi la mwala. Avaka i vigaki? Nabwaya ba loya o tubwalola, ba loki a gisi." I masisi. Ei yam gabogi i sulu kala i menu, i kam. I valugwa kala sopi, i gebila.

Tau matouna Kaitaki boge i kam^koma wowola dakuna, bogwa bi kariga. I valugwa kala sopi i gebila. Tubwalola i tokaya inala i wekeya. I mitavila latula i supwepuni inala. I lolasi, i mitavila latula i supwepuni inala, i kalobusi wa sopi. I kili kala sopi. Kilikili i wokuva, inala i supwepuni. I valugwa i wokuva i sili o dakuna i vina, "Kaitaki Ole Ole Nuagu Sasobu. Kaitaki kwanukwenu, senem ulatila ku la o lalavi, ku la ^{ku}mwagea, ku la kaibwita, gogebila kam mitakuku, kam kamakamila, ku meya a gisi. Lageila i gadem dikulela Bwemisiga, gidivilem, giditanem." I keibiga Kaitaki pekekita kaigala. I keibiga mena, "O kwanukwenu ba laga." I gebila kala sopi, i vitubwalola i la o valu.

I valapula inala i toli o dakuna. Boge i gisi. I keibiga yawala, "Vilemi Bwemisiga ku kwapwagegasi, ba kau yawagu." I kapwagega dakuna, i tapopuli yawala i kau. I seili o kayola i lau wa bwaima, i sewa. I mwaga i sulu kala. Sulusulu boge i wokuva i yaya. I yuyaki. I weiki yawala i kanukenu, i keibiga, "Ku tokaya ku kwam, ku mom kam lubwau." I to-

kaya yawala, i kamkwam i wokuva, i kenu. I sunapula yawala i la o la bwala. I vagi kala lubwau. Ei yam ei yam i sulu. Bogwa sitana Kaitaki i peula wowola, bogwa i lokaya dokala wowola, bogwa i toveaka. Inala i la i libagula.

Latula i sibeigasi kasitaiyu tabula. I sisusa kweyonikwasi toya sala. I bokovili natana kweyoni-kwa i suvi wa bwaima. Matouna monagwadi i ulemwa bwaima, i gisi tamala i sisu wa bwaima, i dou tamala i keibiga, "Tamagu, ku ma beisa?" I suvi latula, i weiki tamala i sisusa. I sisusa bogwa i towotu kalasia. I vabusi latula i toli o pwaipwaya. Kala tuta inala bi kalobusi o valu.

I kalobusi inala i sakaula monagwadi latula matouna, i weiki inala, "Inagu a loki tamagu, a sisu la ma." I keibiga inala, "Tamam ambeisa mei siki?" I keibiga monagwadi, "Kama taiyu tabugu i sisusa." I vataisi, i keibiga inala, "Ku sasopa. Bogwa i kariga tamam." "O ku loki ta gisi." I toka-yasi kasi taiyu inala, i loki i ulemweisa bwaima. Bogwa i gisi tau i sisu. I suvisi kasi taiyu latula, i lokayasa tau i sisu.

I yowaisi i yowaisi boge i masisi. Ei yam i koluluvisi i mweisi o si valu o si bwala, i masisisi. Bogwa i kakila Kaitaki. I luvemwa ulatila, i yousi la kwava.

(Ai seiki availa i kukwanebu)

I sisusa tamala, inala deli latusi. Dokini-kani kwaitala valu deli la kwava tailima i sisusa. I luki la kwava matouna Gum-Wawela, "Nabwaya bita losa bita takaiwosi." Ei yam i tokayasi toya litula i takaiwosi bogwa i lalavi. I banisa tataya. I keibiga latusi menana, "Tamagu, waneigu." I sakeisa. I kau menana vivila i mwasawa. Boge i wokuva si bagula i tokayasi i kalobusisi o valu. I keibiga inala, "Ku la ku kwau yatala kada sopisi." I keibiga latula kawala, "Gala ba la a kasopi. Boge i teya nanogu waneigu. Bwaina baka sisu." I peiki menana vivila.

I la i kili sopi inala. I kasopi i ma i sulu kasi. I masisisi ei bogi. Lei yam i losa i bagulasi tamala inala. Menana vivila i teya nanola wanela i sisu wala. Gala i bagula, gala i wotetila, i sisu wala, boge i teya nanola. Boge i lalavi i kalobusisi tamala inala. Ei meisa i keibiga inala, "Gala ku wota da kaisi?" "Gala a wota, a sisu wala." "Gala kada sopisi ku kili." "Bogwa i kwami lopogu waneigu, a sisu wala." I keibiga inala, "Ku meya wanem a yousi. Ku laga ku kwasopi." I seiki inala, i valugwa kala sopi. I keibiga latula inala, "Waneigu ku yamata bi bwaina, ba laga a kasopi." I gebila latula, i la i kasopi. I keibiga inala i luki la mwala, "Ta seila i gabu ta koma." I seilasi i gabu, i komasi. "Bi ma latuda bi katupoi, bi lukweigu, Inagu waneigu!, kawa-gu, ku loki tamam ei lau o bikubaku." I kalobusi latula i taya sopi, i keibiga inala, "Ku valilagi kada sopisi, igau ku loki tamam i lau wanem o bikubaku." I sakaula vivila i weiki tamala, "Tamagu, waneigu!" I keibiga tamala, "Gala ba meya. Inam i sisiya. Ku loki inam." I sakaula i loki inala, "Inagu ku meya waneigu." "Gala natana ba meya, ku loki tamam." I sakaula vivila i loki tamala, "Tamagu ku meya waneigu!" "Gala natana ba meya, ku kweiita ku loki inam." I sakaula i weiki inala, "Inagu ku meya waneigu." "Gala natana ba meya. Tamam i sisiya." I sakaula i loki tamala, "Tamagu ku meya waneigu." "Gala, inam

i sisiya." Boge i bogi i masisisi. Menana gwadi i valam wala. Ei yam i valam. I mtoki inala tamala. I valam i bogi kwaiyuweila yam, kwaitolula. I bogi i gwegwesi uwasi inala tamala. I luki la kwava i keibiga la mwala, "Nabwaya bita kewa bita la Dobu, bogwa i gwegwesi wowoda valam."

Ei yam i keidodigasi o si waga. I silasi i kewasi. I kewasi bogwa i losa o bwarita, i sunapula latusi, i mweina nunuli, i kimsi nunuli. Ei vina menana gwadi, "Kimsi Nunuli Kimsi Nunuli Weyega Inagu Tamagu O Si Katala Bi Kanali." I lai nunuli i beu o si katala. I kululu la kwava i kau nunuli, "Mwa! Ta keiita, latuda bakwaila yamala. Bogwa lei simla, bita loki."

I kotasi, i suvi latusi i la, i valam wa bwala. I keibigasi u sola la kwava, "O ta doki bogwa lei simla. Lata ma i valam i bogi." Lei yam i kewasi i losa. I sunapula latusi i mweina o nunuli, i kiuya kwaitala nunuli, i vina menana gwadi, "Kimsi Nunuli Kimsi Nunuli Weyega Inagu Tamagu O Si Katala Bi Kanali." I lai nunulu i beu o si katala. I kululu la kwava i kau nunuli, "Mwa! Ta keiita, latuda bogwa i simla. I keiitasi o si valu. Menana gwadi i busi, i suvi wa bwala i valam, i keibigasi inala tamala, "Ta doki boge i simla lata ma. Bwaina bita keiita bita la Dobu." I simwaga latusi i kewasi. Boge i losa i sunapula menana gwadi, i mweina o nunuli, i kiuya kwaitala nunuli, i vina, "Kimsi Nunuli Kimsi Nunuli Ku Weyega Inagu Tamagu O Si Katala Bi Kanali." I kululu inala i kau nunuli, i luki la mwala, "Ta keiita, ta loki latuda boge i simla." I keibiga la mwala, "Ku ligeiwa. Bita la. Menana gwadi i tula taigala."

Latusi wa kai i kiuya kwaiyuweila nunuli, i lai i beu, o si katala bi kanali. I kululu la mwala, "Bogwa lei simla latuda, ta keiita." "Ku ligeiwa. Bita la. Bwaina bi valam. I tula gwadi ^{ta} gala.

I suvi inagwadi i la i valam. I valam i bogi. I siwa Dokinikani. I mimi Dokinikani. Ei yam gabogi i luki la kwava, "Nunumwaya ku sisusa, ba laga a gisi agu mimi. Natana vivila i sisu o nunuli i valam. Veyala bogwa i kewasi i sakauli Dobu." I meiki i toli, i lagi valam. I la o uula kai, i toli o uula nunuli, i katupoi, "Vi! Avaka ku vagi?" "Veyagwa bogwa lei kewasi, la valamgwa." I keibiga Dokinikani, "Ku busi ku ma, bita la." I keibiga inagwadi, "Gala ba wa. Magigu ku loki kaboma, ku gabi ku meya ba sila, bita la." "O ku sisu, ba laga." I sakauli i weiki la kwava, "Nunumwaya ku meyeisa kaboma, ba lau i sila kada tausi." I keibigasi la kwava, "Kaina ku sasopa!" "O ku makeisa kaboma, ku meyeisa ba lau." I gilisa kaboma i sakeisa.

I gebila i lau o nunuli i toli. "Ku busi ku ma ku sila, bita la." I busi gwadi i sila. I gebila i lolo. I lolo o tapwala keda, i weiki yatala wotuna i kasinenukwa. I laga Dokinikani kaiwokuva kaboma i lau i kalobusi o valu. I dou la kwava, "Nunumwaya, ku meisa ku tiyakeigusi." I keibigasi la kwava, "Kaiwokuva kaboma ku meya." I tiyakeisa, i meiki kaiwokuva. I keibiga, "Bogwa la meya. Taga amakawala? Bwaina ba keiita, ba loki." I keiita.

Menana gwadi i busi i la o nunuli. I mweina i sila. Dokinikani ei wewa. I keiita i katupoi Dokinikani, "Ambeisa ku mwa? La laugwa kaiwokuva kaboma." "Gala. Ku la wala, a keitama." "Ku ma ku sili." I busi i sili. I gebila i lau o tapwala keda. I weiki kaitala kai, i kasinenukwa menana gwadi i kanamwa. I gebila kaiwokuva i lau. I kalobusi o valu, i dou la kwava, "Ku meisa ku tiyakeigusi." I keibigasi la kwava, "Amatouna tau buku meya." "Taga o kulugu i sisu. Ku tiyakeigusi." I lupisa i mweiki kaiwokuva, "Bogwa la meya! Taga amakawala i kanawa la maga?"

I keibigasi la kwava, "Ku sasopa." I keibiga, "Bogwa la meya. Bwaina ba keiita. Ba loki a gabi ba meya." I loki. Menana gwadi gola i keiita i la o nunuli i siwa. Lei ma Dokinkani i katupoi, "Amakawala bogwa ku sila, ta waga. Amakawam ku kweiita buku ma la laga? Ku busi, ku ma ku sili, bita la." I busi i sila. I gebila. Gogebila i weiki kaitala kaiyaula. I kasinenukwa menana gwadi. I gebila kaiwokuva i lau. I weiki la kwava i sisusa. "Ku tiyakeigusi, i tomateigu!" I keibigasi la kwava, "Gala daka. Ku sasopa, ku uduwada. Gala taitala tau ku meya. Ku sasopa wala." I keibiga Dokinikani, "Bogwa la meya tugwa. Taga avaka i tamwau? Bwaina ba keiita."

I gogebila bogwa ei bogi. I tutuwau wowola. Boge i bogi i masisi. I luki la kwava, "Nabwaya ba loki a gabi a meya. Bita komasi." I keibigasi la kwava, "Touduwada yokwa." "Gala. Mokita, bogwa ba meya. Igau ba loki nabwaya." I masisi. Ei yam i gebila kaboma i la. Menana gwadi i mamata. I la o nunuli i siwa. Ei wewa Dokinkani i katupoi, "Ambeisa ku masisi?" "Gala. A masisi wala wa kai." "Ku ma ku sila, bita la." I pela i sila i gebila. I gabi i weiki kaitala kai kagubaguba. I kanala menana gwadi i kasinenukwa. I gebila kaiwokuva i lau, i kalobusi o valu, i dou la kwava, "Nunumwaya ku meisa, ku tiyakeigusi." I keibigasi la kwava, "Gala daka. Ku sasopa. Kaiwokuva kaboma ku gebila." "Ku tiyakeigusi. Kaina gaga wimi. Lageila ku siweisa ku sisusa, bwainaga bi tomateigu." I keibigasi la kwava, "Gala daka. Ku sasopa." "Ku tiyakeigusi." I yousasi, i meiki kaiwokuva. "Bwaina ba keiita." I gogebila kwaitala yam. I bogi i masisi.

I kanamweisa tamala inala i mimisi. I mamatasi ei yam, i keibiga la kwava, "Mwa! Ta kewa, ta loki latuda. I yugugwesi wowola Dokinikani. Bogwa bi koma." Ei yam i keidodigasi i kewasi. I sakaulisi menana gwadi o nunuli i sisu. - gisi tamala

inala i kewasi, i katugogova. I keibiga Dokinikani, "Kaina ku sasopa?" "Gala. Makaina! Bogwa lei kewasi." I keibiga Dokinikani, "Bwaina, ba la o gu valu. Bogwa lei meisa veyam, ba laga. Ba siwa."

I sakaulasi i kotasi veyala. I makeisa boge i simla. I katupoisi, "Amakawala um kwesisu?" "Gala i gigabeigu Dokinikani. 'Ei yam bogwa lei la o lu valu." I keibiga inala, "Uwala wadom bogwa o ku gisi, makwa yam baka sisu Dobu. I bogi kam tuta bi komem, ka nanakwa laka ma."

I kotasi o luwalawa. I vataisi yabiya. I la o si bwala i simweisa deli veyala. I siwa Dokinkani.

(Ai seiki availa i kukwanebu)

Douli mei sikeya Wawela. Kadala guyau. I uni inala sena tominbwaita. I lau o kilimo kai, i sewa o la bwala. Inala o valu i sisu. Kadala la kwava tailima. I kai tamgogula i takeiwasi. Takeiwasi i wokuva i mwam kema. Taitala la kwava ilaovau kadala i vai. Ei yam gabogi i losa i takeiwasi toya bwadala. Menana la kwava ilaovau i la i valugwa kala sopi. I kasopi i weiki tau i gegila kala ulia. I gigiu i lolo o pwaipwaya, i kasau giula. Lei wa giyovila i gisi. I keibiga menana giyovila, "Makawala tauau giusi." I nei. Gala. I koana i gisi tau i sisu o kilimo. I dou vivila giyovila i keibiga, "Am tolem?" I keibiga Douli, "Toleigu wa kai. A sisu o gu valu." "Ku meya sitana bua a kaui." I keibiga, "Gala agu bua." I keibiga, "Ku meya sitana kam maya a kaui." I keibiga, "Gala agu maya." "Ku busi ku ma ku livala ba lega." I keibiga tau, "Gala magigu, ba la. Ku lokaya tamgogula ku bagulasi. Yaegu gala. Toleigu kai ba sisu." I keibiga vivila, "Ku busi ku ma, ku livala." I keibiga tau, "A peiki."

I meiki menana vivila, i mweiki Douli, i mweiki waibitu, i kabi wowola. I kili kala sopi i vanoki. I kau i lau o valu i taya. I kavililaga kala sopi i wokuva, i kenu o kabala, i vagi kala kanunuva i kanunuva. I bigubagulasi guyau toya bwadala. Bogwa i kwayavi i kalobusisi. I yavisa sala kala. Menana gala. I doki i katoula. I katupoi guyau, "Somi menana? Avaka gala i sulu kaula?" I keibigasi gugwadi, "I katoula i masisi."

Ei yam i kolekusi kema i losa i bagulasi. Menana bogwa i tutu wowola tau. I kanamwa i masisi. I losa wa bagula, i valugwa kala sopi, i gebila. Kilikili kala sopi i wokuva, i meiki tau. I waipulu kulula. I waipulu i wokuva i kaui, i gegegila ulia. I loki vivila, "Ku meya sitana kam bua a kaui." "Gala agu bua." "Ku meya sitana kam maya a kaui."

"Gala agu maya." I yusi tau. I luki tau, "Ku loki um mwala o bagula. Yaegu gala toleigu valu. Toleigu kai ba sisu." I weiki Douli i siwa. I kabi wowola, i kuku matala. I doki tau lei kuku. I gebila kala sopi i la o la bwala, i taya. I kavililagi kala sopi i wokuva, i masisi o kabala.

I meisa guyau toya bwadala, i kalobusisi. I yaisi selaya, i sikeimweisa budisiya i kamsi. I katupoi guyau, "Avaka sami gala i yaya kaula?" I keibigasi selaya, "Sena kweveaka kala katoula." I kanukwenu o la bwala. I kamsi i wokuva i kwayavi, i luwawala guyau. I luwawala i wokuva i luki taitala touwata, i keibiga, "Nabwaya buku losa buku bagulasi, ku simwa, ku weya vituvatula giyovila, buku gisi."

Ei yam i losa wa bagula, i sibweiga matouna la touwata, i sisu wa bwala. Bogwa i lologwasi wa bagula, i gisi valu boge i wokuva, i valugwa kala sopi menana, i lau wa sopi, i taya. I kili kala sopi i wokuva, i vilugi i toto. I mweiki tau, "Yoku, a keibiga kam maya. Ku yusi. A keibiga kam bua. Ku yusi. Avaka peila. A keibiga gala lageila. Ku busi ku ma, ta livala." Matouna la touwata i supwepuni i gisi. I busi tau, bogwa i tagwala. I meiki vivila, i kabi i yowai. I yowaisi i kimali, i kukumatala, i kabi wowola, i siweisa. I sisusa tabwa bogwa i lalavi. I keibiga vivila, "Ku sisu, ba laga." I gebila kala sopi boge i wokuva, i kenu o kabala i masisi.

Bogwa i kwayavi i kalobusi guyau toya bwadala. I makeisa kaula bogwa i yavisi. I kamsi. Kamkwamsi bogwa lei wokuva, i suvi o la bwala guyau, i dou la touwata, "Ku ma beisa ku livala, ba lega." I keibiga matouna la touwata, "Tokomada ei teya nanola um kwava. Sena tominibwaina tau." "Ambeisa tolela?" I keibiga sola, "O dabwana kai i sisu. Ei wa vivila i dou, i busi i meiki o uula kai. I kauisi, i gegegilasi kasi ulia. Bogwa i lalavi i ma. I siwaga tau.

Beisa uduwada katoula um kwava. I tutu wowola tau taga gala i katoula." I kanasipu tau.

I kwayavi i luwawala guyau, "Lei mwa kabulutala Povalatu, lei mwa kabulutala Makuwa, lei mwa kabulutala Kweluyelu. Nabwaya ku teyasi ula waga, makaina kilimo wa sopi i toto. Nabwaya bi kapusi." I masisisi. Lei yam gabogi i simatasi kema, i losa, i lokeisa kai kaiveaka wa sopi i toto, i teyasi. Tateyasi bogwa bi kapusi. I kasawa kala tavila, i lalola makaina kai, i lalovagasi. I teyasi, i tateyasi bogwa i towiwitu, kai bi kapusi. Matouna tau i katubiyasi la guguwa. I lau masisisina kai i sisipwasi, i seiwa la guguwa. I suvi i la o kala nobwala i kanamwa.

Kai bogwa i kapusi, i katupwi mabwana kai deli tomota, i la o bwarita i beu. I simweisa i teyasi waga makaina. I taisa kaila i wokuva, i taisi sisila i nausa komwaidona. I titaisi i wokuva, i keibiga guyau, "Sasopa yokwa la touwata guyau. Kaina kwaitala la valu?" I keibiga matouna tau, "O dabwana wala kai la valu i sisu. O tataisi. Gala." I beu mabwana kai, i bebeu o bwarita.

Bwaina i bebeu. I tavina i meya wa dom i bebeu. Bogwa i totila ninasi guyau toya bwadala. I neneisa gala. I beu. I beu Kavataria. Kayasa Kavataria i kakayasi, i giseisa i beu mabwana kai. Ei meya i keibiga kadala guyau, "Igau a weiki ula kabekun# mabwana ba lau." I kau. Sena mwau i lai. I vavagi tabula latula guyau, "Igau ba wa a lupi, bita lawa o kabekun#." Douli bogwa i gisi vivila naminibwaina. I lupi i gagabila. I valaguva i lau o kabala, i seyeli, kala kabekun# i seiwa.

Ei bogi i losa i mwaiyunisi o bikubeku. I sunapula matouna, i meiki kala bua, kala maya vivila. I siwa i kaui. I kaui i wokuva lei mwa vivila i meiki kala bua kala maya. I meiki i katu-poi beisa tabula, "Availa i kaui agu bua, la

seimwa o kabekun#?" "Gala ba kaui. Ai seiki availa i kaui." I masisisi.

Ei yam makawala i losa i kalibomsi wosi, i sunapula Douli, i meiki vivila kala bua. I kaui i wokuva, i kau kala maya i wokuva. I gigiu lopola bwala, i suvi i la o kala nobwala, i kanamwa i masisi. Kalibom lei ma menana vivila, i katupoi, "Tabugu, yokwa kwaui agu bua?" I yakala tabula, "Ai seiki, yaegu tobwaila yaegu." I vayala i masisisi.

Ei yam i meiki giula i giu wa bwala. I keibiga menana vivila, "Availa i gigiu ula bwala?" I vayala. I kwayavi i luki tabula, i keibiga, "Ba la a kalibom, ku sunapula ku ma ku yausa ula bwala." I la i kalibom tabula. I sunapula tabula i la o mitukwabu i sisu. I sisu i kapwana kai mabwana. I sunapula tau i meiki vivila kala bua, kala maya. I siwa i kaui. I kikau i wokuva, i suvi i la o kala nobwala, i masisi.

Kalibom tabula lei ma, i dou tabula, "Ku ma a lukwem, buku waga ku masisi." I sili tabula i keibiga, "Ku doki availa i kaui kam bua. Bwatata kai kurseiwa kam kabekun#, ya keka kala nobwala tau matouna. A sisu a lagi i kakupwana kala nobwala, la ma. A lagi i katubababili yaguma, i kaui. I kaui i wokuva i suvi wa kala nobwala. A mwaga a masisi. Nabwaya ku la kwatusiki, ku kweiita ku ma, o taboda ku tola."

I bogi i la i mwaiyuni toya bwadala, i luwai livala makwaina, i keibiga, "Bwadagwa gida geda lopogu, ba la a masisi." Kalibomsiga i mwawasi bwadala. I valaguva i ma, i toli o taboda, i lagi tau i kakupwana kala nobwala. I sunapula i meiki kala bua, kala maya. I siwa i kaui.

I sowali. I ulemwa bwala vivila, i weiki tau, i kikau. I yowaisi, i yowaisi, i yowaisi, bogwa i masisisi. Ei yam i kanaweisa wa bwala. Kalayuweila i yowaisi. I katupoi tamala, "Tuwamiga?" I keibigasi bwadala, "Gidageda lopola, i masisi o la bwala." I ulemwa bwala tamala, i weiki kasi taiyu tau i sisusa. Tau tomitawasi i bani latula.

I kwayavi i luwawala tamala, "Nabwaya gugwadi ku meyakeisa kaitala kabudoga, ku wauwoulasi youyu, ku vagisa la buneyove latugu, bi sunapula i dau matala." Ei yam kala tau kabudoga, kala tau youyu i wauwoulasi. Kala tau kivi i meyeisa, i papapasi i wokuva. I katubiasi sola la kwava i wokuva, i keibiga vivila, "Ku sunapula tomitawasi yokwa, gala. Ku sunapula tolivalu yokwa, bi gisem."

I kugwa vivila i teta i sili. I sunapula tau i teta i sili. I katugogovasi komwaidona valu. I yakaulasi tau kaitubwatubwala. "Amtolela?" I keibigasi selaya, "O lopola kabilabala i sisu." I keibiga kadala guyau, "Yaegu a lupabogwa, a doki bawmaw, a lai. Lei wa tabugu, i lupi i doki bogwa gagabila, i lau." I keibiga tabula, "A laugwa kala nobwala la mwala. Yaegu a simwa."

I vai kadala guyau, i siwa Kavataria Douli.

(Ai seiki avails lei kukwanebu)

Touler

Malabu guyau O-Marakana mei sikeisa latula guyau kadahavuguyau taiyu vivila. I luki tamala i keibiga, "Ku kwaliyai ma bwala kama taiyu tabugu." I kaliyai bogwa i wokuva, i losa Kwaibwaga, i katu-yausasi. I masisi tauau. I masisisi, ei yam i sikeisa vaiguwa latula guyau, tabula inia i mapusa. I meisa i silisa o si valu, i masisi. ei yam.

Ei yam i kakayasi, i keibiga i luki tabula, "Ta mwa ta katuyausa Liluta." I losa i meisa taiyu tauau, i vakolisa i lausa i masisisi. Lei yam i mapusa tabula bua, vaiguwa. Sola i mapusa kaula. I gebilasi i lausa o si valu. I suvisi i sagi vaiguwa tabula, menawena i seili kaula o lopola bwala. I masisisi i kwayavi. I losa i kakayasi. Si pwaiewa kapugula wala.

Ei yam i tokayasi i losa Tobowada, i kapugulasi. Ei meisa taiyu tauau i vakolisa, i lausa i masisisi. Ei yam i mapusa tabula vaiguwa, sola i velugwasi kaula. I gebilasi i meyeisa o si bwala. I suvisi i sagi sola vaiguwa, sola i tasewa kaula o sikwawa. I masisisi.

Bogwa i lalavi i losa i kakayasi. Lei meisa i putumasi, i sobasi. I tokayasi i losa Yalumgwa. I kalobusi, i meisa taiyu tauau, i lausa i masisisi. Ei yam gabogi i mapusa tabula vaiguwa, sola kaula wala.

I masisisi i wokuva ei yam i tokayasi, i sobasi, "Bitu la Teiyava ta katuyausa." Teiyava i laisa kuyu. I meisa i vakolisa vivila, i lausa o si bwala, i masisisi. Ei yam i mapusa tabula mwali, bua, samakuku; sola, menana kadala guyau i mapusa inia. I gebilasi i losa O-Marakana.

Ei yam i luki tabula i keibiga, "Nabwaya bita

la Tukwaukwa, ta katuyausa." I kakayasi i wokuva, i putumasi, i sobasi, i losa Tukwaukwa. I kalobusisi i tolisa. I meisa taiyu tauau i vakolisa i lausa o si bwala, i masisi. Ei yam i katuvilugisa vaiguwa, dogo, mwali. Katubababili i sakeisa tabula. Sola i sakeisa inia. I losa O-Marakana.

Ei yam i tokayasi i kakayasi, i tokaya inala luleta guyau, "Ba la a gisi si bwala litugwa." I ulemwa bwala, i weiki umdawali i ulasi. I ulemwa bwala sola, i weiki vaiguwa, mwali, dogo, kaipwesi, beku o kabala i kasewa. I siwa inala i gabi kaula. Inia boge i pwasa, i la i lai o la odila. I wini la bwala latula, i wini i wokuva. I la i sulu bulami. I sulu i wokuva, i siwa i yopwi makapwana bulami. I kapwali i lasoya. I kanukwenu. Ei ma latula i luki, "Nabwaya buku la wa luma, ku kakayasi. Kakaya bi wokuva ku kugwa ku loki la sinata. Ku meya ku sinata. Ku gisi bi ma, ku lai la sinata bi la o bwarita. Ku luki bi luwa, bi loki i kau la sinata."

Bogwa i kakaya i wokuva lei wa tabula. I kakaya i valaguva, i meiki la sinata. I sinata kulula. I vanoki kakaya tabula i valaguva, "Ku meya sinata a sinata." I kipwasa tabula sinata i luki, "Ku luwa ku kwau um sinata." I keibiga sola, "Ku weiki ku meya ula sinata." I keibiga tabula, "Ku weiki." Bogwa i peula tabula, i tobusi i luwa i kau. Bunama tabula i kipwali, i busi i loki tabula. Gala i kounapula, i vatilawa O-Myuwa. I weiki taitala vivila i sisu i masisi.

I maga tabula, i katupoi kadala, matouna guyau, "Tabumgwa?" Ei keibiga sola, "Bogwa ei lausa tauau o la odila, la maga." I keibiga, "Ku sasopa. Kaina avaka ku vigaki?" I losa i neisa. I neneisa o raibwaga. Gala. I neneisa o haleku. Gala. Bogwa i totila nanola inala i valam. I valamsi sola, lubeila. Si tauau i losa i neisa. I wolasi, i ulawolasi, i giseisa umseu makwaisina valu Kitava. I katupoisa.

Gala. I wolasi Iwa, i katupoisa. I yakalasi. I wolasi Kwewata, i katupoisa. I yakalasi. I wolasi Gawa. I katupoisa. Gala. I wolasi O-Myuwa, i tolisa i giseisa umseu kwaitala simla. I sisusa kasi taiyu lubeila. I wolasi i lokayasi. I ulawolasi i tala-laguvasi. I valaguvasi i wakeisa i sisussa. I you-sasi kasi bulukwa i kamsi. I koumli kasi bulukwa, i weisa tauau i silisa, "Availa i lukweimi luku meisa?" "Gala nanoma wala." "Ka wola laka ma."

I yayisa kasi bulukwa i kamsi deli tauau. I luki sola menana Im-Myuwa, "Kaitala kami kaboma som um mwala, kaitala yakama kama taiyu ula mwala." I kamsi bogwa i kwayavi. Kwaitala si bwala sola la mwala, kwaiyuweila si bwala sola la mwala. I kenusi. I keibiga tabula, "Ta masisisi, bi kanitavila tau bi ~~keipapeigu~~ *keipapeigu*." I masisi i kanitavila tau i keipapi vivila. I dou menana vivila, "Avaka i keipapeigu?" I keibiga bwadala, "Bubunela Kilivila. I kanitavila tau buku yobubusi, i tokaya tau bi keya." I dou, "I sikeiligi" *I sikeiligi* "~~Bwadagu i koma matagu~~." I keibiga bwadala, "Bubunela Kilivila. Bi sikeilim, desi." I kanitavila tau, i kuku matala. I dou, "Bwadagu i koma matagu." "O beisa bubunela Kilivila bi kuku matam." I kenusi i kanitavila tau i kimali. I dou, "Bwadagu, bi ki-maleigu." I keibiga bwadala, "Bubunela Kilivila bi kimalem. Desi. Sena bwaina." I tokaya la mwala, "I kabi wowogu." I keibiga bwadala, "Bubunela Kilivila, bi kabi wowom sena bwaina."

I masisisi ei yam. I mamatasi i yousisa kasi bulukwa. I yalisa, i seilisa i kumlisa deli si mwala. I kwayavi i yavisi kasi i wokuva. I livala bwadala, i keibiga, Nabwaya ku vagi kaula, ku yousi bulukwa a kamsi baka losa.

Ei yam i yousisa bulukwa i kavaisa kaula, i gabusa mona. Boge i busi i yam i keidodigasi kasi mwali, kasi seyakwa, kasi muligalegisa, si vaiguwa.

I keidodigasi boge i wokuva kaitala si waga,
 bwadala la waga makaina i silasa. I wolasi kasi
 yam kasi bogi. I ulawolasi i bogi Iwa i masisi.
 Ei yam i tabusisa i wolasi Gawa i masisisi. Ei yam
 i wolasi Kwewata i masisisi. Lei i wolasi Kitava
 i masisisi. Lei yam i wolasi i kotasi Kaulakuba
 O-Marakana o kawalawa i valaguvasi.

I valaguvasi i wakeisa inala i masisi, i
 vagulisa. "Availa yokwa?" "Yaegu Malabu." "Kaina
 ku sasopa?" "Gala. Yaegula. I ulemwa bwala inala, i
 suvi i siwa. I valam inala? "Avaka i valam?"
 "Malabu bogwa lei ma latula."

I manum lopola kadala, i simweisa O-Marakana.

(Tovileu i kukwanebu)

Torileu

Kaileula i sisu kasi taiyu tamala latula. Latula sena tominibwaita. I gisemwasi bwagau i bu-gausa. I kariga matouna tominibwaina. Yagala tau Biyalelo. I valam tamala, i valam, i valam. Sena i tutu wowola latula. I takasi vaiguwa. Kasi luwa-tolu vaiguwa i didagi wa waga. Magila bi tamapu latula. I wola, i ulawola Kaisiga i kota. I vina. "Biyalelo Ta Biya Biyalelo Beisa Kala Tamapu Biyalelo Ta Biya Biyalelo."

I katubulisa latula Lilewaga. I kakaya i wokuva, i putuma i wokuva, kala wakala o kiseya i teya. I katububulisa i wokuva i vabusiyeisa i tolisa o kanukenuva, i lukweisa tamala, "Ku gisi, beisa migila latum." I koana tamala i gisi i keibiga, "Kwemaneso Kwemaneso Natuna Guyau Sena Wanau Wadona Patata Kimwana Sisebuni Kununa Kwemaneso Natuna Guyau Ba Wonaga."

I wola Bwalasi. I vina, "Biyalelo Ta Biya Biyalelo Beisa Kala Tamapu Biyalelo Ta Biya Biyalelo." I katububulisa latula Teyakayaka. I vabusiyeisa i katupoisa, "Ku gisi, beisa migila latum?" I keibiga tamala, "Kwemaneso Kwemaneso Natuna Guyau Sena Wanau Wadona Patata Kimwana Sisebuni Kununa Kwemaneso Natuna Guyau Ba Wonaga."

I keimalisa i wolaga. Kauteiyava i kotasi. I katububulisa latula Bukoya. I vabusiyeisa, "Ku gisi, beisa migila latum?" I koana i gisi, i keibiga, "Kwemaneso Kwemaneso Natuna Guyau Sena Wanau Wadona Patata Kimwana Sisebuni Kununa Kwemaneso Natuna Guyau Ba Wonaga."

I keimalisa. I wola. I ulawola O-Yuveyova. I kota i vina, "Biyalelo Ta Biya Biyalelo Beisa Kala Tamapu Biyalelo Ta biya Biyalelo." I katububulisa latula Molubida. I vabusiyeisa. I keimalisa.

I wola i ulawola Maku. I seiki, "Bialelo Ta Biya Bialelo Beisa Kala Tamapu Bialelo Ta Biya Bialelo." I katububulisa latula Kaiwayugwa, i vabusiyeisi. "Ku gisi migila laki latum." I koana i gisi i keibiga, Kwemaneso Natuna Guyau Sena Wanau Wadona Patata Kimwana Sisebuna Kununa Kwemaneso Natuna Guyau Ba Wonaga."

/ Inkhikhi
I wola i ulawola Kikia i kota. I katububulisa latula Mosilibu. I vabusiyeisi, "Ku gisi beisa migila latum." I koana i gisi. "Kwemaneso Natuna Guyau Sena Wanau Wadona, Patata Kimwana Sisebuni Kununa Kwemaneso Natuna Guyau Ba Wonaga."

Ku
I wola i ulawola Obulaku i kota, i vina, "Bialelo Ta Biya Bialelo Beisa Kala Tamapu Bialelo Ta Biya Bialelo." I katububulisa latula Tabibila. I vabusiyeisi, "Ku gisi beisa migila latum." I koana i gisi i keibiga, "Kwemaneso Natuna Guyau, Sena Wanau Wadona Patata Kimwana Sisebuni Kununa Kwemaneso Natuna Guyau Ba Wonaga."

I wola i ulawola Gilibwa i kota, i seiki vinavina, "Bialelo Ta Biya Bialelo Beisa Kala Tamapu Bialelo Ta Biya Bialelo." I katububulisa latula Medala, i vabusiyeisi, "Ku gisi beisa migila latum." I keibiga, "Kwemaneso Natuna Guyau Sena Wanau Wadona Patata Kimwana Sisebuni Kununa Kwemaneso Natuna Guyau Ba Wonaga." I valigaisa.

I wola, i gisi Kitava bwaula. I tabusi Kitava i vina, "Bialelo Ta Biya Bialelo Beisa kala Tamapu Bialelo Ta Biya Bialelo." I kota Kitava i katububulisa latula Manayewa. Tau i kalobusiyeisa, "Ku gisi beisa migila latum." I koana i gisi. I gisi i wokuva i yabi, "Kwemaneso Natuna Guyau Sena Wanau Wadona Patata Kimwana Sisebuni Kununa Kwemaneso Natuna Guyau Ba Wonaga."

I wola, i ulawola Iwa, i vina, "Bialelo Ta Biya Bialelo Kala Tamapu Bialelo Beisa Kala Tamapu Bialelo Ta Biya Bialelo." I kota Iwa i katububulisa

latula Deyoiga^u, i meyeisa i toli. I koana i gisi i yabi, "Kwemaneso Natuna Guyau Ba Wonaga." I wola, i ulawola Kwewata i kota. I katububulisa latula Bwoigelu. I dobusiyeisa. I koana i gisi, "Kwemaneso Natuna Guyau Sena Wanau Wadona Patata Kimwana Sisebuni Kununa Kwemaneso Natuna Guyau Ba Wonaga." I keimalisa.

I wola, i ulawola Gawa i kota, i vina, "Bialelo Ta Biya Bialelo Beisa Kala Tamapu Bialelo Ta Biya Bialelo." I kota i katububulisa latula Yolaba. I dobusiyeisa i toli, "Ku gisi beisa migina latum." I koana i gisi i keibiga, "O Kwemaneso Natuna Guyau Sena Wanau Wadona Patata Kimwana Sisebuni Kununa Kwemaneso Natuna Guyau Ba Wonaga." I gisi Omyuwa i kebobu.

I wola, i ulawola Omyuwa i kota. I katububulisa latula Kwalisalesa, i vabusiyeisa. I koana i gisi. Makawala migila latula. I gigisi boge i wokuva, i gabi vaiguwa, i lau beisa tamala. I vilasi si vaiguwa Kadala, tabula, veyala komwaidona. I wokuva si vaiguwa, i keibiga tamala, "Igau nabwaya ba yousi latugu kala kamtulai."

Ei yam i mtuli bulukwa. I gubugabusa mona. I sulusulusi boge i menu. I lubasi i la o kumkumla, i kumli. Lei yam i keidodiga sola latula. I wolasi kasi yam kasi bogi, i kotasi Kaileula. I valaguvasi sola latula, i losa o si bwala. Bogwa i mapu latula i siwa.

(Tovileu i kukwanebu)

KALAUWATA

Tovila

Vivila Kalauwata, tau yagala Magibweili, si valu Kavataria. I vai Kalauwata matouna Magibweili. I simweisa i ~~valu~~ suma la kwava. Boge i vatusa sekeula, bogwa lopola e veaka, i livala Kalauwata i keibiga, "Nabwaya ta wota kaikwala." I masisisi.

Ei yam i silasi wa waga, i kawalasi. Bukwaiga i kotasi. I kotasi i sisu la kwava wa waga, i keibiga, "Ku sisu ba waga a wota kaikwala." I la i keula la kema, i la i wota, i vivisi kaikwala. I kuna. La moi gala i kau menana. I sakauli i la la kwava, i sisu wa dubwadebula. I tupwepuni peila kuna.

Menana Dokinikani i sisu o lopola dakuna. I sisu i gisi kaikwala, i keibiga menana Dokinkani, "Kaina taitala tomota i sisu o kaukweda." I kuna. I tokikita i toli, i gisi kaikwala. I keibiga, "Kaina tomota?" I luki dakuna, "Ku kapwagega." I gisi ei toto, i katupoi, "Avai vila yokwa?" "Yaegula Kalauwata, kamateiyu ula mwala." I keibiga Dokinikani, "Ambeisa lei mwa um mwala?" I keibiga Kalauwata, "I wota kai." I keibiga Dokinikani, "Ku suvi ku ma, ta simwa wa bwala." Igau i kuna. Buku loki um mwala buku losa."

I keibiga, "Ku sili iggu ta kayaku. Igau bi dodewa." I suvi Kalauwata i sili. I keibiga Dokinikani "Avaka ku suma?" I keibiga Kalauwata, "A suma." I keibiga Dokinikani, "Beisa kam kwasi, ku vilili, ku meya a simkwali." I vilili i seiki. I keibiga Dokinikani, "Ku gisi i kwaneigu. Kwana Kwanakwaneigu Kwaneigu."

I keibiga Dokinikani, "Beisa kam paya, ku vilili, ku meya a simkwali." I piya i seiki, i takasi i la o teigala Dokinikani. I luki Kalauwata, "Ku gisi

i kwaneigu." I keibiga Kalauwata, "I kwanem." I keibiga Dokinikani, "O kwana kwanakwaneigu kwaneigu."

I keibiga Dokinikani, "Beisa kam kuwa, ku vilili, ku meya a simkwali." I vilili i seiki. I keibiga Dokinikani, "Ku gisi i kwaneigu." O Kwana Kwanakwaneigu Kwaneigu." I gisi kala tuwetuwa, "Ku vilili kam tuwetuwa, ku meya a simkwali." I vilili i seiki. I vilili i la o yamala Dokinikani, i keibiga Dokinikani, "Ku gisi i kwaneigu. O Kwana Kwanakwaneigu Kwaneigu." I gisi kala saveva, "Ku meya a simkwali kam saveva." I seiki i simkwali, "Ku gisi i kwaneigu. O Kwana Kwanakwaneigu Kwaneigu."

"Ku meya kam sedabala a simkwali." I vilili i seiki. I sipu Dokinikani i keibiga, "Ku gisi i kwaneigu. O Kwana Kwanakwaneigu Kwaneigu." I keibiga Dokinikani, "Kam sekeula ku meya a simkwali." I vilili i seiki. "Ku gisi i kwaneigu. O Kwana Kwanakwaneigu Kwaneigu."

Bogwa i vinau la guguwa. "O ku meya um biga ku sakeigu." I kau la biga i seiki. I tokaya Dokinikani, "Lei wa ula biga, um biga ku sakeigu bogwa la meya."

I dodewa i dou la mwala, "Kalauwata ku ma bita la. Bogwa la vanoki keddodiga, ku ma ku sili bita la." Kalauwata i luki Dokinikani, "E, ku meya ula biga, ba loki ula mwala, baka la." I keibiga Dokinikani, "Teivila um mwala." I keibiga Kalauwata, "Yokwa Dokinikani yokwa, ba loki ula mwala." I vataisi. Menana Kalauwata bogwa i vagi Dokinikani, Dokinikani menana i vagi Kalauwata. La guguwa, la biga, migila bogwa lei seiki. I tokaya menana Dokinikani i bibiu sola i mweimwa i mweimwa.

Menana Dokinikani i sakaula wa waga i sila, i keibiga, "Kwaliyagila bita la." Ei vagi menana Kalauwata. Kalauwata i valam o kwadewa, i keibiga, "O Magibeili um kwava yaegu, menana o ku weya Dokinikani. I keibiga menana Dokinikani, "O ku weiya bi la."

I vabusi matouna Magibweili, i la i waweia.

I meiki kaikwala boge i lupwali Dokinikani. I koma sitana tabuya, silagim i lupwali. I keita Magibweili, lei i sili wa waga. I katupoi, "Taga Tabuyaga!" "Bogwa kaisai i kodidaimi, lagim bogwa i katulilai."

I totolasi. I valam Kalauwata, i vayali. I meisa Bouli. I keibiga Kalauwata, "Magibweili o ku weya Dokinikani." I keibiga Dokinikani, "Ku la ku weiya i kadabuma biga." I vabusi Magibweili, i kau kawala, i la i weiya. I waweiya i valam. I maga i sila wa waga. I vayali Kalauwata.

I meisa Kumwag^odu. I dou mena^a Kalauwata, "O Magibweili ku ma ku didageigu bita wa. Menana ku didagi Dokinikani." I keibiga Dokinikani, "Ku kwau kawala, ku la ku weiya." I vabusi i la i weiya. I waweiya i katumati bogwa bi kariga. I biya i weya o kwadewa i kanawa. I vabusi i sila o la waga.

I tolasi, i meisa o valu Mulusaído. I tapelasi kaikwala. Tapelasi i wokuva i simweisa wa bwala. I kanawaga menana Kalauwata o kanakenuva i kan^akenu.

Menana muluveaka i toto wa kai meku, i gigisiga i waweiya. Bogwa i kariga menana Kalauwata, boge i losa Magibweili toya sola, i talakapusi menana muluveaka. I siwa. I peli. I peli i wokuva i mamata menana Kalauwata. I katupoi muluveaka, "Avaka peila lei wem?" I keibiga Kalauwata, "Kaikwala i la i wota, a tolaga. I kuna, o dubwadebula we la bwala Dokinikani a sisu. Lei ma Dokinikani, agu kwatububula bogwa lei kau, la biga i sakeigu, migila i sakeigu, migigu lei lau. Ula mwala i lau Dokinikani la kwavaga. A simwa."

"O bwaina!" I lau wa kai, i sewa. I la i

papoula kala inia. I lau i sulusulu i kamkwami. Bogwa makawala latula i vigaki. Sisusa i valulu Kalauwata. I valulu tau. I nununu i wokuva bogwa i visipwagi, bogwa i tomwaleta, i siweisa. Bogwa i vakila i sisusa. Bogwa i sakaula matouna monagwadi i sisusa. Bogwa i toveaka, bogwa i ulatila, i sisusa.

I ulatilaga matowena tamala i kayasa kala viluvi waga kaiketoki. I kokewasi matouna Tomnakawala (Peila i weiya inala kawala. I valulu i doki Tomnakawala yagala) i lagi i gogovasi Kavataria. I luki tabula, "Ba lokaya a gisi kayasa." I keibiga inala, "Gala gagabila buku lokeiya. Bitu sisu wala o du valu Kumwagudu." I sisusa.

Ei yam i lagi katugogova. I luki inala, "Ba loki a gisi i kokewasi sewa segwaya." I keibiga inala, "Ku ligeiwa bitu sisu. Igau bi tagwala muluveaka buku la ku gisi kayasa." I buyayu matouna gwadi, i siweisa.

I papoula tabula muluveaka, i meya kasi inia. I sulusi i kamsi, i katupoi muluveaka, "Avaka tabugu i livali." I keibiga inala, "I doki bi la i gisi kayasa." I keibiga muluveaka, "Ku meya ku teya um waga. Boglu buku lokaya." I loki, i teya i meya, i seiki tabula. Tateya i wokuva i luki la laya. I meya i basi i wokuva, i ginoli la waga. I ginoli i wokuva i keibiga, "Igau ku sisu. Nabwaya buku la ku kewa."

Bogwa i katububula tabula waga. Ei yam MiKavataria i tamwasi i losa o buyagu, i wona i loki o valu, i suvi wa bwala, i kau kala buna tabula, kala kaisapi, kala kwasi, kala tuwetuwa, kala wakala, i lau i sewa.

Ei yam i ginoli la waga. Ginoli i wokuva i simwa, i kakaya. Kakaya i wokuva i putuma. I katubiyasi kala buna i sikoma, kala wakala i sikoma, i vilili kala kwasi. I vilili kasi tilauwa i wokuva. I kau kala kaisapi i sipu o yamala. I kau kala bunadoga i lulubwadi kaikela. I kau kala sedabala i sipu wa dabala. I tobusi i vabu

I vabu tabula i keibiga muluveaka, "Buku la ku kewa. Buku lai um waga bi sakaula, kwatugogova kawam," O Tomnakawala Waga Katanadesi." Bi sakaula buku livala kawam, "Weigu Tomnakawala Katuvileigu Tomnakawala Katutaneigu Tomnakawala O Katanadesi Waga Tomnakawala."

I sakaulisa, i la monagwadi i kau la waga. I keitasi i meisa i todelisi, i kilaisi tuveila, i vina monagwadi matouna, "O Weigu Tomnakawala Katuvileigu Tomnakawala Katutaneigu Tomnakawala O Katanadesi Waga Tomnakawala." I sakaula i la i kau.

Matouna Magibweili i sisu i gisi, i keibiga, "Avai tau matouna i sakaula la waga?" I keibigasi gudisi Kavataria, "Aiseiki tau tomitawasi. Aiseiki ambeisa mei siki. A tolisa i kilai la waga, ei vina kawala kala vinavina, "Weigu Tomnakawala Katuvileigu Tomnakawala Katutaneigu Tomnakawala O Katanadesi Waga Tomnakawala."

Magibweili i la i kau, i keibiga, "Amtolela?" I keibigasi gudisi Kavataria, "A la keda me toya o kwadewa lei ma." I luwawala tamala i keibiga, "Nabwaya ku ginolisa mi waga, ku vabusisi komwaidona tomota. Ku leyasi kala kabiliya bi ma. Ku kewasi, bogwa bi sakaula bi ma, ku yousisa. ku meyeisa ba katupoi."

I ginolisa si waga, i luki tabula, "Ba lokaya segwaya, ka kewasi." I keibiga inala, "Ku simwa. Igau kwaitala yam buku loki." I keibiga, "Gala. Bwaina ba lokaya lageila, ka kewasi." I ginoli la waga. I ginoli i wokuva i simwa. I katubiyasi. I sikam kala wakala. I putuma i wokuva i lulubwadi kaikela bunadoga. I keibiga inala, "Buku la ku kewasi, ku weiya kam yausa bi bwaina. Ku kewasi pwala mitasi ku vapwala. Ku ma o du valu, bi simweisa."

I ma i meiki selaya, bogwa i kokewasi, i

keibigasi, "Sodayasi lei ma." I tomasi, i kilaisi waga i sakaulasi. Ei vina matouna monagwadi, "O Weigu Tomnakawala Katuvileigu Tomnakawala Katutaneigu Tomnakawala O Katanadesi Waga Tomnakawala. Kaitinidesi ba la ba kau." I la i kau.

I keitasi, i meisa i tolisa, i kilaisi. Kaitinidesi la waga Tomnakawala, i la i kau. Bogwa i vanowasi kaikokewa. Mwada bi valaguva bi la, i weiki kabiliya i totasa. I bokovilasi, i meyeisa i tobwadisa matala, i mweyeisa i tobwadisa matala. I mweyeisa ei wata teitala i keipapi, i yousi, "Kwivalei u, ba loki tabugu." I keibigasi selaya, "Ta lokayasa guyau, bi katupoim kedala um waga i sakauli."

I lausa i lokayasa Magibweili i sisu o kabudoga, i keibiga, "Ku meyeisa beisa, i livala ba lega." I pela i sili o kabudoga, i livala Magibweili, "Gala avaka ba vigakem, a katupoim ku livala ba lega, i keibiga monagwadi, "Inagu Kalauwata, i sisusa kasi-teiyu la mwala. I suma. I losa i wotasi kaikwala. I utawota la mwala, inagu i sisu wa waga. I kuna. I la i tupwepuni o raibwaga we la bwala Dokinikani. I ulemwa bwala, i suvi inagu, i weiki Dokinikani i siwa. I tapeli la gugwa i seiki Dokinikani, migila, la biga. komwaidona i seiki Dokinikani. La biga Dokinikani i seiki inagu. La mwala i didagi Dokinikani i meya. Inagu i valam. Matouna i kau kawala i la i weiya inagu. I waweiya i katumati. I kariga i kanawa o kwadewa, i maga i didagi Dokinikani, i meya i doki la kwava.

"I kanawaga o kanakenuva, i toto muluveaka i gisi, i kariga i kanakenu. I siwa i peli, i peli i mova inagu. A siwa wa meku Kmwagadu, we gu valu kamateiyu tabugu inagu i sisusa. A lagi ei kokewasi. Ei bubuli ula waga tabugu. La ma a kavakewa, inagu i sisu."

I keibiga menana Dokinkani, "Taivila latum ku lilivalasi i takuluku'u wa bwala i sisu?" I keibiga Magibweili, "Bitu kanamwa." I keibiga matouna monagwadi, "Gala, kwivaleigu. Ba loki tabugu a siwa o ma valu." Magibweili i yusi latula i kanamwa deli litula.

Inala tabula i masisisi. I kwayavi i luki Magibweili menana la kwava, i keibiga, "Kwau agu kwauya, ku meya a kaui." I keibiga Dokinikani, "Latula soda toudawada gola." I kau kasi kauya, i keibiga la mwala, "Ku sila beisa." I pela vivila, i sila i kauisa. Bogwa i wokusa, matouna i luki latula, i suvisi wa bwala. I sisuga menana Dokinikani o kabudoga.

I lau latula i kanawa wa bwala. I sunapula Magibweili, i meiki la kwava i sisu. I yousi o kaitaula, i kosikili kabudoga. I kapusi vivila i la o pwaipwaya. I katuvi lopola i tayelu kaikwala, tabuya, lagim, komwaidona i lupwali. I tayelu o lopola i mwa i kanamwa. I kariga menana Dokinikani.

Guyau i luki bwadala, "Ku biasi ku lausa, ku bakusa. Nabwaya ba la a vakola ula kwava ba meya." I keibigasi sala, "Yokwa Magibweili um kwava ku luveiwa, ku dodigaga Dokinikani, ku meya ta dokeisa Kalauwata. Kweovau susuma bogwa i valulusa, menana kwebogwa bwaina i sisu. Kaigi! kaikwala, tabuya, lagim i lupwalopula wala. Ta dokeisa nasusuma. Kaigi Dokinikani."

Ei yam i tokaya Magibweili i la Kumwagudu, i luki muluveaka i keibiga, "Bogwa la sinapu Dokinikani, boge i kariga. La maga a vakola ula kwava, ba lau. I siwa i vilakulia muluveaka, i koluluvi i meya o Kavataria, i sakeimwa la mwala.

I keibiga muluveaka, "Ku simwa, ba laga. Ba papoula inia ba kamkwam. Ba la wa salu. Ba mwa ba papoula ba kamkwam. Bogwa la meyeim ku sikeimwa um mwala. Manuwagu salu yaegu ba siwa ba papoula."

(Ta doki Tovileu i kukwanebu)

Tonlen

Mei sikeia Kailavasia Kaidola, bwadala komwaidona Kwepipisi, Kwevedaya, Koyonikwa, Ilaawiluva, Tobubusi Tomwamweina, i sisusa Kaidola. I yaulasi kasi sikula. I losa i laisa bwalodila. I gelaisi. Lei^{ma} bulukwa i wai. Ei weisa Kailavasia toya bwadala. I yousisa bulukwa i meyeisa, i kabwasisi i wokuva i kilisa kumkumla. I kamsi kakasili, i mweina Kailavasia, i la wa nату o dabana. I vadobulasi bwadala, i keibiga Kailavasia, "Bwadagwa, gala kaiyu MiTukwaukwa, gala kaiyu MiTeyava, gala kaiyu MiVeyova, gala kaiyu MiKavataria ku giseisa o lopola bwarita i loluwasi. Ku vadobulasi, ka lekweiaga- lokwaisaga kaitala kada lapisa gubala kada bulukwasi."

I vadobulasi bwadala i wokuva, i keibiga Kailavasia, "Ku kolekusi kawala, da wolasi, da gubasi, ta lokayasa sedayasa, ta luwasi." I kawalasi o miloveta, i laisa lola, i luki bwadala, "Ku luwasi, ba si-suga wa waga." I kapusisi bwadala i luwaisi, ei lolowasi boge i wokuva, i keibiga Kailavasia, "Ku silasa bwadagwa ku veiwasisa, ba luwaga. Tabwa ku kwausa lola. Bwaina bi tota ba luwa. Ba^u Mwama, Nubiyam, Kaulakoki, ba nei lapi."

I luwa gala. I la o bwarita i notetila i valutu Kaidola. I kamwainaguva i weiki kasi bulukwa toya bwadala, i siwa i koma. Kamkwam i vinau kwaitala debana, kwaitala yamana wala i kanawa o kumkumla. I biya i valutu o katala i kounapula, "O Bwadagwa a nenei lapi. Gala kwaitala a bani. A nenei wala. Gala. Kwaitiniges i wala guba a kounapula. Ta mweisa bwadagwa."

I kausa lola, i wolasi i valutusi Kaidola. I kota i valaguvasi, i keibiga Kailasia, "Ku yaisa bulukwa ta kamamei kamsi." I wakeisa boge i yeyasi, "O Kailavasia bunukwa bogwa lei yeyasi." "Woi! Ta simweisa...."

I kwayavi i leyasi kasi sikula. Ei bogi i wai bulukwa. Lei weisa ei yam i vakomasi, i kausa i meya i kabwasisi i wokuva, bi vado bulasi i mweina Kailavasia wa natu. Mwemweina o dabana i tola, "E bwadagwa! Gala Kaiyu MiVeyova, gala kaiyu MiKavataria, gala Kaiyu M'Obulaku o lopola bwarita. Gala bita keibiga! Nanakwa ku vadobulasi, ta makeisa kwaitala lapi."

I vadobulasi bwadala. "Kwausa da kawalasi, da wolasi." I silasi, i wolasi. I ulawolasi o Bunali i kota. I laisa lola, i keibiga Kailavasia, "Bwadagwa, tabwa ku kwausa lola." I luwasi bwadala, i loluwasi boge i wokuva, boge i kasewa waga? "Ku silasi, ku keikwalasi, ba luwaga." I silasi bwadala i keikwalasi, i luwa Kailavasia. I luwa wa waya, i valaguva Kaidola. I siviyuweila i yeyai bulukwa i kam. Kamkwam i wokuva i sewa debana, yamana. I sakauli i luwa, i valutu o si katala bwadala. I kounapula, "O bwadagu, gala kwaitala lapi a bani, a loluwa la ma. A momom yona, boge i kovelevala lopogu. Kwausa lola bita losa."

I wolasi, i kotasi Kaidola. I valaguvasi i keibiga Kailavasia, "Ku weisa ku yaisa bulukwa, ku meyeisa ta kamsi." I sakaulisa bwadala, i wakeisa kumkumla, bogwa lei yeyasi? "Tauau bulukwa boge ei yeya kaukwa ei koma. Kweitala debana, kweyatala yamana i sema." "O ku komasi bwadagwa, yaegulaga ba sisu."

I kabwasisi kasi lapi, "Ku losa ku leyasi kada sikulasi!" I losa i laisa, i masisisi. Lei ma bulukwa i wai. Ei yam gabogi lei weisa i vakomasi bulukwa, i weyeisa i meyeisa. I kabwasisi, i kamsi kasi kaka-sili. I vadobulasi, i mweina Kailavasia, i tola wa natu, "E Bwadagwa, gala kaiyu MiTukwaukwa, gala kaiyu MiTeyava, gala kaiyu MiVeyova, komwaidona o bwarita. Ku vadobulasi ta wakeisaga kwaitala kada lapisa."

I kolekusi si kawala, si wola, si guba. I vabusi i silasa wa waga. I laisa lola, i luwasi bwadala. I loluwasi i wokuva, i keibiga Kailavasia. "Ku silasi

60

"Tabwa ku kwausa lola. Ba la Mmwa, ba la Nubiyam, Ba la Nanoula, Kaulakoki, ba nenei lapi." I tulatulasi bwadala bogwa i towotu kalasia. I dokeisa bwadala, "Taga tuwadasi, kaina boge i koma kwau?" I tulatulasi boge i towotu kalasia lei wa, "O bwadagu a nenei lapi. Gala. A momom wala yona, e tubwa lopogu." I sila. Bogwa i wolasi, o kawalawa i kotasi, - gala makawala lageila. Bogwa lei yayasi sikula. Lei wa Kailavasia i waya. I kotetepina yamala, i waya kaikela. I keibigasi bwadala, "Woi, mwada aveila kamkwam kada bulukwasi. Kaigi! Kailavasia wala! Kawala, "O bwadagu kwamsi kami bulukwa, sitanaga yaegu. Yamana ku sakeigusi ba kam. O Kaipota wala! Ku kwau habowena bogwa ku koma beisa sitana yakamesa."

I kamsi bwadala. I kamkwamsi bulukwa i wokuva, i keibiga Tobubusi Tomwamweina, "Ba seiki sitana tuwadasi i kam." I seiki, i kam. I mwa i likusa kala sikula. I likusa i wokuva i tokaya Kailavasia, "Mwada yaegu la karaiwaga bita sisusa o du valu. Bogwa i sinapweigusi ba vili. Yokwa Tobubusi Tomwamweina, ku la ku mweina wa natu, Yokwa Koyonikwa ku wa o sisuna kwanukwenu, Yokwa Kwev~~2~~daya ku wa o tuwaga kwanawa, Yokwa Ilauwiluva ku wa kanawa kabilabala, yokwa Tokwaulakulega ku wa ku teteta o mitakwabula, yaegu Kailavasia ba kanala wa yakwala. Bi kikeiwosisa Mitukwaukwa, bi meisa i ninisi tapwagu, bi lausa i keiwosisa. Bogwa la vanoki karaiwaga.

(Kaina Tovileu i ku~~k~~wanebu)

TOBUTATALA

Inala kalamwaleta kasiteiyu latula i sisusa.
Tokosikuli la kwava teilima.

Menana deli latula i sisusa o la odila, i luki
latula inala, "Avaka uula la ta sisu o la odila? I
livala inala, "Peila Dokinikani tokamsi tau."

Tobutatala i kovisi la kayala. I meya, i tateya,
i sewa kaitala. I kasobusi i seiki si bwaima Dokini-
kani i kaliyaisi. Kayala i lowa wa tabu. I livala
Tokosikuni, "Avai tau yokwa?" I livala Tobutatala,
"Yaegu Tobutatala. Nanaku ku mweina kagu sopi, taga bi
lalai, bi keli mataru, bi giugwau."

I mweina Tokosikuni. I mwamweina i katulaguva
o dogina luya, i kipituni sopi bwaibwai. I livala
Tobutatala, "Ku kapusi ku ma ba kanumwasem." I kapusi
lei ma. I gili yamala Tobutatala. I waya o pwaipwaya.
I tokaya lei ma i geisi kala sopi Tobutatala, i mom.

I la o si valu sola inala, i kamkamsi.

Gabogi i tokaya, i kilai mitiginaiyu makaiwena.
I yoyowa wa labuma, i kasobusi o si valu Tokosikuli
deli la kwava. I wakeisa Tokosikuli i yowaisi. Bogwa i
kugwa Tobutatala. I keibiga Tokosikuni, "Mitiginaiyu
a kamkoma kayala, buku memaga." I lagi tamala kayala
i yowa lei ma, pilaiyu matala i doki kaiyu kayala.
I kubugi i waweya i katumati, i lokaya la kwava i kariga.

Tobutatala deli inala i meisa o si valu
Dokinkani la kwava i simweisa.

(Taitala i kukwanebu, kaina i liliu. Gāla ka lega bi
bwaina. I bigatona gola matouna i kukwanebu....

Tobutatala kwaitiniges i matala o dabala mei tokiya.
Gala bi livalasi Dokinkani peila i kokolasi, i seiki
yagala Tokosikuli.

Wadola Dokinikani kweveaka, taitala wala bi suvi, i
kapatu boge i tamwau o wadola. Kudula makawala
bulukwa kasi dogo, kasatala wa gabula, kasaiyu i se-
eili, kasatolu i sekeili, kasavasila o bilibalola,
kasilima kasatala o kabulula o talila. Tomota Dokini-
kani, toveaka makawala bulumakau)

Kamkoma tolela valu i vinaku, kamkoma vilela valu i vinaku, kalamwaleta i lisikupwani o la odila i sisu. I kuna i la i kenu o uula vadila. I bubusi litukwa i bwiki kala bulabola vivila. I suma. I valulu tau. I sumavau i valulu tau. I sumavau i valulu kuvivia, mauna.

I sisu matouna Dokinikani o guvagava, la valu o lumata. Menana kuvivia i lilolo o lopola valu, i tabunabonu. I livala inala, "A ku ma, yoku mauna yoku, mitaga yakamesa deli lumta tomota yakamesa. Mitaga bi giseidasi Dokinikani, yoku mauna yoku buku yowa, yakamesa deli lumta tomota yakamesa, bi komemasi Dokinikani." I sisusa inala, luleta i.....

(Mesinau wala mapana, gala bi livala i vinaku, kaina i lotumila ginigini)

Vivila naminibwaita senela, tauau Kavataria kasiteilima i sisusa. I keibigasi, "Ta kaliyaaisi da bwalasi." Kaliyaaisi i wokuva, i keibiga tomwaya, "Ba kewa, ba la ba gisi Vinaya wa koya.

I la i kewa. Kewakewa i kota kwaita simla. I putuma, i kakaya, i valaguva. I keibiga vivils inala, "Tai^{la}tau matouna lei ma." I keibiga Tobumyou, "Ku mwá ku putuma, ku meya kam luya, ku putuma um kili, ku meya a katumilasi wowogu." Matouna i keibiga, "Gala ba putuma, taga tokobwadi migigu." I keibiga Tobumyou, "Ku wa ku vapawa." I sakaula matouna, i lo-kaya menana naminibwaita. I keibiga menana, "Inagu taitala tau lei ma kala pawa." I keibiga vivila, "Mwa, avaka luku ma?" "Ei yoyuga butula Vinaya, la ma. A lega bulagam la ma, bita vai." I keibiga menana, "Kam pawa, a peiki." I keiita i la Kavataria.

Bwadala i keibiga, "Tominibwaita lei ma. I kau pawa." I keibiga bwadala, "Bwaina ku sisu, ba laga, a gini vivila." I kewa i la, i sakaula o la valu Vinaya. I vavagi inala Vinaya, i yamata o uula kai inala. Latula i sisu o pusagala yabiya. I keibiga inala, "Avaka peila luku ma?" I keibiga bwadala, "La meiki Vinaya." I keibiga Vinaya, "A peiki peila kam pawa, gala ba vem, ku kweilita um malu!" Tau i keitama i siwa Kavataria.

I tokaya bwadala i keibiga, "Yoku tomigaga yoku, bwaina ba la, ku sisu." I kewa i sakaula wa valu Tobumyou. I kakaya, i katuvi la luya. I sikikila wala Tobumyou, i luki, "Ku meya sitana um luya, ba katumilasi wowogu." I keibiga Tobumyou, "Ku luveimwa sesa. Um luya yamweidona ku putuma. Gala i yobwailigusi tuwami. Ku ma ba migai kaidobu, ba talilisi migim." I simwa i talilisi, gaga i luveimwa. Sena tominibwaita matouna. I keibiga Tobumyou, "Ba sisu, buku la."

I kewa. I kota o kawalawa inala Vinaya. I sunapula wa bwala i ma, i keibiga, "Mwa, luku ma. Latugu buku vai." I vaisi. I keibiga inala, "Igau ta kalatalasi. Ei yam i vilakulisi, buku losa o mi valu. I yayosasi bulukwa, bua i mweina i likulikusi." I keibiga, "Nabwaya bita lausa o si valu, i simweisa, bita meisa." I kewasi i losa, i meisa Kavataria. I sisu deli Vinaya.

Menana i kavikeiya bua bi kaui. I valam. I keibiga la mwala, "Sena kammwala bua." I kau kaitala si vaiguwa, i lau Lobua. I gimwali saluwalima, i meya i kam. Kaitala wala yam i kaui i-~~vinaku~~, kwaiyuweila yam i kaui, kwaitolula yam i kaui, kweivasila, kweilimela. I tulatula, i valam.

I keibiga la mwala, "Bwaina ba kau kwaiyuweila da vaiguwa, ba lau Bwoitalu." I lau. Saluwalima wala i meya i kaui. I kaui i yam i kaui i bogi, kweitolula yam, kweivasila yam, kweilimela i wokuva. I valam, i vina, "Vinaya Tonaya Pipi Pipi Lolo Kate Kateigu Seila Buwagu We Guna Waga Lageila Um Limli Kwa Teya Gea, Gea Kami Niu Gea Kami Magi Kwa Teya Gea." I valam i masisi, i lubulatoula i wokuva valam. I tokaya vivila i la o kawelawa, i sili wa waga, bi la o lu valu. I ulawola. I ulawola i la Mmwa. I lagi la mwala kaigala? "Ula kwava boge lei la o lu valu. I wola la mwala, i lokaya o tapwala bwarita. I keibiga vivila, "Bwaina ba sisu, i ma ula mwala." I keibiga la mwala, "Bitu keiita." I keibiga Vinaya, "Gala, boge la tapelasi. Bitu la o ula valu." I keibiga la mwala, "Bitu la."

I kotasi Dobu. I keibigasi, "O Vinaya boge lei ma." I katupoisa, "Um mwala?" I keibiga Vinaya, "Mitaga! Kamateiyu! laka ma."

I wotasi kai, i gabusa la mwala. I valam menana,

i keibiga, "Bwaina, boge i yogagisa ula mwala, boge
i gaga nanogu." I sakaula i lokaya, i kanala o
vitakoula la mwala, i gabu kova, i karigasi kasiteiyu
la mwala.

(Taitala i kukwanebu)

Topulupwalala mei sikeiya Obulaku, litula tailima, la kwava taitala. Wowola i pwananawa wala. Bi mom kala sopi i busimwa i busimwa. Yagala Topulupwalala i mom kala sopi i bubusi wowola, i gigilasi litula. I kam kala, i kalobusimwa, i gigilasi litula.

Ei yam i sulu la kwava, i menu, i yaya. I dou litula i meisa, i kamsi. I kamkamsi litula i kam tamala. I giseisa tamala i kam, i kanobusi kala i gigilasi. Ei yam makawala. Tamala i namamsa. I nanamsa i wokuva i keibiga, "Tugwa, Nabwaya ba teya waga, ta kewasi Dobu. Boge i gwegwesi woulda bagula. Ta losa Dobu, ta unasi yabiya."

I teya waga. I tutu i wokuva. I bwabu i wokuva, i lali i wokuva. I la i yai wayugo, i meya i kali. Lei yam i taisa kaidabala, i katuliluva la tabuza. Lei yam i vakasi waga. I vakasi i wokuva, ei yam i yoli. I yoli i wokuva lei mwa i la o bwarita. I tasasoliasi, i meyeisa i kotama.

I lukweisa inasi, "Ku kwavaya kada kwalaga, ba yova kabaliluva, bogiu ba kewa." Ei yam i kavaya kala la kwava. I meya i vakata i sulu. I popula kala lipopula, i luba i la o kumkumla. Kumkumla i vedobula, i masisisi. Ei yam i keidodiga. Keidodiga i wokuva, i luki litula, "Avai tau baka kewa?" I keibiga molitomwaya, "Yaegu bita kewa." I kewasi Mmwa, i gisi makaina butia, "E tuda, ku wa ku weya kam butia, bita lau bita giseisa ileši Dobu. Ku vai buku siwa" I vabusi latula i la i wawai kala butia. I sikeilaga matala tamala, i dobusi. I keibiga latula, "Meya a sila tamada." "A kaipota. Yaegu a kam, a mom, ku gigilasi. Lageila a sinapwemi." "O tamada, amakawagu?" "Gala, ku weiya minuwala kwayavi, ku weiya minuwala lubulatoula, o lilayam buka sapem." "Mokita." I kewa tamala, i la i simwa.

Latula i utu kai la kaikwaula. Luwatala i selava, luwaiyu i meya i seili. Ei bogi i weiya minuwala kwayavi. I waweiya i katusau simwamwa. I weiya minuwala lubulatola, i katusau. O lileiyam i komasi, boge i kariga, i komasi nayoyowa.

I laga tamala Dobu. Kalatala yam i keula, i sakauli Mmwa. I kota wa butia makaina. Igau i valagwa, "Ba la a gisi latugu." I valaguva i weiki, boge i komasi. I keiita i pela i sila o la waga, i kewa, i sakauli Obulaku i kota. I katupoi la kwava, "Taga latum?" O ku losa kamiteiyu." I keibiga tamala, "Gala. A sakauli. A kaipota. I vabusisi vilesi Dobu, boge i lausa, ei vai i siwa, la maga. A veiwasilageila. Nabwaya ku kwavaya agu kwalaga, ba kewa ba la a una yabiya. I masisisi.

Ei yam i la i kavaya kala kalaga. I ma i vakata. I vadobula. Ei yam i yaya, i keidodiga. Keidodiga i wokuva, i keibiga tamasi, "Avai tau baka la?" I vavagi moluwala, "Yaegu bita la, ta kewa." I pela i sili, i ginoli si laya. I kilaisi i sakauli Mmwa. I gisi makaina butia. I keibiga tamala, "Matuwam lei weiya butia makaina, ka lau Dobu, i lebusa vivila, ei vai i siwa. Makiwena, ku wa ku weiya kam butia."

I vabusi latula i mweina wa butia. I waweya i sikeila matala tamala, i dobusi. I tovila latula, "Tamada ku meya waga a sili. I keibiga tamala, "Kaipota, a mom, a kam ku gigilasi. Ku gisi tuwam tutuwala i kanukwenu." I ~~tev~~ keibiga latula, "Ku tovila tamada, ku lukweigu." "Gala. Ku weiya minuwala kwayavi, minuwala lubulatola, bi sapemsi."

I kewa tamala i la. Latula i kalipoulaga

i utu la kaikwala. I kalipoula, luvatala i seilava, i ma. Bogwa i kwayavi i meisa vivila. I weiya minuwala kwayavi. Waweiya i wokuva, lubulatola i sapisisi. boge i komasi.

I la tamala. I kalayu Dobu. Ei yam i keidodiga i kewa. I kokewa Mwawa i dolaguva, i keibiga, "Ba mwa a gisi latugu." I valaguva, i weiki boge i komasi. I pela i sila o la waga, i kewa. I sakaula Obulaku i kota. I vabusi la kwava, "Taga tau?" "Bogwa la weya i vai. Dobu i siwa, la maga. Sena vivila i katu-poisu, Litumwa taivila. Taiyu bogwa la meya. Taitolu i sisusa. Igau ba keiita, ba didagi taitolula be meya." I valaisa yabiya o valu. Ei meisa matosina litula, i lukweisa tamasi, i keibigasi, "Tamadasi, Taga tuwemayasa?" "Bogwa la lau, ei vaisi, i simweisa. La maga ba keiita, bi sila taitala ba lau."

Ei yam i vakata kala kalaga la kwava. Ei yam i keidodiga, i keibiga Tamesi, "Availa beka lau." I vavagi taitala, "Yaegu." I sila taitolula, i sakkaulisa Mwawa i kotasi. I keibigga tamala, "Tuwamwa i wawayasi butia kaina makaina. Ku vabusi ku mwa ku weya kam butia, bita lau Dobu. Bi vabusisi vivila bi lebusi. Ku vai, ku siwa." I vabusi latula, i mweina wa butia i wawai. I kewa tamala. I tovila latula, "Tamada, ku meya a sila bita la." "O kaipota, a momom, a kamkwam, ku gigilasi. Lageila ku weiya nimla kwayavi, ku weiya nimla lululatola, o lilayam bi sapemsi." I kewa tamala la. Latula i utu la kaikwala, luvatala i utu, luvayu i meya i seili. Bogwa ei bogi i weiya minuwala kwayavi, i katusau. I weiya minuwala lubulatola i katusau. O lile yam i komasi.

I laga tamala, i kalayu Dobu. Ei yam i keidodiga i kewa. I sakauli i kota Mwawa. I valaguva i weiki latula. Totuwala i sisu. I kewa i valutu Obulaku. I kota i vataya yabiya i la o valu.

69

I katupoi la kwava, "Taga litumwa?" "Bogwa la weya i vai, i sikweiwa tuwala, la maga." Igau a veiwasu, bogiu ba kewa. Taitala baka la." Ei yam i vakata kala kalaga la kwava. Ei yam i keidodiga i wokuva, i keibiga, "Taitala baka la monagwadi bi sisu."

I sila latula, i kewasi i losa Mmwa. I gisi makaina butia, "Matuwamwa i waweyasi kasi butia makaina. Ku wa ku weiya kam butia, bita lau, vilesi Dobu bi lebusi." I mweina latula, i waweyi kala butia. I kewa tamala. I tovila latula, "Ku meya a sila tamada." "O kaipota, ku gigigila." Ku kululu ku gisi tuwamwa totuwasi o uula butia." I kewa i la. Waweyi kala butia i busi, i saisyua i wokuva, i utu la kaikwala. Luvatala i seilava luvayu, luvatolu, luvavasi, luvalima i keula i meya wa butia i seili. Ei bogi i lai luvatala kaikwala, waweyi i katusau. I masisi. I masisi lubulatola i weya. I waweyi i wok- uva i simwa. O lileyam e bubusi ei meisa, i waya, i waweyi i katusau i simwa.

O lileyam ei bubusi ei meisa, i waya, i waweyi i katusau. Bogwa i ~~yam~~ ^{yam} tetola i waya i katusau. I masisi bogwa lei yam. I luki tamala, "Avai yam buku ma?" I keibiga tamala, "Ba kalatala, ba kalayu, ba kalatolu, ba kalavasi ba ma." "O ku wa." I kanamwa i masisi i bogi. I waya minuwala kwayavi, waweyi i wokuva, i waya lubulatola i katusau, i masisi.

Ei yam i vayali, i weiki i sau totuwasi tuwala. I katunukuli taitala totuwala, i kanamwa. I sisu bogwa i wokuva. I migai kaibwanini. I kabunini molitomwaya, i bwalasi, i kabunini moluwala i bwalasi, i kabunini moluwala taitolula i bwalasi, i kabunini taivasila i bwalasi, i tokayasi i simweisa. I sisusa.

I losa i vayalisi, i weyesi kasi inia. Waweyasi

boge i wokuva, i makeisa si kova. Gala i giseisa Tobumyou. I bwabwau o tapwala i lokayasa i dokeisa umseu. I vasesilasi bwadasi i mweiki, i yowa lopola, "Availa yokwa?" "O yakamesa deli tuwagwa i sinapweimasi tamamasi. Komwaidona boge i karigasi. Agumwaleta a waweiya vivila i wokuva, la simwaga, a mwa a yonukwa tuwagwa, lei movasi baka sisusa. A weyeisa kama iniasi, baka bwasisi. Gala ka dokeisa yoku, ka dokeisa kova, a meiki kaigi tapwam." I keibiga Tobumyou, "Ku loki kam inia, ku meya a gabu." I gabu i menu i kamsi toya tuwala.

I katupoi Tobumyou, "Avai yam bi ma tamamwa?" "Bi kalatala, kalayu, kalatolu, kalavasi makwaiwena bi ma." "O ku wakeisa natana tokwalu ku meyeisa ku teya." I lokayasa i meyeisa i teyasi. Tateya i wokuva i vagi wadola, yamala, teigala, kabulula, matala, kaikela, kala kwasi, kala bisila. "Nabwaya ku lausa o kabulula i towa."

Ei yam i kausa, i lausa o kabulula i seweisa. I meisa i dolapula lei ma tamasi. I meiki tokwalu i gisi kala bisila i tataya. I wala kala wosi tokwalu, "Ka Lo Iwa Ka Lo Gawa Kabo Tuma Ugwa Waga." I keibiga Topulupwalala, "A Mwale! Ku seili wosi, ku sawaga biga ba lega." I keibiga tokwalu, "Avai biga ba sakeim. Um kwava i ~~kakeiyasi~~ M'Obulaku bogwa bi kariga." I meiki tokwalu, "Ku ~~tekseiligu~~ tokailigu wala." I vabusi, i bokovili, i lau o lumwalela udila i la.

I keiitama i sili o la waga, i kewa. I tavina tokwalu, i la o kabulatala kwadewa i valapula. I doki, "Matowena tau gala bi sakeigu biga bwaina." Mitaga i katupoi. Tokwalu i seiki kala wosi, "Ka Lo Iwa Ka Lo Gawa Kabo Tuma Ugwa Waga." "Sogu, ku seili wosi, ku sakeigu bigala tuwala deli i sisusa?" I keibiga tokwalu, "Mwa, um kwava i kakeiyasi M'Obulaku i kalimatisa. O matam bibuligayagisa." "O ku ma, ku tokailigu wala." I keibiga tokwalu, "Ku meiki kam popu ku kwam."

mekeyasi

I bokovili. I lau o yavata i kipwesi matala.
 I bokovili. I lau o kabulula. I wau i la, i vabusi
 deli tuwala. I silasa wa wga waga, i ginolisa si waga,
 i kewasi.

I valapula tamasi, "O tugwa, ku meyesa a sila,
 bita losa." I keibiga gwadi, Yoku tuwagwa ku sinapu,
 ku meya i karigasi. Ku siwa bi sapemsi, baka losaga
 deli tuwagwa." "O tugwa, amakawala Kwigakeisa? Gala.
 Ku kanamwa. Ei bogi ku masisi."

I losa litula. Tamasi i kanamwa. Ei bogi i
 masisi lei meisa vivila kwayavi i komasi Topulupwalala.
 I kanamweisa litula? I vatadzi kasi yabiya, si vaiguwa,
 kasi kulia. I siweisa Obulaku.

(Taitala i kukwanebu)

Toyanowa i sisusa kasiteiyu luleta Butumavava si valu. Igau i meyeisa biga Omarakana Bugwabwaga, guyau Omarakana, boge i kariga. Toyanowa i luki luleta, "Ku sisu ba la ba valam Bugwabwaga Omarakana."

I sobusi, i toli i valam kala valam, "Bi Gadeigu (Kaukwa Ta Bugau Bunukwa Ta Bugau Tau Tonenen- Tonena Nowosi Gala Ta Bugau Bugwabwaga La Kamatula Lei Gudusa Wayola Lei Gudusa Mwalila." I valam i wokuva i kau kala lumi, "Lumi Toyanowa Lumi Toyanowa." "Ku tayasi wala, igau sitana a valam Bugwabwaga, bi lataleigu." Boge i wokuva i katubayasi la koni, i lukweisa, "Tomwaya, gala um katakela. Ku giseisa kala katoula tuwami, ku meisa kwigakeisa la katakela."

I keula, i valutu Butumavava, i taya. I keibiga luleta, "Kwatuli sagali?" "O Luceta, yagala Tabala, kagu lumi nayu namdala bulukwa. Mitaga kuvi, buwa, gala bita keibiga." I kau sitana kala bulukwa luleta, i seiki kwaitala kaula, i keibiga, "Lei wa beisa ku kwam, sitana ba sapu, sitana bu kwevai, bu kwamkwam." I seiki luleta i vakati o kumkumla. I lagisa i kumli bulukwa, i komasi i vinau. I livala Toyanowa, "Ku mweiki yatala kwega. Tau Bugwabwaga gumdubudubu."

I Kwayavi i tokaya, i sakauli i la Dubilikwayavi, lei siwa. I yamata tolivalu, i sisu bogwa i dudubili. I gigisi tomota bogwa i masisi. I eni tomata. I eni i kau. I sakawali i la Butumavava. I laga i koma tomata matouna.

Lei yam gabogi i sisu, i lagi Toilelami i kariga Bwoitalu. I katupoi, "Avaka?" "A Toilelami

boge i kainga kairiga." "O Toilelami, tokamkwam yoku, topiki yokwa. Gala ta kamkwam, ba komaga. Gala ta gisi, ba gisiga. Gala ku lalasi, ba sili o tatom, ba koulama." I luki luleta, "A Mi, ku la ku bagula, ba la ba gisi Toilelami, a valam. I sakaula Bwoitalu.

I sobusi, i weiki boke i valamsi. I tola wala wa bwaima, "Bi Gadeigu O Toilelami, Bi Gadeigu O Kaukwa Ta Bugau Bunukwa Ta Bugau Gwadi Ta Bugau Tau Tonena Nowosi Gala Ta Bugau" Lumi Toyanowa Lumi Toyanowa!" "Ku tayasi wala, igau sitana a valam Toilelami, bi latalaigu. Sitana lova buku weyasi kaikivi, ba ma sitana a ~~gisi~~ gisi Toilelami, bi tagam lopogu." "Atomwaya boke i wokuva, kwatu-bayasem um koni. Gala um katakela? Ku weyakeisa tuwami makaina la kayala." "E, ku meyeisa ula katakela, ba la ba gisi sitana, bi lubaluba lopogu."

I keula i sakaula Butumavava, i taya. I katu-poi luleta, "Toyanowa, kwatuli sagali?" "O ludeta, yagalaga Kalugulabi MinuBwoitalu. Natana agu lumi bulukwa kabilayu. Lei wa mautuna. I gabu ku koma. Ba mweyaga sitana a sapu kam bwanawa, makateki sitana bu kwamkwam."

I mwa i vakati o la bwala. I kumli. Ikwayavi i yaya. I kamkoma i vinau. I luki luleta, "A ku mweiki yatala kwega. Toilelami tau gumadubudubu."

I kwayavi i tokaya i valutu Bwoitalu. I sobusi, i sisu wala o lilaguva i lubulatola. I doki i masisisi tolivalu. Mitaga MinuBwoitalu i nukwalisa Bugwabwaga boke lei kau, ei lau i koma. I livalasi MinuBwoitalu, "Yakidasiga i bogi wala bita yosisa."

I masisisi vivila, i simweisa tauau. I sūsusa i giseisa lei ma. I dokeisa, "A Toyanowa, ku doki buku la. Mitaga i yam bi yosem." Toyanowa i siwa i yeni tomata. I yeni i sikeili, i tabuteta, i keula o kaikela, i seili o kaŋola. Tomwaya o pwai-pwaya i biya, i doki bi yakubwatola.

I memeisa MinuBwoitalu, "Ko Yoku Avai tau yokwa ko?" A ku yosa ma guyausi ko, ku doki ku koma ko?" Toyanowa i luki MinuBwoitalu, "Ku toweisa, igau sitana a valam Toilelami, sitana bi tagam lopogu." "Ko gala. Yokwala ku keula gweguya o lu valu ko? Ku kwamkwam ko?"

I makeisa i weiyasi. Waweyasi i wokuva, i bakusa. Kasitaiyu wala i kenusi sola Toilelami. I dubwalisa kwaitinigesu kasi laka. I sisu wala luleta. I lukweisa, "A yokwa, lumta boge lei weiyasi MinuBwoitalu." I keibiga luleta, "Ku seili, bi weiyasi, bi kakiŋa."

Bogwa lei wokuva, bogwa lei bakusa Toilelami.

(Taitala i kukwanebu)

Si valu Bau i sisusa deli la kwava. I luki la kwava, "Ku la ku waya kasi vaya luguta. Bita la Yalaka." "Bwaina ba kavaya." I keula kala gumam, i la o lumata. I wawaya i wokuva i keula i meiki la kwava. "Ku tokaya bita la, bita lau kasi vaya humta," "Bwaina bita la."

I meisa i kasobusi Lobuwa. I lilolasi i keibiga, "Vilo! Ku taya, igau ta mwa o la odila." "Bwaina!" I taya, i semwa la koni, i kalipoulasi i sisusa o uula bombom. I yowa menana kukupwa, i tola o bombom o dogina. I liku dabela vivila, i kanupwagega. I liku yavila matouna, i ligeiwa mwada bi keya. I gelu menawena kukupwa o dogina kai, i keibiga, "Ku ku ku pwa! Bobwayamla Bokwakamla.!" "A Vi! ku tokaya, boge i baneida mauna."

I tokayasi wala, i meisa, i kasobusi wa keda. I lilolasi, i meisa, i kasobusi Siviyaigila. I supelasi Kubula. I keibiga la kwava, "Ta kalipoula, ta la o uula sibwadiga. I liku dabela i ligeimwa, i kenu. I kiyavila tau, i kewasuya, i geluga kukupwa, "Ka ku ku ku pwa! Bobwayamla Bokwakamla!" "O ku tokaya, bita la. Boge i baneidasi mauna."

I meisa i kasobusisi Yalaka. I lukweisa gugwadi, "O ku lokayasa lubougu, ku lukweisa bi makeisa kasi vaya." I losa gugwadi bi kikaikivisi. I suvisi wa bwala sola la kwava. I liku dabela i ligeimwa, i like yavila i ligeimwa ligeimwa, i kenusi o tatom. I siweisa i keitasi. I kekeitasi wala i kariga tau, i kariga vivila. Lei meisa vesiya, i makeisa boge i karigasi. I keulasi i lausi i bakusi. I simweisa.

(Taitala i yosokuna)

Tonku

Mei sikeiyasi wa koya deli inasi tailima tuwala, taitala Tokunabeibai. Matouna Tokunabeibai kasitaiyu inala i kausa si wota litula. Tokunabeibai la wota yakekita wala. I keibiga tuwala, "Nabwaya, ta puwalisa bulukwa." Ei yam i losa. I lova la wota tuwala. I lova i wokuva i sekeili bwadala i lova, i sekeili taitolula i lova, i sekeili taivasila i lova, i sekeili tailimila i lova si wota. I kau Tokunabeibai la wota.

I yobutusi bulukwa, Tokunabeibai la wota i lova, i keibiga, "Avai na wota Dakeke Yaegula Tokunabeibai Gouwata Dakeke Kada Bubu Kada Magi I Mwau!" I sakaula bulukwa i seiki tuwala la wota, i kola i kopwali, i sekeiwa taiyuweila bwadala la wota i kola i kopwali, i sakaula i sekeiwa taitolula la wota i kola i kopwali, taivasila la wota i kola i kopwali, Tailimela i kola i kopwali. Tokunabeibai la wota i kola, i kimati.

I keibigasi tuwala, "Avainina kam levatu i lebonu?" "Gege! Yaegu agu levatu i yauwola." I sekeiwa, "Availa kada levatu i lebonu?" "Gege! yaegu agu levatu i lebonu i yauwola." I katupoi taitolula, "availa kada levatu i lebonu?" "Gege! Yaegu agu levatu i yauwola." I katupoi taivasila, "Availa kada levatu i lebonu?" "Gege, yaegu agu levatu i yauwola." Tailimela makawala. I katupoi Tokunabeibai, "Avainina kala levatu i lebonu?" I keibiga Tokunabeibai, "Yakida, agu levatu i yauwola."

I keibiga tuwala, "Boge i kariga bulukwa. Ku weiyasi." I kausa lewa tuwala i weiyasi Tokunabeibai. I waweyasi i buyavi. I kodideimisa la wota

i laisa. I wa i valam. I kausa bulukwa tuwala, i lausa i gabusa. I valam Tokunabeibai, i loki inala. I keibiga inala, "Avaka peila ku valam?" I keibiga Tokunabeibai, "Peila bulukwa i kola o gu wota i kausa tuwagwa, i lausa, i gabusa." I keibiga, "Ku seiwa, bi losa bi kabwasisi. Ku meya igau ta yemi um wota."

I yemi la wota latula. I losa i komasi bulukwa tuwala. Matouna Tokunabeibai gala i sakeisa bulukwa. I masisisi. Bi yam i losa i puwalisa. I lova molitomwaya, i sekeili i lova moluwala, taitolula, taivasila, tailimela, i lovasi si wota. I lova Tokunabeibai la wota. I keibiga, "Avainina I Nau Wota Dakeke Yaegula Tokunabeibai I Lau Wota Dakeke I Gouwata Dakeke Kada Bubu Kada Magi Mwau?"

I butusa bulukwa. I sakeima wota i kola i kopwali, i sakeima taiyuweila i kola i kopwali, taitolula, Taivasila, tailimela i kola i kopwali si wota. I sakeima Tokunabeibai la wota, i kola i kopili, i kenu.

I vavagi tuwasi, "Availa kada levatu i lebonu?" "Gege, yaegu agu levatu i yauwola." Availa kada levatu i lebonu?" "Gege, yaegu agu levatu i yauwola." "Availa kada levatu i lebonu?" I sakeima tailimela, "Gege, agu levatu i lebonu." I maga matouna, "Availa kada levatu i lebonu?" "Yaegu Tokunabeibai agu levatu i yauwola." "O ku weyesa bwadada, lewa ku weiyasi." I katu-popoyeisa kala kunupwetina. I kodideimisa la wota, i laisa. Tokunabeibai i weiki i valam.

I youlasi bulukwa tuwala, i lausa i kabwasisi.

I valam Tokunabeibai, i kalobusi i weiki inala. I keibiga inala, "Avaka ku valam?" I keibiga Tokunabeibai, "I kola agu bulukwa. I visisi tuwaga i lausa. I waweigusiga la valam la ma." I keibiga inala, "Ku meya um wota, ba yayemi."

I kabwasisi tuwala. I keibiga inala, "A youdila kai buku loki. I youdali kai i wokuva, i migavi inala, i seiki Tokunabeibai. I weiki tuwala bogwa i vadobulasi. I gugulasi i tavina Tokunabeibai, i tavina i tapatu, i lukweima kai kilimwa, "Ku Kwapwagega!" Komwaidona tuwala i losa o lopola kai. I kapatu kai. I toweisa o lopola kai.

I simwaga Tokunabeibai, i yaya bulukwa. Yayaya i wokuva, i seila o pwatai, i keula i yaki inala. I kamsi bulukwa. I masisisi. Ei yam i keibiga inala, "Ku la ku vakawali tuwami." I la Tokunabeibai, o kasi kai tuwala i toli, i keibiga, "Mamala Malayam Yam Naye Mamala Mala Bogi Bogina You Gege Bogibogina Gege Yamyamma Tokunabeibai Nuwam Goyona Gwama Tayoge Tauau." I katupoi tuwala, "Avaka ku vagisa?" I keibigasi tuwala, "O Tokunabeibai, O Bwadeimasi, ku tagwala baka weisa." I keibiga, "Yokwami bulukwa ku meyeisa ku kwamkwamsi, a sisuga. Ku kanukwenusi, ba laga." I meiki inala, "Katuli?" I keibiga, "I totasa wala wa kai, a maga."

I bogi i masisisi. Kalatalasi, kalayusa, i kalatolusa, lei yam i kaibiga inala, "Ku la ku vakawali tuwami." I lolo Tokunabeibai, i lola wa kai, i tola, i vina, "Mamala Mala Yam Yam Nanaye Mamala Mala Bogi Bogina You Gege Bogibogina Gege Yamyamma Tokunabeibai Nuwam Goyona Gwama Tayoge Tauau." I katupoi, "Avaka ku vagisa?" "Ka totasa wala. O Bwadamasi, ku tagwala baka weisa. Boge i

karigasi taiyu. Kamataitolusiga ." I keiita Tokunabeibai, i loki inala, "Kwatuli tuwami?" I keibiga Tokunabeibai, "Avaka ei totasa?" I keibiga inala, "Ku ma ta sisu."

Kalatalasi, kalayusa, kalatolusa, ei yam i luki inala, "Ba laga a vakawali tauau." I lilolo. I lola o uula kai, i tola, i vina, "Mamala Mala Yam Yam Naye Mamala Mala Bogi Bogina You Gege Bogi Bogina Gegge Yamyamna Tokunabeibai Nuwam Goyona Gwama Ta Yoge Tauau. Avaka ku vagisa?" O Tokunabeibai, O Bwadamasi, ku tagwala baka wa. Boge i karigasi taiyu. Agumwaleta wala." I keibiga ku sisu, ba laga."

I mwa o valu. I masisi. Kalatala, kalayu i luki inala, "Ku sisu, ba laga a vakawali tau. Boge i karigasi taivasi i wokuva. Kalamwaleta i sisu. I lola Tokunabeibai, i tola o uula kai, i vina, "Mamala Mala Yam Yam Nayu Mamala Mala Bogi Bogina Yu Gege Bogi Bogina Gegge Yamyamna Tokunabeibai Nuwam Goyona Gwama I Tayoge." I katupoi Tokunabeibai, "Tauau!" Gala. I katupoi tuveila, "Tauau?" Gala. I tavina kai, i lukweimwa, "Kwapwagega!" Kai i kapwagega. I vavagi umdawali "Wu!" Boge i boginasi. I luveiwa, i kanaweisa. I maga Tokunabeibai i loki inala i keibiga, "Komwaidona boge i karigasi, i kanaweisa. La maga, bogwa i wokuva."

I puwali kala bulukwa sola inala. I meya i kabwasisi tuta tuta. Kasitaiyu inala i kamkwamsi kasi bulukwa.

(Kaina Tovileu i kukwanebu)

TOMADAWA

Tomadawa tomota taitala i sisu, i weiya la buyagu. Matouna i la i bagula. La kwavaga kala butia beba i saisiya. Matouna kwaitala yam i sisu, kwaiyuweila yam i sisu; kwaitolula yam i sisu, igau i bigibagula wala. I wokuva kaula, i wokuva sopi. I luki samwa, "Ku losa ku lukweisa ula kwava Kadalebuwaga, sitana kagu bi meyeigu, sitana agu sopi bi meya."

I peiki menana Kadalebuwaga. Tomadawa i kau kala sopi, i keipapi latula, "Kala Ka la ka kau." I ma i lilolo o la bugwa. I vigikwali sopi. Magila bi bani sopi bi mom. I seili. Gala. I lola wa waya i kenu. I kau sopi i mom. I keibiga, "Woi!" I sikikita, i la sitana o bwarita.

I tomalaula i keibiga, i luki latula, "Ku la ku lokaya Mokailubu. I kau kema, Boyavata i meya o valu Oveyova." La kapusi, la mwa. I yaleigu kweluva."

I vavagi latula, i valam, "Tamagu, ba wa!" "Ku ma!" I papi, i seili o tapwala. I luki latula, i keibiga, "Yokwa vivila yokwa, bita la, buku ~~vali~~ valulu. Yaegu - fwaf! - a taboda, gala ba valulu -

(Yavata kala kweluva i kululaguva madawa)

"bi yoseigusi, bi kausa kema bi bwabweigusi. Kaina gala magisi, bi sakeigusi Gumilabwaba, Kudukwaikela, Kapwapu, Ilailima, Okununa. Kavilima Oveyova vaiguwa kasilaitala bi boda, kidamwa bi lageigusi."

(Mautusina wala i liliu taitala tolela Oveyova)

Torika

Puluma tolela labuma. Menana vivila Kalauwata mei sikeya Wawela. Kala Kayasa biu. I bibiu, i yoyu butula. i la wa labuma. I lega Puluma. I keibiga Puluma, "Ba la a gisi vivila Wawela." I luki Imlabuma, i keibiga, "Ku vabu watunu ba sila, ba la a gisi vivila Wawela." I keibigasi, "Igau, Nabwaya buku sila, buku la." I masisi.

Gabogi i sila wotunu, i vabu Dikulabwagau. I tola i keibiga, "Kwemalisa wotunu, ba laga." I vayali Puluma, i vayali Wawela. I toli o sisuna. Taitala vivila i tanei valu. I mwa i lova, i lai dakuna Puluma. I lagi menana vivila i keibiga, "Avai tau yokwa? I toli i keibiga, "Yaegu Puluma." "Am tolem? "Toleigu Labuma." I keibiga, "Avaka ku vagi?" I yoyu butula Kalauwata, i wa a lega, la ma." I keibiga, "Ku ma, ta la wa bwala." I lau wa bwala, i suvi, i keibiga, "Ku sisu, ba laga a gisi Kalauwata, ba meya." I loki i keibiga, "Ku ma bita la wa bwala." I meisa i suvisi, i wakeisa Puluma i sisu wa bwala.

I keibiga, "Avaka ku vagi?" I keibiga, "I yoyu butum, la ma." Siweisa i sisusa. I kalatalasi, i kalayusa, i kalatolusi. I kwayavi i luwawala guyau, "Nabwaya, ku utusi kabudoga, ku wawoulasi yoyu, ku kwaliyaisa la bwala latugu. Nabwaya bi sunapula. Bi ma matouna bi yau matala. Kala tau kabudoga, kala kokola, kala tau yoyu bi wawoulasi." I meisa bi vitokayasi bwala.

I kaliyaisa bwala i wokuva, i losa i kakayasi Kalauwata sola tau. I kakayasi i wokuva, i katu-bayasasi si vaiguwa, si mwali, si wakula, kasi buna. Boge i wokuva katubayasa, i keibiga vivila, "Ku sunapula." I keibiga Puluma, "Ku kugwa yokwa vivila." I keibiga vivila, "Ku kugwa, yoku tomitawasi

bi gisemsi tomota." I keibiga, "Gala, kaditaiyu wala bita sunapulasi." I kugwa vivila, o luyeki tau. I katugogovasi, i yakaulasi kala tubwatubwa Puluma. I tetasi kabulatala kabudoga, i toweisa, i keitasi i meisa i silisa. I simweisa i kauisi. I sisusa.

I sisusa i suma vivila, i valulu tau. I bigubagula Puluma. Boge i toveaka latula, i siwa inala o valu, i la i libaula tamala; lei meisaga MinuWawela la tauau Kalauwata. I kakutusi bogwa i lalavi. Boge i lalavi bi la guma Wawela, pekekita wala bi kalobusi Puluma, i lilivala, "Ku meya sitana sopi a mom" I momom i wokuva, "Ku meyeisa kagu ba kam."

Ei yam i mom, i kam i wokuva, i keibiga latula, "Woi, tamagu, mwada ku nanau luku ma. I kakutusi." Ei yam i la i libagula Puluma, i luki latula kawala, "Yaegu a bigubagula wala. Aiseiki la tauau inam i meisa. Yaegu a bigubagula wala."

Boge i mwasila Puluma, i mwasila wowola. I keula la kema, i la wa bwaime i sewa, i suvi o la bwala i siwa. La kwavaga i la i sulu. I sulusulu, boge i menu kaula, i luki latula, "Ku luki tamam bi ma, i kam." I sakauli latula, i la i keibiga, "Puluma, boge i yai inagu, ku ma." I keibiga Puluma, "Ku loki inam ku kwamsi, yaegu ba sisu wala." Latula i meiki inala i keibiga, "A weiki i peiki, i sisu wala." I Keibiga, "Ku Kweiita ku luki tamam bi ma i kam." I keiita i keibiga, "Puluma, ta la ku kwam." I keibiga Puluma "Ku luki inam ku kwamsi. Yaegu ba sisu." I keiita matouna gwadi, i meiki inala, "A weiki, i peiki, i sisu wala."

I lilolo latusi i bogi. I masisisi.

Ei yam i keula la kayala Puluma. I luki latula, i keibiga, "Ku sisu, ba laga, a vayali o kwadewa." I keibiga latula, "Tamagu, ba wa." I vitubwalola Puluma, i lola o luyeki latula. I keibiga, "Tamagu, ambeisa buku mwa?" I keibiga tamala, "Ku kweiita," ~~A~~ mwaga, a vayali o kwadewa ba mwa." "Gala!" I valam latula. I weiya natana kala inia, "Ku lau kam inia, i gabu inam buku kwam." I sakawali kala inia, i meyaki inala, i keibiga, "Lei wa ku gabu agu inia, ba kam." I keibiga inala, "Ku seili. I gigabu, ku kweitagaba ku loki tamam, buku meisa." I sakaula latula. I sakaula i la i bwadi tamala, "Tamagu, ba wa." I gisi tamala. I weiya nayuweila inia, i keibiga, "Lei wa kam inia, ku weyaki inam i gabu, buku kwam." I sakaula i keibiga inala, "Ku semwa i gabu kam inia, ku kweiita ku loki tamam."

I sakaula i bwadi tamala, i keibiga, "Tamagu ba wa." I keibiga tamala, "Ku kweiita, ku loki inam, ku siweisa o mi valu, ba laga o gu valu." I sakaula i meiki inala, i katupoi inala, "Tamam?" I lukweisi kawala, Ku loki inam, ku siweisa, ba laga, ba siwa o gu valu."

I katubayasa inala, i gebila la guguwa, i lolasi. I lolasi i bwadisa tamala. I keibiga Puluma, "Ku kweitasasi ku losa o mi valu, ba laga o gu valu." I kugwa Puluma, i lilolasa litula o luyeki. I kalobusisa Obulaku, i vabusisa i vayali o banakwa, i luvapela o Simsim, i vakana Dudaya, i vabusi Dikulabwagau. O dakuna i tola.

Ei weisa litula, i siweisa o dakuna. I sisusa i keibiga Puluma, "Ku giseisa kutugu." I kenu Puluma, i gisi kutula la kwava. I masisi Puluma. I masisi, i mamata, i keibiga la kwava,

"Ku gisi sitana kutugu, ba kenu. I kenu la kwava, i simweisa, i masisi la kwava; i kakutusi. I giseisa Imlabuma, i kululu i gisi Puluma i tota. I kisolu wotuna miyana, i meiki Puluma. I masisi la kwava, boge i uguna. I gisi miyana wotuna i waiai, i keibiga Puluma, "Bwaina bi masisisi litugwa, ba sila." I pela i sila wotuna miyawena. Ei biyasi Imlabuma, i bibiyasi wa labuma. I toli Puluma, i keibigasi Imlabuma, "Bogwa ku ma." I keibiga Puluma, "Ku gisi litugwa i totasa wa dakuna, ku visilili wotuna bi silasi.

I mamatasi litula, ei neneisi kabakwaila Puluma. I mweyeisa, gala. I giseisa miyana wotuna i waiai, i keibiga inala, "Ba biya miyana wotuna." I biya, i kasai. I luki latula, "Ku pepa, ku yousi bi kasai, bita sila." I pepa latula, i silasa wotuna miyana. I biyasi Imlabuma, i bibiyasi wotuna, i lausa wa labuma.

Bogwa i bogi. I keibiga Kalauwata, "Puluma ambeisa lei mwa?" I keibigasi, "Bogwa lei mwa o lu valu." "Ba lokaya." I keibigasi Imlabuma, "O nanom bi kitumwau. Ta kanamweisa." I keibiga Kalauwata, "Gala, ba lokaya tamala." I keibigasi Imlabuma, "Kala biga buku weisa, buku sulasi. La keda Dokinikani i tuwali." "Taga ba wa." I keibigasi Imlabuma, "O makadana o kakata la keda Puluma, o kikiwama la keda Dokinikani."

I lolasi o la keda Puluma o kakata i sisu. I simweisa kikiwama la keda Dokinikani, i kalobusisiga o lu valu Dokinikani. I gelasi bulukwa, i keibiga Dokinikani, "Availa i vabutusi kala bulukwa Puluma?" I keibiga Kalauwata, "Puluma ei kugwa. Puluma la gwadi o lugeki." I keibigasi

Dokinikani, "Bwainina kaigasi!"

I kalobusisi o valu, "Availa yokwa?" I keibiga Kalauwata, "Yaegula la kwava Puluma." "Ku meisa, ku kanamweisa. Nabwaya i yam buku losa." I luki latula. I luki inala.

I luki inala, "Ku meya kam kwasi, a simkwali." I vilili, i seiki, "Ku gisi i kwaneigu." "A boge & kwanem." I seiki kala paya, i takasi o taigala Dokinikani, "Ku gisi, i kwaneigu. Ku meya kam mwali, a sikoma." I vilili, i seiki, "Ku gisi i kwaneigu." "I kwanem." "Ku meya um biga, ku sakeigu." La biga Kalauwata i seiki Dokinikani, la biga Dokinikani i seiki Kalauwata. I luki latula, "Ku kwau." Kala kasikuni i seiki latula, i keibiga, "Ku losa o sikwawa, ku siweisa." I sisusa.

I sisu Puluma. Kwaitala yam i keibiga, "Nabwaya ku losa, ku keulasi luya wa la valu Dokinikani, ku keulasi o lu valu, ku meyeisa o ula valu ba sagali." Lei yam i tokayasi la touwata, i losa i kalobusisi o lu valu Dokinkani. I mweinasi luya, i yolagu luya i dubwali i la o pwaipwaya. Yatala luya i pela, i katupwali la bwala Dokinikani. I weya wa bwala, i weiki latula Puluma, i sisu o sikwawa. I keibiga monagwadi, "O uga luya, kala luya tamagu ba koma." I keibigasi touwata, "Ku meya la luya Puluma. Ka lausa i sagali." I keibiga, "Gala. Ku losa, ku tulokayasa kawam, Boge i sewa latum, i koma." "Ka doki, ka weyeisa biga, i peiki, magila kala luya wala, i sagali."

I sagali Puluma. I sagali i wokuva, i keibiga, Nabwaya ba loki a gisi litugwa. Bogwa i katudeu Dokinikani." Ei yam i tokaya Puluma, i lola i kalobusi o valu, la valu Dokinikani. I keibiga Puluma, "Dokinikani, Avaka kwatudeu litugwa, lei meisa bi sisusa, ku mweyeisaga ku kwatudewa. A maga a kapituni kayom." I keibiga Dokinikani,

"A sasopa wala. Igau ba vagi litumwa si katu-
bubula. I simwa i tapeli. I tapeli kasi mwali,
kasi paya, kasi kwasi, kasi buna. I seiki la
biga Kalauwata, i keimali la biga Dokinikani.
I luki latula i migai kaidobu. I talilisi i mwa
kala kasikuni, kala bwabwau, i luvemwa, i seiki
la biga bwaina, i keibiga, "E bwaina ku lau
litumwa, ba simwaga."

I vakola Puluma la kwava, latula, i lolasi.
I lolasi o lu valu Puluma. I simweisa.

(Tovileu i kukwanebu - kaina liliu)

WAILA

Torilen

Mei sikeya o kala katuva, kala msimwesi, sibwayeki, noku. Matowena tau yagala Mayabam i sikeya Tukwaukwa. I kam msimwesi waila, i sunini, i kalobusi Tukwaukwa. I meiki Mayabam i sisu, i katupoi, "Mayabam, avaka ku vagi?" I keibiga Mayabam, "A yayema ula wota." I keibiga waila, "Kaina buku poula?" I keibiga Mayabam, "Nabwaya ba poula. Ba la Mwawa, a katuyaula." I keibiga waila, "Nabwaya ba ma, a sila bita la, ta poula. A gisi poula." I keibiga Mayabam, "Bwaina, nabwaya buku ma, ku sila bita la, ku gisi poula." I keibiga waila, "Ba la a vagi agu kwalaga.2

I vagi kala kalaga, msimwesi kwaita potaila, sibwayeki kwaita potaila, i vapotai i kanamwa. Ei yam i keula la pwatai. I keibiga Mayabam, "Ku tavina Gusoeta, ku la ku sibogwa, baka weisaga." I tavina waila, i lilola i vabusi Gusoeta. I wa i siwa wa pasa.

I kolekusiga MiTukwaukwa. I kolekusi i wokuva, i kaliyagila kaitala, i makeisa waila i sisu. I keibiga waila, "Mwa, ku ma a sila, ta wa a gisi poula." I keibiga, "Woi! boge i beku waga. Igau bi ma makaina, buku sili." I kaliyagila Tetobai, i meiki waila i sisu, "Meya waga a sili." I keibigasi bwadala, "Woi! Ta weya, bi tula. Gala ta weya wala i kam kalaga. Ku ligeiweisa bi sisu. Yumyam waila ta didagi" - kailiyasi. I keibigasi, "Igau bi makaina, buku sili."

I kaliyagila Solia, i meiki waila, "Meya waga a sili, ta wa a gisi poula." I vavagisa bwadala "Woi! yumyam waila ta didagi. Minuwala laodila gala

bita didagi.

I kaliyagila Sipilatuma, i meiki waila i sisu, "Sipilatuma ku meya waga a sila." I keibigasi la tauau Sipilatuma, "Woi! veyoda boge i beku waga, bwaina ku simwa, igau bi ma veyom, Mayabam bi didagem."

I kaliyagila Mayabam, i makayasa waila i sisu Gusoeta, "Iwe, Mayabam bogwa ku ma." I keibiga, "Bogwa. "Ku meya waga a sila." I sili waila. I vavagisa litula Mayabam, "Ku ligeiwa, ta weisaga ta poulasi." I keibiga Mayabam, "O katala, ta makayasa tamani i sila, ka lausa i gisi poula." I vakatalasi i sili. I keibiga waila, "Lei wa agu kwalaga, veyoda, ku didagi." I kau kala msimwesi, i kau kala sibwayeki, i didagi wa waga. "Ku sila waila, boge i kugwasa Mitukwaukwa, oluyeki yekidasi." I keibiga waila, "Yaegu ba kabi mwaiwaga." I tolasi, i katukwevili yeyuna waila, i vigaki makawala pelopela. I sakauli waga, i valutu o kulakola Mwua. I liku tau. Mitukwaukwa igau i totovasi.

I kota o kulakola, i gisi tolam. I sewa si wota. Sosewa i wokuva, i kaliyagilasi i laisa tolam, i la o kabewota. I vabusi waila, i katuville yeyuna, i mku pwanetasi tolam, i katumati komwaidona i wokuva. I losa i sewasi. I sosewasi wa waga boge i beku. I sududulasi o Kailau i kevalasi.

I waweisaga Mitukwauka, "Makaina avai waga?" "O Kayaula kaina?" "Gala." "Makwaiwena waila kubulela i sisu o mwaiwaga." "Gala." "Makaina Mayabam la waga." Boge i wokuva kayasa, i keibigasi Mitukwaukwa, "Mwa, Mayabam, waila ku didagi." I keibiga Mayabam, "Ka meisa, ka laisa inia.

Inia i la o kabewota, i vabusi waila i katuville yeyuna, katumati inia i karigasi. Ka sosewasi i beku waga, ka lilaguvasi. I toto kaivala." I keibigasi MiTukwaukwa, "Woi! kiwona ka didagisa." I keibiga taitala, "Yaegu bogwa ba didagi, matosina gola i pakeisa." Taitala, "Yaegu bogwa, usagelu i pakeisa."

I kaliyagilasi MiTukwaukwa i sakaulasi Mwawa. I laisa si wota. Inia i la o kabewota. I vabusi waila, i katumati i vinaku. I seweisa MiTukwaukwa i wokuva, i sududulasi i lilaguvasi. I taisa kaivala. I kaivalasi boge i bogi, i kamwamsi boge i bogi. I masisisi i kanmweisa. I masisisi o lubulatola, i giseisa Imlabuma i kisolusa wotuna, i seyoli kaivala. Inia komwaidona i lau wa labuma.

Ei yam i mamatasi MiTukwaukwa, "Tauau, inia i lotumila. Kaivala boge i tamwau. Waila i kam inia." O bwadagwa, gala ta kamkoma. Availa lopola kidamwa bidubadu kaiyala ba banenaga." I lotumila inia. Ei yam i laisa si wota gabogi, i laisa tolam. I sududulasi i kaivalasi boge i kwayavi.

I luwawala waila, "Bwadagwa ta kamkwamsi ta vanokisa, ta masisisi, kaikela kaikela komwaidomi ku tumeigusi. Ku tumeigusi ta masisisi." Ei masisisi boge i lubulatola lei ugunasi, i sili Imlabuma, i gisi boge i masisisi. I visolu wotuna, i liku. I ma i selavi tomota, kaivala, waila. I biya, i lau wa labuma. I mamatasi MiTukwaukwa i makayasa wa labuma, i keibiga waila, "Woi! ku dokeisa Yaegu la kamkwam kada iniasi. Lageila kwaita valu ta sisusa.

I siweisa wa labuma. I sisusa boge i kwayavi.

i luwawala Imlabuma, i keibiga lei^{wa} kabulatala tolivalu, lei ma Kabulatala yokwami gilagala. Nabwaya buku taisi ula baleko, pilatala tolivalu, pilatala galagala, buku takaiwasi! Ei yam i pata si kema. I pitapata si kema waila toya bwadala. I simatisa i kugwa tolivalu, waila toya bwadala o luyeki. I takaiwasi tolivalu, kwaitala i takulasi, i supelasi kwaiyuweila. I keibigasi waila toya bwadala, "Wailo! tolivalu kwaiyu i taisi." I keibiga waila, "Ku seili, bi kugweweisa."

I tokayasi waila toya bwadala, i silisa o nunula, i keibiga waila, "Ku tabaisi. Ku losa pilatala, beisaga ba sili." I tabaisa bwadala, i katu-viliga yeyuna, i katusulaki kwaitala baleko, i sili i katulupwali; i tovili i katuvi, i katulupwali, i takuwali. I supelasi o kweiyuweila si baleko, i katusulaki, i tovila i katulupwali, i takuweya. I vapela kwaitolusi i sili o nunula, i yousi i takuwali. I vapela kwaivasila i takuwali. I vapela kwailimila i takuwali, i luvapela kwaitala i takuwali, kwaiyuweila i takuwali, kwaitolula i takuwali, kwaivasila i takuwali, kwailimela i takuwali. Boge i wokuva si pwaisewa waila toya bwadala.

Tolivalu igau komwaidona i tataisi. I supwana taitala GumaTukwaukwa, i loki tolivalu. I keibigasi tolivalu, "Ta mweisa, ta weiyasi gala-gala i karigasi, ta sisusaga." I sakaula i meiki waila i sisu, "Waila, tolivalu i keibigasi, i lalavi i mtuleidasi." "Ta lokayasa ta giseisa tolivalu, a katupwi kabulusi i karigasi, bita losaga!"

I loki tolivalu. I weiki i bigubagulasi. I katuvi yeyuna, i mtuli tolivalu, i kanaweisa o baleko. I luki bwadala, "Ta mweisa, bi bigubagulasi

tolivalu. I delisa i lolasa, i kalobusisa o valu, i makayasa Imlabuma, "Tauau bogwa ku vanokisa, buku meisa?" I keibiga waila, "Bogwa ka vanokisa laka meisa. Bwadamwaga i simweisa." "Bwadasiga amakawala?" "Igau i bigubagulasi, bi meisaga. Ka kugwasa yakamesa laka meisa." I keibigasi Imlabuma, "Bwaina ku losa, ku lokayasa menasina i genisa kami bulukwa, buku kwamsi. Igau i vabumi la wotuna, buku losa o mi valu. Yakamesa igau ka bagulasi ikwayavi, baka weisa baka kamsi."

I keibigasi Imlabuma, "Bwaina ku meisa ku kwamsi." I keibiga waila, "Kamkwam boge i wokuva ku vabumasi, baka losa o ma valusa. Bi meisaga bwadamwa i kwavavi bi kamsi, baka losaga."

I keibigasi Imlabuma, "Bwaina ku sila." I silasi, i vabu Mwawa. Komwaidona i tolisi, i makayasa si waga, si wota, si kawala, si wola lei kanakeni. I pelasi, i silasi, i poulasi. I meyeisa Tukwaukwa, i kamsi inia.

(Tovileu i kukwanebu)

BUBUNA

Mei sikeya Oveyova. I sisu Oveyova i seili poula. ^{Tovilen}
 Gudisi Oveyova lei meisa, i kausa i lausa i gabusa,
 i komasi. I yowa menana ~~bunubun~~ bubuna, i yowa
 Kokowa. Wa dabala Gusoeta i seili poula. I meisa
 gudisi Tukwaukwa i kausa i lausa i gabusa, i komasi.

I yowa bubuna. I yoyowa Sigigiligili i tola.
 I seili poula. I lobusisi M'Obulaku, i kausa i lausa
 i gabusa, i komasi. I yowa Kaikoyawa, i tola, i seili
 poula. Ei meisa MiSilaketa i kausa i lausa i gabusa,
 i komasi. I yowa Kabisaikuli, i seili poula. I meisa
 M'Osaikuli i kausa i lausa i gabusa, i komasi.
 I yowa Gilibwa, i seili poula. I vabusisi McGilibwa
 i kausa i lausa i gabusa, i komasi ToliGilibwa.

I gisi Kitava bwaula, i yowa. I yoyowa o
 dabwala OKitava. I toli OKitava o dabwala i seili
 poula. I valulu tomota. Tomota i vinunu. I vinunu
 bogwa i sila menana gwadi. I sili bogwa i tomwaleta.
 I sili bogwa i lola, bogwa i sikoma yavila, bogwa i
 sakauli wa Motila, boge i ulatila, boge i toveaka
 'mokita.

Bogwa i toveaka mokwita i taisi MiKitava waga
 kaiovau. I yowagasi MiKitava i wokuva, i kolasi
 laya. Kolakolasi i gogovasi. I sili matouna mona-
 gwadi, i luki inala, "Inagu, avaka valu Kitava i
 gogovasi?" Aiseiki, kolakolasi si laya." I keibiga
 monagwadi, "A loki, a gisi segwaya." I keibiga
 inala, "Gala magigu buku la o valu. Magigu bita sisu
 wala. La banem yoku. Bita sisu wala kada taiyu.
 Malolo bita siki Oveyova. Ta ma, ta ma, Kitava a
 banem yokwa. Kada taiyu wala bita sisu." "O a peiki,
 ba lokaya segwaya, ka mwasawasi." I buyayu inala.

"A doki desi, ta sisu wala, a banem yokwa, kadataiyu wala bita sisu." I peiki monagwadi, i keibiga, "Gala inada, ba loki segwaya i koma lopogu si gogova. Ba lokaya ka mwasawasi."

I keibiga inala, "Ku ma, ku kakaya." I kakaya i wokuva, i katubayasa kala mwali la vaiguwa, kala wakala i sokam. I keibiga inala, "Buku la, i tota kalasia buku ma. Ba gisem. Gala magigu i kwayavi buku ma. Bi tota kalasia buku ma." I lolo.

I lolo i kalobusi Kitava o valu, i keibigasi MiniKitava, "Avai tau matouna le ma? Ta takainowasi." I keibiga gwadi, "Gala. Yakidasi wala Kitava toledasi. Ta basisa laya." I keibigasi MiniKitava, "Ta takainowa yokwa!" "La ma, yakidasi wala. Ta basisa laya, ta kavilasi luya tolivalu." I lepisa, i la i kanatila~~wa~~ luya, i kamsi. I kamkwamsi boge i lalavi. Pona mitasi tolivalu. I tokaya monagwadi i loki inala. I keibigasi MiniKitava, "Sodasi?" I keibigasi mimilisi, "Ta bis^hbasisi laya." Mimilisi, "Ai-seiki, i tamwau." Ei yam i yavisa laya Kitava. I basisi i gogovasi.

I keibiga monagwadi, "Inagu ba lokaya segwaya, ka mwayunisa." I livala inala, "Tokaliyeya yokwa, yumyamnana. Bi sinapwemsi. Yaegula gala ba gisem. Ba tamwau wala."

I kalobusisi ilesi Kitava, i makayasa luya, "Avaka migamaga wawa?" I keibigasi tauau, "A taitala tau tomitawasi, i kalobusi i ma, i kabasisi laya!" I keibigasi vivila, "Boge i ma Dobu?" "O uweika ku sinapusa, ku losa, ku laisi o bwarita."

I bis^hpasisa bogwa i towotu kalasia. Pwala mitasi kilipwala i tamwau, i loki inala bubuna. I kalobusi i keibiga bubuna, "Bogwa ku ma!" I keibiga

latula, "Bogwa La ma." I keibiga bubuna, "Bogwa lageila ku la. Nabwaya ku simwa." I keibiga latula, "Gala, nabwaya ba lokaya segwaya, ka basisa laya." I masisisi.

I masisisi lei yam, i yavisi laya, i basisi i gogovasi, i lagi matouna i livala, "Inagu ba lokaya segwaya, ka basisa laya. I katubayasa, i kakaya, i putuma i wokuva, i lola i kalobusi Kitava o valu. I keibigasi tolivalu, "Sodasi bogwa lei ma." I sili, i basisi. Bisibasisa laya boge bi wokuva, i keibigasi tolivalu, "Ku losa ku kwausa yabogwa laya buku meyeisa, ku yavisa bita kenusi, ta kakutusi."

I kakutusi, i giseisa kutusi tolivalu. I masisisi, i kakutusi, i masisisi. I mamatasi i kau matouna monagwadi, i giseisa kutula. I giseisa i masisi. I masisi boge i uguna. I vagulisa gala, i keibigasi tolivalu, "Ta bilisa laya." I bilisa deli matouna monagwadi. I katubilisa boge i wokuva, i kausa yuwaiyogula, i selaisa wa laya deli tomota. I selaisa boge i wokuva, i kausa. I keibigasi, "Kwausa kwaitala waga, ku didagisa, ku wolasi, ku lausa Dauya o lopola, ku laisa i beu."

I keiitasiga tolivalu, i meisa Kitava. I tula inala, i towotu kalasia. I tuli latula gala. I tobala kalasia, i tuli, gala. Bogwa i la beisa kalbuyoyu, i tuli, gala. Bogwa lei ma kala sitela Tuma, i toli inala o dabala OKitava, i gisi pupakau laya, i bibeu o bwarita.

Inala i valam, i keibiga, "Gala i davila latugu. Boge i sinapusa, i lausa, i laisa o bwarita. Bwaina ba loki a gisi." I yowa bubuna, i yowa wa laya. O bwarita i toli. Latula o lopola i kanakenu, i valam bubuna "Umm." I lakau latula, wa laya i kanukwenu, i keibiga, "O inagu bogwa lei

ma. Igau ba vina. I vina latula wa laya i kanakenu.
 "Bubuna Buneloi Bubuna Bunelova Tamagu Mesineigu
 Isikepa Kepanigu Geyo! Geyo!" I dou latula bubuna,
 "Ku yowa ku la kaiyuwana yoyovi, kaiyuwana kaikubila,
 kaiyuwana kakaya, ku kwam i tuma lopom, ku maga i
 beuda o bwarita!" I keibiga bubuna, "O avaka yewa
 meyaga yaegu. Numwaya yaegu, a sewa guguya ku peiki.
 Mwada ku sisu o du valusa. Ba mwaga o kabuluna
 kawailuwa ba kamkoma, ba ma ba vakomem. Kwanukwenu
 wa laya. Yaegu, bi gadeigu molu, ba toto wala.
 Bu kwariga, ba kariga yaegu. Mitaga ku lukweigu,
 ba la a kam kawailuwa. Buku mova, buku kwariga
 desi wala wadom, bi gadeigu molu."

- I masisi i bogi. I masisi ei yam, i vina
 latula, "Bubuna Bunelolo Bubuna Bunelova Tamagu
 Mesineigu Sikepa Kepanigu Gayo! Gayo! Bubuna, ku
 yowa ku la kaitala kaiyuwana, ku yowa kaikubila,
 ku kwam, i tuma lopom, ku maga, bi beuda o bwarita."
 I keibiga inala, "Avaka yokwa ku sisu, ba mwaga a
 kawailuwa. Mitaga ku peiki ula guguya, desi bi gade m
 molu. Yaegu bi gadeigu molu, bita kariga desi kada-
 taiyu."

I beu, i beu, i lau OMyuwa. I katuligavi o
 kanakenuva. Bubuna bogwa i kariga. Tomota tomini-
 bwaita wa laya i kanukwenu. I kanawaga matouna
 tolela OMyuwa. I mimi i luki la kwava, i keibiga,
 "Ku sisusa, a mimi bogi, kidamwa taitala tomota
 i katupisawa o kwadewa, o du kwadewasi."

I sisusa la kwava, "Ba laga a vayali o kwadewa
 kabulatala." I lolo i kalobusi o kwadewa, i vayali
 kabulatala kwadewa i tola, i gisi gala. I keiita i
 vayali kabuluyuweila kwadewa, i toli, i gisi laya
 pupwakau, i keibiga, "Woi! GumMyuwa, mimi toto agu
 mimi." I lolo i weiki miyana laya. I kau inala
 bubuna, i semwa o kanakenuva. I liku waiyugo, i
 liku i wokuva, i katupeni laya, i mweiki tomota
 o lopola, i keibiga, "Mwa! Avai tau yokwa? Amtolem?"

I keibiga monagwadi, "O toleigu Kitava, ka bisi-basisi laya deli tolivalu. I sinapweigusi, sena i wokuva kasi uweika. I gisemwasi i sinapweigusi. Deligu i katubilisa laya, i meyeigusi, i laveigusi o bwarita. I beugu, i meyeigu um kwadewa. Inagu i vakomeigu. I keibiga GumMyuwa, "Avai inam?" "Bubuna!" "Menawena a semwa o kanakenuva." "O ku wa ku keli kala mesi inagu, ku baku, ku maga."

I keli kala mesi, i baku inala. I baku i wokuva, i ma i papi gwadi, peila wowola i mama, i keibiga, "Ku ma bita la o valu. Ku sila o kayogu, ba kawem, ei mama wowom peila kam molu." I papi i kau, i lau o valu. I weiki la kwava, boge i menu kaula. I yai, i seiki, i kam. Pekekita i kam i sewa. I simwa. Lei yam i salu kaula. I kam boge i peula wowola. I simweisa kasitaiyu GumMyuwa. I bagula kala i kam. Bogwa i banena latula. I siwa OMyuwa, i sigaga.

(Tovileu kala libogwa i seiki)

Bonetu

Biniyala Kaduwaga mei sikeya. Igau i livala kadala, "Ba lau ba luveiwa wa kai, bi vavilisa mauna." I busi kadala i ma o valu. I siwa matouna o dogina kai. I vina kadala. I la muluveaka i katupoi, "Am yagam?" "Yaegu Biniyala." I yowa i loki la guyau. I katupoi togega, "Am yagala?" "Bogwa la meya. Igau kwapa a yousi, a kamkwam. I tamwau yagala matouna." "Kam kalaga ku lau, ku la ku yousi yagala, ku meya." I yowa, "Am yagam?" "Yaegu Biniyala." "Am yagala?" "Bogwa la meya. A meya gola a yousi kwaitala kawailuwa a kam, igau i tamwau."

Guyau i luki bubuna. Bubuna i la i katupoi, "Am yagam?" I keibiga, "Yaegu Biniyala." I keiita, "Am yagala?" "Bogwa la ma, a kamkwam, i tamwau yagala." Togega i luki sikweikwa, "Bwaina sikweikwa, ku la ku katupoi." I la sikweikwa, "Am yagam?" "Yaegu Biniyala." I keiitama i gisi kaitala kai. I tola i kam. I katupoi guyau, "Kwatuli? Am yagala?" "Bogwa la kitumwau yagala." "Sena ku la. Desi, ku kwatupoi tuveila." I la i katupoi, "Am yagam?" "Yaegu Biniyala." Sikweikwa i ma i tola wa kai, yagala kapalasina. I kam, i kitumwau yagala. I loki si guyau togega, i katupoi, "Am yagala?" "Boge la kitumwau. Igau i luki muluveaka tuveila, "Ku la ku kwatupoi." Muluveaka i la, "Am yagam?" "Yagagu Biniyala." I ma i gisi kala inia. I yousi i kam. I tamwau yagala.

Guyau i luki posisikwa. Posisikwa i yowa i tola, "Avai tau yokwa?" "Yaegu Biniyala." I yowa i toli, i katupoi togega, "Am yagala?" "Biniyala." Boge i kamtuli posisikwa. Igau i keiita i livala, "Ku tuvaluwa. Bi ma guyau, taga ku kokola, ku tuvaluwa, yaegu bi yobwailigu." Igau i keiita i loki la guyau, "Kwatuli? Boge i tuvaluwa."

I tokaya togega i lokaya o dogina kai.
 I meiki matouna i kwani. I kwani i wokuva i vabu
 i meya o pwaipwaya. I katuyuvisi i la kayuna, i
 kanamwa o la bwala. I lolo latula Binyala o luvi,
 i lokaya la bwala tamala.

I kikeiwosisa o valu i keibiga Biniyala,
 "Ba keiwosi." I kikeiwosisa igau, i ma kadala,
 i doki bi keimali bi lau. Togega i yusi latula,
 peila i bani. Igau lei yam i keli vaiguwa, i lau
 i seiki togega. I peiki, "Vaegu latugu, bi sisu
 wala." Ei yam i lapulasi, i tokayasi i lola,
 i kalobusisa Kaduwaga. I gisi kwaitala bwala
 kwaiwokuva, i gisi kwaiyuweila bwala kwaiwokuva.
 Igau i lokaya la bwala kadala. Boge i masisisi.
 I keiita i kau kova, i gabu la bwala kadala.
 Igau lei yam, i gisi veyola i lausa. I tokaya
 Biniyala, "Ba la o gu valu, ba sili, ba guyau."
 Kaduwaga i meya tamala, togega. I simwa i sigaga.

(Mautusina Bometu tolela Yalungwa i livali)

Tovileu

Kaitala la valu Dokinikani, kwaitala si valu tomota. I valulu la kwava, i uni tau. I valulu siviyuweila, i uni vivila. Kasitaiyu luleta i simweisa i sisusa. I kariga tamasi, i kariga inasi. Kasitaiyu luleta si bagula viya wala. Kaiveaka viya Molilau-uyuwa. I karigasi tamasi, inasi, i simweisa kasitaiyu luleta.

Ei yam i la, i poula luleta, i laga vivila memana, i kalipu kaitala kasi viya, i meya i vakata. I seila i gabu kasi kabwasi sola luleta. I kam i semwaga luleta kala kabwasi. Ei meya inia i sulu luleta. I kwayavi i yaya, i yaya kasi viya deli kasi inia. I seweisi i kamsi. I masisi, lei yam i luki luleta, ~~ba-a-poula~~"Ba la a poula, ku laga kwalipu kaitala kada viya. Ku meya, ba meya inia, bita gwabu kada inia."

I la i poula, i la luleta i kalipu kasi viya, i meya i seyeli o si bwala i vakata. I vakata, i seili i gabu kasi kabwasi, komwaidona i semwa i kumli. Boge i lalavi i ma luleta, i meya kasim inia i sulu luleta. Sulusulu i kwayavi i yaya, deli kasi viya kasi inia i kamsi.

Dokinikani bwaina i sunini wala o la odila. I sunini wa keda i tola, i gisi umseu vivila i vakata. I keibiga Dokinikani, "O ~~au~~aila la umseu i bwaubwau. Taga la vinau tomota. Mitaga availa ei bwabwau la kova. Bwaina ba loki a gisi." I weiki vivila, boge i menu i kulikwali kasi kabwasi sola luleta. Dokinikani i tadoiyai o kalapisila, i keibiga, "Vi! Avai som?" I keibiga vivila, "Gala. Kamataiyu luguta." "Lumtaga ambeisa lei mwa?" I keibiga vivila, "Ei la i poula, kalamwaleta wala." "E E!" "A kabwasisi kama viya kamataiyu luguta." I keibiga Dokinikani, "Vi! Kwalima pilatala kami viya a kamkwani."

I kwali vivila, i seiki. I seiki i koma, "Wao! I gada kayogu, kaigegeda kam miya. Ku kwalima piliyuweila a kamkwani." I kwali i seiki. I seiki i koma Dokinikani, "Wao! Gegeda kam miya, ku sakeigu a koma, i gada kayogu. Kwalima pilitolula a kamkwani." I koma i vinaku, "Vi! kwalima pilavasila kam miya a kamkwani." I kwali pilavasila, pililimala, i seiki i koma, i keibiga, "Wao! Mwa, gegeda kam miya ku sakeigu a koma, i gada kayogu." Bogwa i vinau kasi viya luleta. I keibiga Dokinikani, "Lumtaga?" "Ei la i poula." "O ku sisu, ba laga. I wa. Gala i la o lu valu, o si keda Podilalavi i simwa."

I lagiga luleta kala weuwa, "Weu! Weu! Boge i meiki o matala Dokinikani. I tokaya Dokinikani i keibiga, "A pilasi! I kau kaitakewa kasi inia, i lau o lu valu. I nanotaga luleta, i meiki i sisu luleta, i keibiga luleta, "Kada inia bogwa i kau Dokinikani, ei lau o ~~wala~~ lu valu." "O kada viya, bogwa i vinau ei koma, lei wa."

I yaya kumkumla, kasi viya sola luleta i kamsi. I kamsi ei bogi, i masisi i kanamweisa. Lei bogi i mimi tamasi inasi bilomasi. I keibiga la kwava, "Lit^udayasa i yogageisa wala uwasi Dokinikani." I masisisi ei yam, i keibiga la mwala, "Ba la a guguya kaukwa menana, ba sewa wa viya, i sili wa pusagala viya."

I masisisi ei yam, i keibiga luleta, "I yam ba la a poula, ku laga kwalipu kada viya kai-veaka, ku meya, ba meya kada inia bita gwaba." I losa i kalipusa kasi viya, i kelisa, i likubalisa viya. I sunapula kaukwa, "Hau! Hau!" "Sena n-
gasisi kaukwa!" I keibigasi luleta. "Ku weya i kana-mwa, ku yobwaili." I simweisa, i kalipusa viya, i bwabusa viya, i gebila luleta, i keula matouna. I kausa si kaukwa, i lausa o valu. I seilasa

101
kaukwa wa pweya. I vakata kasi viya. "Ku vakata, ba
laga a poula." I la i poula luleta.

I vakata i bwau la mseu. Dokinikani i
kamwanana, "Ba loki a kam viya." I lolo, i kalo-
busi o si valu. Sola luleta i meiki vivila, bogwa
i kulikwali. I keibiga Dokinikani, "Bogwa ku menu,
ku meya pilatala viya a kamkwani." I kwali vivila
i seiki Dokinikani. I tokaya Dokinikani, "Wao!
Wao!" "E kwemali kami viya i kanali. Ku mweya
o taboda." I yosali viya. I vavagi vivila, "Ka!
lei wa kam miya." I tokaya kaukwa, "Wao!" I
koduduni wowola Dokinikani. "Kwemali ku sewa, ku
tavina ku lau o tatom, igau ku yosali a kamkwani."
"Ka!" I yosali. Mwada bi kau, i tokaya kaukwa,
"Wao! Wao!" I koduduni yamala, kaikela. I luki
luleta bi sewa, i ~~k~~keibiga, "Kwemali kami viya,
som lumta boge lei ma, ba laga." I vitubwalola
Dokinikani, vivila i luki kaukwa, "Ku wekeya tuwam,
ku gisi bi lebu kada iniasi."

I lolasi, i mitavila Dokinikani, i supwe-
puni kaukwa. I losa o kadilalavi, i vakanasa, o
si keda matosina, o la keda Dokinikani. Dokinikani
i sili o kadilalavi. Tulatulasi, i lagisa kala weuwa
luleta i sakaula. I lagisa siviyuweila kala weuwa.
Bogwa i makaya o matala Dokinikani. I tokaya
Dokinikani, "A pilasi, apilasi, a pilasi! I kau
inia. I tokaya kaukwa, i koduduni matala, i gigadi
tapwala, i gadi kaikela, i gigadi lopola, i
koduduni tomwaidona, buyavi wokuva wowola Dokini-
kani. I lai kaitakewa, i sakaula Dokinikani.
Kaukwa i wekeya, i bokovili i lau wa keda.

Dokinikani i dou Tokosikuli, "Ku ulemwa bwala,
Ba wa." I vavagi Tokosikuli, "Ku tokaiwa. Ku dokila,
gala titolem. Lageila ku tokaiwa." "Woi!"
"Ku ulemwa bwala. Buyavi i wokuva wowola, kaukwa
i gigadeigu!" I ulemwa bwala Tokosikuli. I sakaula.

i weiki bwala bogwa i kapwagega, i suvi Dokinikani. "Tokosikuli, kwatubwadi bwala bi towa kaukwa." I la wa bwala, i katubwadi bwala. I gogwau kaukwa, "Wao! Wao!" I gilagela i bogi kaukwa. I lulu yeyuna kaukwa. I lulu i sagi o tapwala bwala, i laga kaukwa, i loki bwadala, i kamsi kasi inia. I kam menana toya bwadala.

I valam Dokinikani i keibiga, "Tokosikuli ba popu" I keibiga Tokosikuli, "Ku sunapula." Mwada bi ulemwa bwala Dokinikani, ununu i tatai wa bwala. "O Tokosikuli, menawena wala i toto." I keibiga Dokinikani, "Tokosikuli ba bwesi." I keibiga Tokosikuli, "Ku sunapula, ku wa, ku bwesi." I ulemwa bwala Dokinikani, i gisi ununula i tatai. "O Tokosikuli menawena i toto."

Dokinikani i sisusa kasi yam kasi bogi. I somata molu Dokinikani i kariga wa bwala. Tokosikuli i kariga o si bwala. Kasitaiyu wala i karigasi, i simweisaga luleta kasitaiyu deli si kaukwa. I kamsi kasi inia, kasi viya. Bwaina i sisusa. Bogwa i kariga Dokinkani i manum uwasi sola luleta.

(Tovileu lei kukwanebu)

NAVAVILA

Tovileu

Tamala, la kwava, latusi taitala i sisusa Wawela. Tamala Navavila. I sisusa bogwa latula i kapugula. I sisusa i losa wa bagula. I keibiga tamala, "Ku gebila da uli, bita la ta vaula." I lolasi i kalobusisi o buyagu, i keibiga tamala, "O latugu, ku gisi makaina butia kailala, ku la ku weya kam butia." "E, ku tota igau a weya agu butia." I toto tamala, i mweina wa butia, i topela latula o sisila kai, i gisi wila, i keibiga, "Wa! Ina natinidesi tuda kalaga." I keibiga latula, "Ambeisa?" Ei yowa i mwa, bogwa lei la? "O ku weya tamagu, wanegu." "Gala. Bogwa lei la."

I koana tamala. Latula i topela o sisitala butia. I topela i gisi wila tamala, "Wa! Natinigesigegila, ba yousi wanem." I keibiga latula, "Ku yousi tamagu wanegu." I keibiga tamala, "Woi! tuda mwada ba yousi, boge i la."

Makaneki i topela latula o sisitala butia, i weya kala butia. I koana tamala, i gigi latula, "O latugu, natinidesi nakwewaya." "Ku yousi tamada waneigu." I udu wadola tamala, i keibiga, "Ku busi ku ma, ku weya kam butia." I busi latula, i toli o pwaipwaya. I tokaya tamala, i yousi latula, i seili keya latula. I valam latula, "Kwatudewa." Katudewa boge i wokuva, i keibiga tamala, "Ku saisuya kam butia, ba mwaga ba vaula da uli."

I valam latula. I la i vaula tamala. I valam latula, i loki inala. I keibiga inala, "O kaigala latugu ei valam lei ma. Avaka i vigaki latugu." I kalobusi o valu latusi, i keibiga inala, "Avaka ku vagi, ku valam?" I keibiga latula i mtoki, "Yokwala buku lokaya um mwala, bu kwaitasi, a mwaga, ku lukweigu la lokeyaa"

I katubayasa latula, kala mwasila bi

bi tamwau. Katubayasa i wokuva, i gebila la moi, kala kwasi, kala vana, la guguwa komwaidona, i vitubwalola. I luki inala, "Ku tokailigu bita wa." I keibiga latula, "Ku siwa, kweiya um mwala, ba laga a kiwada."

I lolo i kalobusi Obulaku. I vina, "Navavilo Navavilo Tete Biyou Tete Biyou Kibi Minutolu Vabusi Navavila Tamagu Kwatukwekwa Kapatu Yakaikoma Tamagu Kwatukwekwa Kapatu." I keibigasi MiliObulako, "Mineinala tau! Yumyam latuda ta mweiki. Lageila i kugwa tau, i mweiki latula. Ku ma igau ku veiwasasi." "O gala. Ba la Kilivila."

I vitubwalola, i kalobusi Kwabula, i vina, "Navavilo Navavilo Tete Biyou Tete Biyou Kibi Minutolu Basigu Navavilo Tamagu Kwatakwekwa Kapatu Yakaikoma Tamagu Kwatakwekwa Kapatu." "O tonagowa, Yumyam latuda ta mweiki. Lageila tau i mweiki latula mitaga latuda ludeta. Ku ma ku veiwasasi." "O a peiki, ba la Kilivila, a kiwadi."

I lolo Ilailima, i kalobusi i vina, "Navavilo Navavilo Tete Biyou Tete Biyou Kibi Minutolu Basigu Navavila Tamagu Kwatakwekwa Kapatu Yakaikoma Tamagu Kwatakwekwa Kapatu." I keibigasi M'Ilailima, "Mineinela tau! Yumyam latuda ta mweiki! Ku ma ku veiwasasi!"

Inala o luyeki i lilolo. I kalobusi Yalungwa latula i vina, "Navavilo Navavilo Tete Biyou Tete Biyou Kibi Minutolu Basigu Navavila Tamagu Kwatakwekwa kapatu." "Ku ma ku veiwasasi." "O a peiki, ba la wala." I vitubwalola. I kalobusi inala Yalungwa, "Ku giseisa latugu?" "A menawena lei mwa, luku maga." I lolasi, i tota Kaulagu, ma keda-la Luveikwau i katusuki. I lolo o raibwaga i valaguva, Luveikwau wa luma i sili. I wewa inala. I siweisa, i valemsi. I valemsi i simlasi. I keibiga inala, "Latugu, ku gisi kutugu."

I kenu o kaikela inala. I simwa i gisi kutula latula. I kakutusi i masisi. I mamata i keibiga latula, "Ku ma a gisi kutum." I kenu inala i gisi kutla. I gigisi bogwa i masisi. I masisi bogwa i uguna. I vaguli latula. I masisi tuveila, gala i vaguli siviyuweila, i vakalisa inala, i kenu o pwaipwaya. I tokaya latula i katubayasa kala mwali, kala vana, kala kwasi, la vaiguwa, komwaidona la guguwa i sikam i wokuva. I teta o kabilabala.

I tola i keibiga, "Kwauwe, kwauwe ba layewa dabegu, ba layewa agu vana buku komasi." "Ku layema." I lai kala vana sinitana sinitana. I seilisa. I keibiga, "Kwauwe Kwau ba layewa dabegu, buku komasi." I keibigasi kwau, "Ku layema." I lai dabela, i komasi i wokuva kwau. I keibiga, "Kwauwe Kwauwe ba layewa ula lisainuya, buku komasi." I keibigasi kwau, "Ku layema." I lai la lisainuya, i komasi i wokuva. I keibiga vivila, "Kwauwe kwauwe ba kapusi tomwaidogu, bu komeigusi." I keibigasi kwau, "Kwapusima." I kapusi i weiki kwau. Sinitana sinitana i komasi.

La solia i visoki inala. I mamata inala i gisis latula boge i komasi. I kapusi inala i wekeya. I tokayasi kwau, i komasi inala boge i wokuva. Matouna Gum Wawela gala latula, gala la kwava, i simwa. Boge i karigasi latula, la kwava.

(Ta doki Tovileu lei kukwanebu)

OLUBEKU

Tovileu

Olubeku la valu Dokinikani, koya i keula. Olubeku i siwa o pwaipwaya. I koma tomota, i vilutu i vinaku; taitalaga vivila i kapeli. Dokinikani i nei, o valu i nenei, taga menana i la kwoyatala koya o kabulula i siwa. I uni kaukwa, i uni tomota. I uni taiyuweila tomota, i siweisa.

I sisusa bogwa i ulatilasi, i ulatilasi toveaka, i lukweisa inasi kawasi, "Inamasi, avaka valu ta sisusa?" I keibiga inasi, "Dokinikani i koma tomota i vinau. Agumwaleta la ma a supwepuni. Tabwa ku lolasi, bi gisem Dokinikani." I simweisa.

I sisusa bogwa i toveakasi, i keibiga tuwala, "Makaina avai kai?" I keibiga inasi, "Makaina mili-kutu da kayala tau yakida. Ta basi kabilia ta kovi makaina, bwaina buku teya ma kayala." I likubalisa makaina milikutu. I kovisa i wokuva i tapelasi, i lausa o valu, i taisi si kayala. I tataisi i vanokisa. I teya matouna la kayala mitilaiyu, i teya bwadala la kayala mitilaiyu. I seilisa si kayala. Luvalima i selava la kayala tuwala, luvalima i selava la kayala bwadala. I vagisa i katala.

I keibiga inasi, "Tauau, ku kovisi kayala, ambeisa buku mweisa?" I keibiga tuwala, "Baka la ka gisi Dokinikani. Ei yam i silasi o si waga, i keidodigasi si kayala. I keidodigasi i wokuva, i keibiga inasi, "Tuwami buku lausa kaukwa!" I keibiga tau, "Bwaina bi siwa tuwama." I keibiga inasi, "Buku lausa tuwami." I didagisa, i keibiga inasi, "Buku losa o kabulula Lakaluwalawa, ku kotasi, buku valaguvasi. Buku sili Ligagasa, buku weiyasi Dokinikani bi kariga. Ku lukweisa tuwami kaukwa bi pilasemi.

I lagisa i wokuva, i ulawolasi o Laka-luwalawa o la valu Dokinikani i kotasi i valaguvasi. I seilisa o kayola si kayala, i laguvasi wa koya o dabana. I lausa si kayala. O tapwala keda i seilisa luvayu. I lolasa o tapwala keda i seilisa luvayu si kayala. Bogwa wa koya i seilisa luvayu. I lolasi o talila la valu Dokinikani i seilisa luvayu.

I keibiga tuwala, "Makaisina luya o la valu Dokinikani i totasi. Ta mweinasi wa koya, ta topelasi wa luya, ta gisi Dokinkani." Toya bwadala i tolisa o dogina luya, i giseisa Dokinikani i tanei la valu. I kiuyasi yatala luya i laisi o talila, i tu. I kau Dokinikani miyana luya, i gisi, "Miyawena luya makawala tomota i kipinisi." Gala i koana i gisi. I tulasi gala, sola bwadala sitana bi koana Dokinikani. I kiuyasi yayuweila luya, i laisi i kapusi o talila Dokinikani. I kana i kau Dokinikani. I gisi i keibiga, "Miyawena luya makawala tomota yamasi i kimsisi." I koana Dokinikani, i gisi yoyu i uwayagi-la. Gala i gisi tauau. I uwu yagila siviuyuweila, i uli yoyu, i gisi. I katupoi, "Tauau, avai tauau yokwami." I keibigasi sola bwadala, "Gala, om sisuna wala ka sisu." I keibiga Dokinikani, "Am tolemi?" "Gala. Om sisuna wala ka sisu." "Avaka ku vagisa?" U sola bwadala i keibigasi, "Gala. *Ka ma, ka gisem." I keibiga Dokinikani, "O ku tolisa, igau a mwa a katubayasa."

I suvi o la bwala Dokinikani, i pisi la memetu. I pisi i didagi o luvataga la memetu la kayala. I keibiga, "Ku tolisa, igau igau ba wa a gisem." I mweina mwada bi loki o tapwala luya. I vakana luya Dokinikani bi mweina. I kapitunisa bikwatala luya, i wai o pwanetala. I seilididi

o pwaipwaya, "Igau a koma luya." I koma luya i wokuva i mweina. I kapitunisa bikwayuweila luya i wai o pwanetala, i sedidi o pwaipwaya. I keibiga Dokinikani, "Igau a koma luya." I koma i vinaku. I mweina o tapwala luya. I kapitunisa bikwatolula i wai o pwanetala, i sedidi o uula. I koma luya i wokuva, i keibiga Dokinikani, "Ku tolisa." I toli Dokinikani o uula luya, i kilai kaitala memetu, i seki piātala yoyu, i kapituni i wokuva. I kau pilayuweila memetu, i lai. I tab-aisi kasitaiyu bwadala, taga i seiki yoyu i kapituni i wokuva.

I nanamsai kasitaiyu bwadala. I keibiga tuwala, "Sogu, ta tola wa koya. Bi valutu i lai memetu, bi kapituni yoyu komwaidona bogwa bita karigasi." I topelasi sola bwadala wa koya. I doki Dokinikani i totasi wa luya, i kilai memetu. I kilai, i kilai i kapituni kayola luya. I kapituni i kapusi luya dabwana. I doki deli tomota. I mweiki, gala, kaiwokuva luya.

I keibiga Dokinikani, "Tauau ambeisa ku mweisa." I keibigasi sola bwadala, "Gala ka sakaula, mayakama ka toto wala." I keibiga Dokinikani, "Ku tolisa tabugwa, igau a katubayasa." I valugwa la memetu, i seili o vataga, i lolo. "Ku tokailigusi bita weiyasi." "Ku ma bita mweisa." I laguva Dokinikani, i laguva o dabwana koya, i toli. I keibigasi tauau, "Igau ka lova ma kayala." I lovasi kasitaiyu bwadala. I lovasi i kagunugunu Dokinikani i luveimwa. I keibiga, "Ku tolisa, igau a lova ula kayala."

I keibiga tuwala, i luki bwadala, "Bi lova ta kanamwa pilatala keda." I kilai Dokinikani. I lai, i kauwasi, i takubilasi. I takaiwa pilatala

keda. I lolasi, beisa i seilisa si kayala i tovilasi sola bwadala. I tolisa i keibiga Dokinikani, "Tauau!" I tovilasi i lovasi si kayala sola bwadala. I kagungunu i vinaku si kayala Dokinikani, i keibiga, "Ku mweisa, ba lova ula kayala." I seiki kaitala memetu i lai, i budi pilatala kai i takaiwa memetu makaina. Tauau i kanamweisa pilatala keda. O dabala koya i tovilasi. O rokaiwa i totasi, Dokinikani o tiniwa i toto o kuvalila koya. I lovasi si kayala. I lovasi, i kagungunu i wokuva.

I keibiga Dokinikani, "Bogwa lei wokuva mi kayala." I keibigasi sola bwadala, "Bogwa lei wokuva ma kayala. Kaitinidesi ma kayala. Kwapwagega ba lova." I keibiga Dokinikani, "Bogwa lei wokuva mi kayala, lageila buku sopasi." "Kwapwagega ba lova." I keibiga Dokinikani, "A kapwagega." I keibiga tuwala, "Ku meya a lova." I yusi kayala bwadala. I kapwagega Dokinikani, i lai la kayala, i waiya o bubwawala Dokinikani, i kaliyau. I lou, i kapusi, i la i kanamwa. I sakaulisa sola bwadala, i kalobusisi o kwadewa. I lukweisa tuwasi kaukwa, "Ku la ku gisi Dokinikani wa koya, kaina bogwa laka weiya."

I sakaula kaukwa tuwasi, i sakauli i loki i gisi. I keibiga kaukwa "Wao!" I gisi Dokinikani bogwa i kariga. I loki i nunu buyavila Dokinikani. I kapituni kayola kaukwa, i sakawali kununa makwaina, i kalobusi koya o luwalawa. I keibigasi sola bwadala "Bogwa ta weiya Dokinikani." I seyeili kaukwa debana o kanakenuva. I tabusisi sola bwadala i losa o bwarita. I sakaula kaukwa kala leiya senela, i sakauli o kabulatala kwadewa, i sakauli o kabulayuweila kwadewa, i keiita i ma o luala.

I giseisa i titayeni kanakenuva. I titayeni boge lei wokuva i manum lopola. I kenu menana kaukwa. I losa bwadala i talaguvasi, i kausa debana

Dokinikani, i didagisa o si waga. I lupisa tuwasi kaukwa o si waga, i seilasi o si waga, i ulawolasi o si valu, i lokayasa inasi i sisu. I kausa debanela Dokinikani i sakeisa inasi, "Inamasi, matouna?" I keibiga inasi, "Avaka kwigakeisa?" "Bogwa laka weiya, laka meya. Bwaina ku soguguwa, ta lokayasa la valu Dokinikani, ta sikeisa."

I soguguwa inasi, i kedodiga la waga, i pela inasi i sili. I wolasi o Lakaluwalawa, la valu Dokinikani, i kotasi. I valaguvasi Olubeku i silisa. I wakeisa la beku Dokinikani, la vaiguwa, la guguwa. I sigwalisa si valu toya inasi i sisusa. Bogwa i manum uwasi toya inasi. I kamsi bwaina, i bagulasi, i poulasi kasi inia. Boge i siweisa.

(Tovileu i kukwanebu)

ILUMYUWA

Vivila nayoyowa mei sikeya OMyuwa, Dokinikani mei sikeya Mmwa. Yam, bogi i bubula wala. I kokolasi MiTukwaukwa, MiSilaketa. Gala i poulasi M'Obulaku. I kokolasi gala i poulasi peila bubula Dokinikani, Mmwa i sisu. MiTukwaukwa gala i poulasi, MiTeyava, M'Oveyova i sisusa wala o si valu. Bogi, yam i bubula wala makawala lampa.

I sisusa i somatasi vikeya. I keibigasi, "O aveila bi sinapusa Dokinikani bi kariga, ta losa ta poulasi sitana kada iniasi?" I yowa butula Dokinikani i la OMyuwa. I lega IluMyuwa nayoyowa, i keibiga-menana, "Bwaina ba la a gisi." I yalima kaila Gawa. OMyuwa i pela i sili, i yowa i ma Gawa. I yalima kaila Kwewata. I pela i sili, i yowa i ma Kwewata. I yalima kaila Iwa, i pela, i sili, i ma Iwa, i vina IluMyuwa, "Tetete O BusiBusi Dodou Igila Susauwiwi Kubola Kubola O Manua Teta Manua Lopakai LOMyuwa Gita Gi Availa Dauweigu Na Mai. Yokwami vilemi Iwa ku dousi la ma." "Gala. Ei dousi Vilesi Kitava."

I yalima kaila Kitava. I pela i sili, i sisu Kitava. I yalima kaila Obulaku. I pela i sili, i sisu Obulaku. I keibiga IluMyuwa, "Availa i dauweigu la ma?" "Gala. Vilesi Wawela, ei dousi luku ma." I yalima kaila, i pela i sili. "Yokwami Vilemi Wawela, ku dousi la ma." "Gala. Vilesi kaina Silaketa, i dousi ku ma."

I yalima kaila Sinaketa. I pela i sili, i vina IluMyuwa, "Tetete O BusiBusi Dodou Igila Susauwiwi Kubola Kubola Manua Lopakai LOMyuwa Gita Gi Availa Dauweigu Na Mai." I keibigasi vilesi Silaketa, "Ku valapula, ku toli Kaikuyuwa, ku gisi i bubula Mmwa."

I valapula Kaikuyuwa, i toli i gisi, i kei-biga IluMyuwa, "Yakomada gala i meisa i poulasi, sena i bubula. Kaigi sena bubula." I yalima kaila Okaiyaula. I pela i sili i vina, "Tetete O BusiBusi Dodou Igila Susauwiwi Kubola Kubola Manua Tete Manua Lopakai IluMyuwa Gita Gi Avaina Dauweigu Na Mai. Yokwami vilesi Okaiyaula, ku dousi la ma." "O guyau gala poula, ka sisusa wala. Bogi i seibwadi ma simlasi. Ka sisusa wala. Gala ka poulasi." "Bwaina ba loki a gisi." I keibigasi vilesi Okaiyaula, "O guyau, ku loki ku gisi, kaina bi lapem."

I yalima kaila Mmwa, i pela i sili. I gisi, i gigisi Dokinikani. Bogwa i yowa menana IluMyuwa, i yowa i weiki Dokinikani i bubula kwoyayu yamala. I yousi matala Dokinikani, i yowai. I lupi Dokinikani. I lulupi wa labuma, i kilova IluMyuwa. I kilai i kapusi Mmwa i la, i katumati, kanukenu.

I yalima kaila Okaiyaula i sili, i kei-biga IluMyuwa, "Bogwa O ku lagisa butula." I yalima Sinaketa, "Bogwa O ku lagisa." "Bogwa sitana baka poulasi, baka kavigodasi, baka kamsi inia. Guyau, ku ma ku sunapula i kariga. Buku weisaga ka poulasi sitana kama inia."

I yalima kaila Wawela. I pela i sili, "Vilemi Wawela, bogwa ku lagisa butula." I yalima kaila Obulaku; i pela i sili, "Vilemi Obulaku, bogwa ku lagis butula." "Bogwa ka gāsi. Sitana baka kamsi inia, Guyau. I yalima kaila Kitava. I pela i sili, "Vilemi Kitava, bogwa ku lagisa butula?" "Bogwa laka lagisa." I yalima kaila Iwa. I pela i sila, "Vilemi Iwa, bogwa ku lagisa butula?" "Bogwa na ka lagi." I yalima kaila Kwewata. I pela i sili. "Vilemi Kwewata, bogwa ku lagisa?" "Bogwa naka lagisa."

I yalima kaila OMyuwa. I pela i sila, i keiita o lu valu. I la i sisu OMyuwa. Bogwa i manum uwasi Mi-Silaketa, M'Okaiyaula, M'Obulaku, MiTeyava

MitTukwaukwa, M8Oveyova. Bogwa i manum uwasi, i
papoulasi yam, i papoulasi bogi, i keibigasi,
"Gala bita keibiga, Ilumyuwa lei ma, i sinapu
Dokinikani, i kariga. Bita papoulasi, bita kamsiga
sitana kada iniasi.

(Taitala i kukwanebu)

TOGATU

Tonleu

Mei sikeya Kaulasi la valu komwaidona la kwava. Tailima la kwava Togatu, tailima la kwava Dokinikani wala. Togatu deli taivasi la kwava bwaina wala. Taitala vivila i sakaula i la wa dubwadebula. I suvi ila i supwepuni. I siwa o dakuna o lopola.

Togatu i bigubagula toya la kwava. I sisu vivila o dakuna i suma. I uni latula, i valulu vivila. Togatu i la i papoula. I meyaki la kwava i kamkwamsi. I sisusa kasitaiyu latula. Bogwa i kopwi i wokuva, bogwa i tokaya naminibwaita vivila. Bogwa i lolo, bogwa i pali o kuvalila dabela. I lolo bogwa i naveaka sitana. I sisusa kasitaiyu inala.

Togatu la bagula i lau o raibwaga, beisa i siweisa. Bogwa i kapugula menana vivila, i katu-poi inala, "Inagu, avaka t a sisu beisa?" I keibiga inala, "Komwaidona Dokinikani la kwava Togatu. Tailima taitala Tokosikuli." "Bwaina ba la, i yaweigu orokaiwa." "Gala magigu buku la orokaiwa, magigu bita sisu kadataiyu." "Ba la inada i yaweigu orokaiwa." I sewa inala.

I liluva o dabala dakuna. I sili i keibiga vivila, "O we ma du valu sitana ta sisu. Ta sisu orokaiwa bi yau mata." I sim i sisu i lolo. O raibwaga, i gisi la bagula Togatu, i keibiga vivila, "Kaitala buyagu makwaina." I teta kabilabala, i weiki ulia o raibwaga. I siwa i gudu ulia. I gudugudu i kasewa la vataga, i selava i keula i ma o kabilabala. I sisu i gegela ulia. I gegela i gigiu. I lolo o pwaipwaya i gigiu. Bogwa i kwayavi i keibiga, "Ba loki inaga o ma bwala." I tulatula inala bogwa i kwayavi. I suvi i weiki inala. I keibiga inala, "Avaka sem?" I keibiga vivila, "Igau a gegela ulia". I masisi.

Ei yam i keibiga, "Inagu, ba la a gudu ulia." I keibiga inala, "Ku lolo ku yamata, bi banem Togatu." I keibiga latula, "Gala bi baneigu. Bogwa a supwepuni. A la o raibwaga a gudugudu ulia. Ikwayavi ba loki inagu." I selava kala ulia i lau i suvi o si bwala. I weiki inala, i katupoi inala, "Avaka kasem?" "Bi banema Togatu." "Igau a gudugudu agu ulia." I bogi i masisi, i masisisi sola inala.

Ei yam i keibiga, "Inagu, ba la a gudu ulia." I mamata Togatu, i luki la kwava, "Nunumwaya, ku selavasi uli, ba la a bagula." I selavasi i wokuva, i keula Togatu, i la wa bagula. I bigubagula bogwa i towotu kalasia; "Ba la a kwaluluva e-raibwaga." I weiki i toli o raibwaga. I gisi vivila giula, i giu o kabilabala. I doki mauna, gala giusi tomota.

Ei yam i tokaya i luki la kwava, "Nunumwaya, ku valugwasi kuvi, taitu, uli ba la a sopu." I valugwasi kasitailima wala. I valugwasi i wokuva i gebilasi. I lausa wa bagula. I sipusopu si mwala i meisa o valu. Sipusopu bogwa i wokuva uli, taitu, kuvi, i weiki raibwaga. Vivila bogwa lei losa o si valu. Togatu i gisi giu. I gigisi i kanawa giula i maga. I keibiga, "Nabwaya ba weiya yausa kaina tau kaina vivila." I masisi.

Ei yam i tokaya. I lilolo o raibwaga. I sewa kuvi yagogu. I ligabu i la wa uvea, i laga o la keda vivila. I sisuga vivila, i luki inala, "Inagu ba la a gudu agu ulia." I keibiga inala, "Neumwata yokwa. Ku valutu, bi banem Togatu, bi komemsi la kwava." "Gala. Bwaina ba la a gudubwau." I buyuyu inala. I peiki. "Bwaina ku la, ku weiya kam yausa bi bwaina. Mitaga bi banemsi la kwava, gala bita keibiga."

I lolo. I lilolo o kabilabala, i teta. I teta i la o raibwaga. I gudu ulia. Gudugudu i keula, i meya o kabilabala.

I sili bwaina, i gegela kala ulia. Gegila i gisi Togatu. I tokaya i lilolo o tubwalola. I toli i yousi yamala, "Avai vila yokwa?" "Yaegu Kaluwata." "Ambeisa muku siki um malu?" "Gala. Kamataiyu inagu ka sisusa o dakuna." I keibiga Togatu, "Bwaina ula kwava yokwa." "O gala ku sinapweigu, bi komeigusi um kwava." I keibiga Togatu, "Gala. Bwaina ula kwava yoku. Buku sisu som inam. Mitaga ula kwava yokwa." I simweisa. I sisusa i kwayavi, i lau vivila o kasi nobwala. I suvi vivila, i totaga Togatu. "Nabwaya ba ma, ba vina. Ku nukwali. Ku sunapula ku ma, bita la o bagula." I la Togatu.

Boge i dudubila, i tulasi la kwava Togatu. I keibigasi, "Kasai bagula! Togatu, i bogi ku ma ku kwam. Bogwa i kalobusi lei ma toboma, ku meyeisa kaula i kam." I gebilasi kala si mwala kasitailima wala. I keibiga Togatu, "Nabwaya, ku valugwasi mi kuvi, mi uli, mi taitu, ba la a sopu." I valugwasi, i keula Togatu, i lau wa bagula, i meiki uvea kwaitala, i ligabu kuvi, yagogu, uli i la o uvea. I loki vivila i sisu o raibwaga. I sisusa tatoula.

I bogi i lau vivila o nobwala i suvi, i laga Togatu. I loki la kwava Dokinikani, i katupoisa, "Togatu, amakawala? Gala tokinibogwa, lageila wala ku valutu i bogi ku ma?" "A nabwaya ba la a poula." I keibigasi la kwava, "Ku veiwasu, toboma. Ku loki natana kada iniasi mayu ta kamsi."

Ei yam i la i poula. Papoula i kwayavi i valaguva. I suya navakaveaka kala inia vivila; i suya nakeketoki kasi inia la kwava. I meya i toli o kala nobwala vivila, i vina, "Togatu, Togatu Togatu Mwanena Togatu Yolina Gigi Tonuwanawa Nuwagu I Totu Ku Yauwali." I keibiga vivila,

"Inagu, bogwa lei ma ula mwala, ba loki." I liluva vivila, i meiki la mwala i toto, "Ku meiki kam inia, ku weya ku sulusi som inam. Ba laugwa nunumwaya kasi inia." I sekewa, i takewa.

La kwava i tulatulasi i kalobusi. I pata kasi inia. Pitapata i wokuva i keibigasi la kwava, "Togatu, tokinibogwa ku papoula sena navakaveaka inia, lageila nakeketoki wala." "O ku meya," i keibiga Togatu. "Gagena migim." "Yeki beisa, Toboma, mayelela wala. I meya ta kamsi. I sulusi, i kamsi, i masisisi.

Ei yam i keibiga Togatu, "Nabwaya ku valugwasi mi kuvi, mi taitu, mi uli, ba la a sopu, a vaula." Gabogi i selavasi si uli. I keula Togatu. Kokeula o buyagu i weiki uvea, i lai o uvea uli. I loki vivila i sisu o raibwaga. I sisusa bogwa i bogi.

I keibigasi matosina Dokinikani, "Kasai bagula Togatu. Gala yumyam bi bogi bi mema. Lageila wala i yayousa i bogi ima." I lukweisa Tokosikuŋi, "Nabwaya ku la ku yamata tamam. Sēna bogibogi i mema." Lei yam i keibiga Togatu, "Ku valugwasi yagogu, ba la a sopu." I valugwasi la kwava. I keula i lau o buyagu, i loki makwaina uvea, i ligabu taitu, kuvi, i luveiwa. I laga i loki vivila o raibwaga.

Tokosikuli i lilolo oluyeki. I mitavila Togatu, i supwepuni. I lolo o buyagu i gisi tamala i ligabu kasi yagogu. I keibiga Tokosikuli, "We i ligabu yagogu! Ambeisaga bi mwa?" I gisi i lilolo, i la o raibwaga. I gisi vivila i sisusa kasitaiyu. I lububwaisi. I bweisi Tokosikuli. I vitubwalolaga Tokosikuli. I sisusa, i suya kala

wayala, i suya borogu, i suya kaikawau, i suya kaitagem. I keula i lilolo i weiki inala.

I sisusa madelina Dokinikani, "Woi! Latudasi bogwa lei ma. Kwalai?" "Woi. inagwa! A ku giseisa miyana kaikawau beisa migisi. Ba la a kau kala wayala, beisa kala wayala migisi. Naminibwaina tokomada! I teya nanola Togatu, i sisusa, i bogi i ma. Kaigi sena naminibwaina vivila!" "I keibigasi Dokinikani la kwava, "Kam gudu makwaina. Nabwaya ba ka komemsi." I masisisi.

Ei yam i keibiga Togatu, "Nunumwaya ku losa kwavaisi kada gwabasi. Ba laga a poula." "E nabwaya ku la ku poula, toboma, baka losaga, baka kavaisi kaitala kada gwabasi." I la i poula. I losa la kwava. I kavaisi kasi eimeisa. I lalavi i sulusi, i tulasi Togatu, papoula boge i bogi. I ma i sewa la kwava kalamia. I meyaga nakeketoki kasi inia. I sulusi i kamsi boge lei bogi. I masisisi.

Lei yam i keibiga Togatu, "Ba la a poula." "Ku la ku poula, ka sisusaga." I la si mwala i poula. I simweisaga i lukweisa Tokiskuli, "Ta mweisa latumasi. Bogwa ku sau kala vinavina Togatu. I losa. I lokeisa kasi nobwala, i tolisa i keibiga, "Tokosikuli, ku vina kudidilotala. I vina Tokosikuli, "Togatu Togatu, Togatu Tomwanena Togatu Yovina Gigi Tonawanawa Nuwagu I Totu Kwiyauali." I keibiga beisa inala vivila, "Inagu, ba loki ula mwala bogwa lei ma. I keibiga inala, "Menana kudidilotala ei vina, makaneki kudidiloyu i vivina."

I vina kudidiloyu, "Togatu Togatu Togatu Tomwanena Togatu Yovina Gigi Tonawanawa Nuwagu I Totu Kwiyauali." I keibiga vivila, "Ula mwala bogwa lei ma." I keibiga inala, "Menana ei vina

kudidiloyu, makaneki i vivina kudidilotolu kudula kasatolu. I vina, "Togatu, Togatu Tomwanena Togatu Yovina Gigi Tonawanawa Nuwagu I Totu Kwiya uwali." I vina kudidilovasi Togata Togatu Togatu Tomwanena Togatu Yovina Gigi Tonawanawa Nuwagu I Totu Kwiya uwali." "Inagu bogwa ei vina ula mwala, ba loki." "Gala. Ei vina kudidilovasi, makaneki i vivina kudidilolima." I vina Tokosikuli, "Togatu Togatu Togatu Tomwanena Togatu Yovina Gigi Tonawanena Nuwagu I Totu Kwiya uwali." "Inagi bogwa lei ma ula mwala ba loki."

Dokinikani vivila i tulasi. I tulasa kasai. I vina Tokosikuli bi ma-kaina latula, "O-Togatu Togatu Togatu Tomwanena Togatu Yovina Gigi Tonawanawa Nuwagu I-Totu Kwiya uwali." I luki inala, "Vi! bogwa lei ma ula mwala ba loki." I liluva, i sila o kala nobwala. Dokinikani i tokayasi i yousisa i lausa. I siweisa i komasi. I kamkomasi i vinausa. Kalula wala i kapelisa i mwa i kanamwa.

I losa, i tula inala. Tulatula bogwa i kwayavi, i lagi Togatu bogwa lei ma, i suya kasi inia. I toli o wadola kasi nobwala, i vina, Togatu O Togatu Togatu Tomwanena Togatu Yovina Gigi Tonawanawa Nuwagu I Totu Kwiya uwali." I keibiga inala, "Bogwa lei ma yawagu. Ba la a gisi." I liluva i meiki, Togatu i sisu. "Um kwava bogwa i komasi um kwava." I siweisa i valamsi. I valamsi i simlasi, "Ku kwau kam inia. Ku lau ku sulu, ku kwam." "Kalulala um kwava ba lau a tavidoli. Ku laga, ku sinapu. Bwaina ku la." "Ba laga."

I lola. I lola i kalobusi o lu valu. "O tamadasi bogwa lei ma. Ku makayasa kami inia buku weyeisa, ku sulusa. Bogwa la katoula, ba mwa a keikwala. I vavagisa la kwava, "We!"

Togatu i yotutula la kwava. I wa i kasinapu. I keibiasi vivila, "Papoula beisa toboma i gwegwesi wowola, ku meiki um kwava bogwa kama nusa." I sulusa kasi inia. Sulusulusi i menu, i lukweisa Tokosikuli, "Kwiguli tamam bi ma i kam." I sakaula Tokosikuli i viguli Togatu, "Ku mamata, ku ma ku kwam." I keibiga Togatu, "Ku weisa ku kwamsi, bogwa a katouligaga, ba kanukwenu wala."

I kamsi bogwa i bogi, i luwawala Togatu, i luki Dokinikani, "Yoku kudidilotala, yoku kudidiloyu, yoku kudidilotolu, yoku kudidilovasi, yoku kudidilolima, yoku Tokosikuli ku meisa ikwayavi ku yuvisi ula kova ba keikwala. Bogwa la katoula." "Bogwala!" I kwayavi baka soguguwasi, baka weisa baka yuvisi um kwekwala." I kwayavi i soguguwasi i wokuva, i lokayasa si mwala o la bwala, i yuvisi kova.

I kenu Togatu. I bigatonasi bogwa i lubulata i masisisi. I tokaya Togatu, i koya si bwala i sunapula. I vakanoti kova, i gabu bwala. I gabu o matala, i gabu o kabuluyuweila, i gabu pososiu, i tavina i gabu kaideu, i tavina piliyuweila i gabu, i mweina o kulumwala i gabu. I busi i toli o lopola valu.

I lulu kova i kapusi milimali we takola kudidilotala. I gabu i tokya, "Wi! Kakatala kam nunu Tokosikuli i baseigu. Ku weya kam ununu. Kakatala i kapusi piliyuweila milimali, i gabu kudidilolima, "Kakatala kam ununu Tokosikuli, i baseigu, ku weya kam ununu sena kakata." I lulu bwala komwaidona. I tokayasi Dokinikani, i makayasa keda. Gala. I sakaulasi o tatom, lei wakeisa kova, i sakaulasi o taboda i wakeisa koya. I sesayasi o lopola bwala, i gabu. Komwaidona i karigasi Dokinikani. I simwaga Togatu.

Togatu kalamwaleta i la i keli kasi mesi o la odila. Kilikeli i wokuva i ma i bibiu la kwava, i lau wa mesi i luvalova. Bibiu i wokuva i dubwali pwaipwaya i baku. I simwa Togatu bogwa i kwayavi. I luki yawala bi meya kalula la kwava i seili o kaniku. I katitaki kaniku, i seila wa viga. I katitaki viga. I kau i seila o kaitutuya. I kau i seila o kailuya. Bogwa i katitaki, bogwa i milagwadi. Bogwa i naveaka. Bogwa i kapugula.

I tokaya Togatu, i loki yawala, i vakola. I weiki i keibiga, "Yawagu, bita losa o valu." I keibiga yawala, "Um kwava bogwa i lokaya daula wowola?" I soguguwasi. I lausa o lu valu, deli Togatu i siweisa. Bogwa la kwava kaimapula. Inasi i sulusulu kasi. Togatu i bigubagulasi sola la kwava,

(Tovileu i kukwanebu)

Momovalala mei sikeya Silaketa o mapana Budauwa. Momovalala la mwala Mogwa, latusi Pwasamaluya. Bogwa i naveaka Pwasamaluya, i migai inala bulami, i dagu kala vana latula. I guli i sipu o papai i tatai. Igau i weiki kulula tamala.

Ei yam i keibiga tamala, "Ba lola ba la o buyagu. Usi bogwa i matuwa." I la sola latula. I valilisa i gāsi gumbutia, i luki latula, "Ku mweina kam butia." Latula i mwa i mweina. I gisi latula i topela, i gisi wila. I katugogova. I bubusi i luveimwa. I wa i tolosi. I wekeya i kakaya.

I sikeila dabela i valam. I kasobusi Pwasamaluya, i ma o valu Budauwa, i meiki inala. I luki inala, i mtoki. I kau la moi, i seila o kuluāa. I vavagi i visabwalo Olabema. I vina Momovale Momovale Pwasamaluya Nageila Na Yosina Tamana Nayogibu O Kwadewa Yousi Mogwa Kei Kei O Mamada Minuwala Totowa Gwayagwaya Minuwala Totowa Kwai."

Kwaivau towosi o la valu Olabema i luki la kwava, i keibiga Molaya, "Vi! 'ku yousi vivila bi ma i kiwadi!" I la la kwava o Madamalaga i sisu. I luki Pwasamaluya, i gisi dabela i buyaviwokuva. Vivila i peiki i sisu. I keiitama la kwava towosi, i valam, "O kwaivau towosi i buyaviwokuva dabela."

I kasobusi Bwadela. I vina, "Momovale Momovale Pwasamaluya Nageila Na Yosina Tamana Nayogibu O Kwadewa Yousi Mogwa Kei Kei O Mamada Minuwala Totowa Gwayagwaya Minuwala Totowa Kwai!"

Guyau i sisu Bwadela i lega, i luki la kwava KalaKavea, "Ku ma ku yousi vivila i kiwadi." I la la kwava bi loki vivila i meya. I peiki.

Migawaya i ma i keibiga, "Buyavi i wokuva dabela, boge i bogina. Tu\$"

I kalobusi Gilibwa Pwasamaluya. I mweina o raibwaga. I dou Kwau, "Kwauwe, Kwauwe, ku komeigusi." I kapusi o bwarita. I kamkwamsi kwau i vinausa. O luyeki i ma inala, i meina i keibiga, "Kwauwe, Kwauwe, ku komeigusi." I kapusi Momovale, i kamsi kwau i vinausa. Lei ma tamala Mogwa, i kapusi, i komasi i vinausa.

(Taitala i kukwanebu)

Mei sikeiyasi GumMulusaído. I teyasi si waga Kalala. I walisa i vinakusa i libusa i mwa o bwarita. Lei yam i tolasi Kaibutu, "O Kaibutu Gala Taitala Nagumalawa Gala Taitala Togumalawa Ba Waya I Kam Yabiya Dobu." "Gala gumavegila wala. Ku vasililikewa Oveyova, "Gala Taitala Nagumalawa Gala Taitala Togumalawa Ba Waya I Kam Yabiya Dobu." "Gala. Gumavegila wala. Ku vasililikewa Teyava." "Gala Taitala Nagumalawa Gala Taitala Togumalawa Ba Waya I Kam Yabiya Dobu." "Gala. Gumavegila wala. Ku wekeiyala matosina sola bwadala i sisusa Kokowa." "Kokowa Gala Taitala Nagumalawa Gala Taitala Togumalawa Ba Waya I Kam Yabiya Dobu."

"A e! Yakama sogu bwadagu." "Ku meisa ku silasi." "Igaugwa a makaya kala sopi bwadagu." "A sopi wa waga." "Igaugwa a kau kala mona bwadagu." "A mona wa waga." "Ta totolasi." I totolasi Kaikawa. "Tuwagu, ba mom." "Avaka i keibiga gwadi?" "A bi mom." "O ku kwau miyana, ku sakeiwa, i yayousa i luba lopola." Bi keimali bi meya. Mwada bi koulu. "A a! Gala magigu bi koulu." I tolasi Kaulasi. "Tuwagu ba kam!" "Avaka i keibiga gwadi?" "A bi kam." "O ku kwau manikwaina, ku sakeiwa i yayousa, i luba lopola." Bi keimali bi meya i kanamwa. "Matam ku gisi milaveta kadawanaku."

I tolasi Okulakola. "Tuwagu, ba kuli tou." I kau i seiki mwada bi kouwali, "Ku sakeiwa i yayousa i luba lopola." Bi keimali bi meya i kanamwa. I Tolasi wa vadila. I kariga bwadala. "Ba mwa, bwadagu bogwa lei kariga." "O ku lai bi wa bi tamwau." I lupi bwadala, i kopwi, i lai o kaisai. I kipu mitilagila i kapusi. "O ba mwa, a kapusi." I mwaga wa vadila, i luki Gumasilalaya, "Bukula. Nasigavila

buku ma? Nabwaya ba la a lai pali. Bogiu ma ma."

I lau bwadala. I mweina wa vadila i tavisi. I kakupwasi i seiki bwadala. I seiki bwadala i mom. Bogwa lei bwaina. I teiyasi si kayala kwebakwebila. I giseisa tolam i lavai oilalima tuwala, oilalima bwadala.

I keulasi i losa, i giseisa Tobumyou tapwala lei kakata. I luki bwadala, "Ku la ku yaya da kova, ku meya ta kabwasi kada inia." I kau kamtomata i weiki Tobumyou, "Availa yokwa?" "Yakama sogu tuwagu, i yogagama Gumasilalaya, a ma a yaya ma kova, ba lau baka kabwasi kama inia." "O ku lokaya ku meyeisa a gabu kami inia som tuwam." I lausa i gabu kasi inia. I kamsi i wokuva, i teya tokwalu.

I katupoi bwadala, "Avai yam bi ma?" "A nabwaya." I lausa tokwalu o matala Kulakola. I towa.

I kewa matouna Gumasilalaya, i ma o talila menana tokwalu. Tokwalu i katugogova, "U u u u u Gumasilalaya e e e um kwava kwaya, koma kam popu, a kwaya wadom." I keibiga, "Tga Taga ku tokeiligu." I tobusi i bokavili. I mweyaga tokwalu, i kivili matala. Bogwa o lumwalela o la odila i biya. I silasa matosina i yogagi sola bwadala. I ma matouna matala matala i keibiga, "O bwadagu, ku meyeisa a sila." I keibigasi, "Yokwala ka gisi um kwapwapota sogu bwadagu." I kewasi.

Gumasilalaya i ma o valu, i keibiga Tobumyou. "Ku la wa bwaima." "Ku ligeiwa." Menana i kau kasosau i wawai. Lei meisa Dokinikani kudililotala kudililoyu, kudililotolu, kudililovasi, kudililolima. "O inamasi gala kada tau, gala kada bulukwa, bulukwa ta kam, kada tau ta kam." I sikeilasi i ligaisa. "Ku sikeilewasi. Bwaima kakatala kam gwabala la basi." Komwaidona i yousisa i kamkwamsi i vinausa.

Mwakasali

I uni vivila taiyu wala. I sisu deli tamasi. Lei yam gabogi i luki bwadala, "Ku ma tamada ta lupi, ta weya o kabudoga. Bi sisu, bita laga ta kapukwanadasi." I losa o la odila. I giseisa bwabwau makwaina, "Ta loki tamada! I kuniga i kaligeyai tamada." I sakaulasi i makayasa tamasi i sisu. "Ta lupi bi la wa bwala, igau ta vakam, ta wa wa poula kada inia ta kam." I masisisi.

Ei yam i losa. "Igau ta lupi tamada." I lupisa tamasi, i meisa o kabudoga. I losa i kapukwanadasi. I makaya bwabwau. "Aiseiki i kuna? Wo! Tamada boge bi pwagiyaki." I sakaulasi i makayasa tamasi boge i kaligeyavi. I simweisa i keibiga tuwala. "Pekikewani bita valam tamada. Mitaga i sisu Dokinikani o raibwaga, i lukweigu tamada." Igau i valam tuwala i kapiyekwani. Igau i valam bwadala i kopinaveaka. I vagi tuwala, "Kwapiyekwani ma malam. I lukweigu tamada makawala." Igau i kenusi i bogi, i luki bwadala makawala. I masisisi.

I nanamsaŋi Dokinikani la kwava, i dokeisa igau i masisi si mwala, bi tokaiweisa bi losa bi litakeisa tuwala, bi vavagisa tuwala i lupaki wa yagigila i kenu. Lei yam gabogi i tokayasi i weisa, i simwaleta Dokinikani, "A ku sisu, baka la, baka kavigoda, baka meya baka gwabasi." I losa i sausa vigoda. I sausa kwegingini pwadau. I seilisa o dabala vataga.

I katupoi si mwala, "Avaka manakwa?" I livala Dokinikani, "Kala neneu bwadada." "Avaka kwigiyaki?" "A kapituni. Waibitu a bunini kala neneu bwadada. Ameya bi sulu. Mitaga ta gubakaeisa kada kaikweluvasi. I vagi Dokinikani

tuwala i luki bwadala, "Ku sekeimwa kaikekita kala neneu, bwadada; mitaga yaegu makaina kaiveaka kaiposa nabwaya ba koma."

Igau tuyeila i losa i kavigodasi. I katupoi vigoda kwegingini. I vagi sola bwadala, "Boge la kipini kala neneu tuwada. La meya bita komasi." I sulu i komasi. "Nabwaya yokwa kaiveaka kam neneu bita kipinisa kaiposa. Ta gubakeisa kada kaikweluvasi." I masisisi.

Lei yam i luki bwadala i la i kapituni matala waibitu. Dokinikani boge i ma o mitasi i lukweisa, "Kala pwadom!" I kausa waibitu i kweivisuyeisa o kala neneu Dokinikani. I vavagi Dokinikani, "Waa! Yakaiyei, yakaiyei! Waa! " i kariga.

(Mwakasala i kukwanebu)

Mei sikeyasi Teyava u sola inasi Molailawa, Sopi. I kovisisi wola ulameku. I keibiga Sopi, "Ku wola? Galatoluguta yoku. Tokwabu yoku, peila gala ku kwadau." I keibiga Molailawa, "Ku lolo." I masisisi.

Gabogi bogwa bi yousisa waga i silasa, i tokaya o si kuma wa luma Molailawa. I yakala Sopi, i livala, "Ku la o la bwala waga, yaegu ba wola." I wolasi i losa o bwarita yagala Kaibwatutu. I sinapu i keibiga Sopi, "Ku sisu Mokailawa, yaegu ba mwa." I mwa i luwa. I kounapula Sopi i keibiga, "Ku gisi podidiweta. Bogwa a yousi pwaipwaya." I ma wa waga i sisu Sopi. Molailawa i mwa i doki i yousi pwaipwaya. Bogwa i lapula sopi taigala, kabulula, i mom sopi i kariga. Sopi i luveimwa, i wola i la o valu Teyava.

Molailawa i kuluwa, i kului Mtawa. I la o lu valu i bwadi Kalasia. I gisi natana mauna yagala muluveaka. I peula i mwa i tokaya Mtawa. Gala kala katubayasa, gala kala wakala, o tapwala bwarita wala i bebaa. I ma inala Kalasia i vidumwalu. I yousi Molailawa. I keibiga, "Avai vila yoku?" "Yaegu inala Kalasia." I keibiga vivila, "Avai tau yoku?" "Yaegu Molailawa." "Ku ma bita la o valu." I la o valu i sisusa kasi taiyu.

I bogi bogwa lei ma Kalasia i keibiga inala, i luki Molailawa, "Ku la ku supwepuni o sikwawala bwala." I ma Kalasia i keibiga, "Ba kam tau." "Ba kam bulukwa." I keibiga inala, "Tau gala ta kam." "Bulukwa ta kam." Kalasia i keibiga, "Bwaina ku meya agu bulukwa ba kam."

Inala i seyeli kayala wa bwaima. I keibiga Kalasia, "Inagu, sena bwaina kayala. Kaina tai-tala bwadagu bogwa ku seuma." Tuwala i doki, "O gala, yaegu Molailawa."

I kam Kalasia. Kamkwam i wokuva i keibiga, "Inagu, nabwaya ba la nayu bulukwa buku yousi, ba ma ba kam." I la Kalasia, i simweisaga kasi taiyu. I keibiga inala Kalasia, "Nabwaya bi ma tuwami, ba kamtuli." I masisisi.

Gabogi i yousisa nayu bulukwa i gabu, i yolisa, i seilisa i kumlisa. I ma Kalasia i keibiga, "Yakaiyei Molailawa. Ba kam tau." I keibiga tuveila, "Ba kam bulukwa." I keibiga inala, "Tugwa, tau gala ta kamkwam, bulukwa ta kamkwam." Kalasia i sili wa bwaima i keibiga, "Inagu, ku meya agu bulukwa a kam."

I gisi kayala sena bwaina i keibiga, "Inagu bwadagu bogwa luku seuma. Ku luveiwa baka kam." I keibiga inala, "Mokita, a bani bwadam." I keibiga Kalasia, "Bwaina ku luki bi ma, ba kamkwam kada taiyu bulukwa." Bogwa i tokaya Molailawa, i makaya Kalasia. I katupoi Kalasia, "Um malu ambeisa?" "Ulo valu Teyava kaiwanau luya." "Bogwa la kateta. La ma lageila a lega i valam inam. Bwaina bita losa wa keda."

I yobali Molailawa, i kugwa Kalasia i nanakwa i la i supwepuni. I keibiga Kalasia, "We, avai tau yaegu?" I keibiga Molailawa, "Gala. Yoku Kalasia, yaegu Molailawa." I keibiga Kalasia, "Ku ma bita la." I losa wa keda, i nanakwa Kalasia makawala tuveila i supwepuni. I livala, "Avai tau yaegu?" I keibiga Molailawa, "Kalasia, ku busi wa luya o dabwala, ku toli ba weyaga." I busi Kalasia Kalasia i toli wa luya o dabwala, i tomwa o dabwala luya Molailawa. I la Kalasia. I kiuya Molailawa kwaitala luya i love, i lokaya vivila. I vagi inala i kouwali. I gisi i keibiga, "O beisa Molailawa wa luya i toto. Ku busi, ku ma o pwaipwaya. Ambeisa luku mova?"

I losa u sola inasi i suvisi wa bwala,
i valamsi. I keibiga Molailawa, "Boge i wokuva
kema. Ku la ku luki Sopi, bi ma." I sisusa Sopi,
Molailawa deli inasi o si bwala.

(MAILUBA. yawala i kukwanebu)

KAILAVASIA

Kailavasiasia mei sikeya Kaidola deli komwaidona bwadala. I kaliyaisa si bwaima Kwepipisi, Kwevedaya, Kweyonikwa, Ilauwiluva Tobubusi-Tomwamweina. I suninisi o raibwaga Okaiboma. I wekeyasi la valu Dokinikani. Tokosikuni i sisu o valu, Dokinikani i la i libagula. I biguli tou, usi, uli, taitu, kuvi. Yagogu i wokuva i la o valu. I suninisi Kailavasiasia toya bwadala, i keitiasi komwaidona kalamwaguta Kweyonikwa kulula kwoyaveaka i toli wa keda. I gisi kai, kavatowa migiyaweda o la bagula Dokinikani. Lewo i lova wa kai. I kipwasa usi i la o pwaipwaya. I wa Kweyonikwa, i sau i koma. I kiuya tuveila i sagi o kulula. Komwaidona i sagi wala o kulula usi.

I kuna i sakaula, i kolobusi o valu. I meiki tuwala i sisusa wa bwaima. I dou Kweyonikwa i keibiga, "Ku ma ku gisi kutugu. Kwepipisi ku gisi kutugu." I keibiga Kwepipisi, "Bogina kulum, kam kunupwetina." I luki Kwevedaya, "Ku ma ku gisi kutugu." I luki Tobubusi-Tomwamweina, "Ku ma ku gisi kutugu yokwa." I tokaya i uli kulula. I kau usi o kulula i koma. I vagi tuveila i koma kwaitala. "Yokwami ku giseisa, ku dokeisa gala kutu." I sakaulasi i kausa usi, i lipokala Tobubusi-Tomwamweina.

Ei komasi usi, i keibiga, "Nabwaya bita losa o la bagula Dokinikani." I komasi uli, taitu, tou, usi, kuvi. I keibiga Kailavasiasia, "Bidubadu usi ku meyeisa ba kam." Y teyasi kailuwatala i meyeisa i kam i wokuva. I lokayasi kailuwawayu i koma i wokuva. Lopola kweveaka i vagi. I katubayasasi bwadala, i losa o si valu. Kailavasiasia i kam o lopola bagula Dokinikani.

I bogi Kailavasiasia i piu. I mamatasi bwa-

dala butula. I vagi, "Puu!" I lega Dokinikani, i keibiga, "O tauya Teyava, natana inia ku meyeisa ba kam. Kaitala uli ku meyeisa ba kam." I seŋki piu tuveila, "Puu!" "O Tukwaukwa makwaina tauya."

Ei yam i sunapula Dokinikani, i tokaya, "Ba la a gisi ula bagula." I lolo wa keda, i pela o kalapisila. I piu Kailavasiasa, "Puu!" "I yowa lopola Dokinikani. I tokikitawa Dokinikani i toli o talila Kailavasiasa. I vagi Kailavasiasa, "Puu!" I kululu Dokinikani, "Sogu yokwala ki!" I vagi Kailavasiasa, "Yaegula!" "Availa i kamkwam ulo bagula?" I keibiga Kailavasiasa, "Yaegula." I tokaya Kailavasiasa i sili o kuvalila Dokinikani. I keibiga Dokinikani, "Ina ginigini wowom, toginigini Yokwa! O ina ginigini wowom, o matam sena bwaina."

I keibiga Kailavasiasa, "Dokinikani, ku kwenukwenu, ba kabikwani wowom." I kenu Dokinikani, "Beisa kaikem, beisa kaitutum, beisa kam pikweta." I vagi yamala Dokinikani Kailavasiasa i guli kala pikweta Dokinikani, "Miyuyula wowogu lu kweduduni. Ina bwaina kukum. Beisa i kabikwali makawala i gidigedala kimwagu." "Beisa dabam." I kau Kailavasiasa yamala, i guni o pinitala. I keita kwoyayuweila yamala i guli o matala Dokinikani, i lulu i mweya. I kariga Dokinikani. Kailavasiasa i bwaina. La bagula Dokinikani i yousi. I sewa Okaiboma.

(Taitala i kukwanebu)

Tamala luleta la kwava i valulu komwaidona taitala, taiyu, taitolu, taivasi, tailima vivila wala litula. Matouna tau litula tailima taitala tauau wala. Matosina tauau gala in nukwalisa tubusiya, gala i giseisa, makawala i lotumilasiga. Si bwala i tobwadi usi yagala dawosi. I losa i poulasi, i keibiga tamasi, "Bwadagwa, ta suyemsa natana tabudasi kala inia." I keibiga Towasi, "Avaka vilela? Mwada i uni taitala da kwavasi." I meisa i kamsi kasi ihia.

Ei yam i losa wa bagula. Bigubagulasi tauau i gwegwesi uwasi i keibigasi, "Ta mweisa ta poulasi." I kausa si wota, i kausa si kailleta, i kausa kasi kawala. I kawalasasi i kalilapulasi Bulumigamaga. I lovasi si wota, i kolasi inia, i keidodigasi wa waga. I tolasi i kotasi o kawalawa. Taitala bwadasi i keibiga, "Yaegu ba suya tabudasi kala inia." I valaguva i keibiga, "Yaegu ba yaki tabudasi kala inia." I keibiga tabula, "Ku meya agu inia?" I semwa wa bwala. I keibiga menana, "Kam puwaya pwilala." I masisisi.

Ei yam i tokayasi vivila - kaitala usi yagala dawosi i tulusi si bwala, i sulu kaula inasi i menu, i keibiga, "Ku busisima ku meisa ku kwamkwamsi." I kamkwamsi i wokuva i keibiga, "Ku kwatubayasasi, ku mweisa ku kwewosisa wa bagula." I kausa kasi dawala dagula, kasi wawega i kalasisa i wokuva, i vatowa wosi inasi, "Ne Wateya Ne Waliba Ne Wateya Ne Waliba Kwipwedoyoyu Doyoyu Kwipwesaveva Saveva Doyoyu Saveva Mwada Si Veivai Zagere Zagere Zagere."

I keibiga inasi, "Boge i wokuva wosi."

I mweinasi i losa o si bwala. I kalobusiga luboula deli litula, i lausa si wota i poulasi. I poulasi i wokuva, i meisa, kala inia tabusi i suyasi i lausa. I sulu tabusi i kam. Tauau i sulusi kasi inia i kamsi. I masisisi.

Ei yam i losa wa bagula vivila, inasi i sulu. Boge i menu i keibiga, "Ku busisi ku meisa ku kwamwa kamkwamsi." I kassasi kasi dagula, i tolisa i keibiga inasi, "Ku vatowasi kami wosi, "Ne Wateya Ne Waliba Kwipwedoyoyu KwipweSaveva Saveva Doyoyu Saveva Mwada Si Veivai Zagere Zagere Zagere."

I keibigasi inasi, "Ku losa ku mweinasi o mi bwala, bi meisa tabugwa." I losa i kalobusisa luboula litula. I lukweisa matouna gwadi, "Ku lau tabudasi kala inia." I weiki tabula i sisu, i keibiga, "Lei wa kam inia, ku kamkwam." I lokaya tuwala i sulusi i kamsi. Kamkwamsi i bogi boge bi masisisi, i keibiga tuwala, "Nabwaya bi wosi tabudasi, yakamesa ka losaga ta bagulasi." Nabwaya gabogi kala tabudasi baka kausa."

I losa i bigubagulasi tuwasi, bwadasi i supwepuni kai o uula. I sulu inasi, i kaudagu tau, i sakaula i ma o uula dawosi. I keibiga tabula, "Ku busisima ku meisa ku kamkwamsi." I sakaula bwadasi, i lokaya tuwala i keibiga, "Tailima litula tabudasi, ta dokeisa gala latula. Kaigi tailima wala. Ta lokayasa nani." I sakaulasi i meisa o sisuna, i supwepunisa.

I kamkwamsi i vanowasi, i katubayasasi vivila, i sunapulasi i tolisa wa bagula. I keibiga inasi, "Ku todelisa, ba vatowa kami wosi,

Ne Wateya Ne Waliba Kwipwedoyoyu Doyoyu Kwipwe-
saveva Saveva Doyoyu Saveva Mwada Si Veivai Zagere
Zagere Zagere." I kikeiwosisa, bogi o luwala i
tokaya tubusiya i keibigasi, "Yaegu menana ulo
kwava Towasi. Yaegu Menana (i keibiga moluwala)
Yaegu menana (i keibiga taitolula). Yaegu Menana
(i keibiga taivasila) Yaegu menana (i keibiga
tailimila). Yaegu pwilala (i keibiga gwadi)."

Komwaidona i bibiusi si kwava, i poulasi
kasi inia, i bagulasi i simweisa o si bwala.

(Taitala i kukwanebu)

Magilodu mei sikeya Kaipulapola, menana taitala, luleta tailima i sisusa. I losa i poulasi luleta, menana kalamwaleta i sisu. Ei yam i poulasi, i kamsi kasi inia, i kauisi kasi bua. Ei meisa i kauisi i kapitugeisi lusita, i lilukweisa i valam, "Ei yam ei meisa i poulasi, i lukwema bua. Aiseiki kami bua, taga yaegu Magilodu agu bua pulapola."

I lagisa imlabuma i visolina wotuna. I sila menana i lausa o rokaiwa, i mataguya. I lagisaga luleta i papoulasi, i kawalasi i keitiasi, i weisa i lokayasa lusita. Bogwala i lau o rokaiwa. I valamsi. I valamsi i somatasi. Luleta molitomwaya i tavina i tapatu, kayala i weya, i mweina i kapusi i basi. I mwa i kanamwa. I mweina moluwala i kapusi i basi. I mweinasi taitolula, taivasila, tailimala i kapusisi i basi. I karigasi komwaidona luleta. I valam lusita, "Ei yam ei meisa i poulasi i lukwema bua." I tobusi i la o pwaipwaya. I sabu ~~kaibwanani~~- kaibwanini, i bunini kabulusi, i bwalasi, i tokayasi i simweisa.

(Taitala mwada i kukwanebu)

KUVIVIA

Dokinikani i sisu Okaiboma, i koma tomota. Komwaidona i vinaku. Taitala vivila i kapeli i la i sisu Mwagea. I suma i valulu katakela. I mwa i tola katakela, i suma i valulu kuvivia. I semwa kuvivia, i suma i valulu tomota.

I valam latula, sena kala molu menana gwadi. Ei yam i valam, i tokaya tuwala kuvivia, i keibiga, "Ba la ba nei kala bwadagu." I yowa i la o la bagula Dokinikani. I keli kuvi, i lulu uli, i seili o pwatai. I kewa i yoyowa o kadamalaga i kalobusi. I keibiga "Weu!" I tokaya inala i katupoi, "Amuku kwauya kaula?" I keibiga kuvivia, "Igau baka vakata bi gabu kami som bwadam." I keibiga tuwala, "Bi gabu komwaidona. Nabwaya ba keiita."

Lei yam i yowa i la o la bagula Dokinikani. I keli kuvi, i lulu uli, kala tou i gudu. I katu-bayasa i keula, i sakaula kalobusi o valu. I keibiga inala, "Tomigamaga yokwa." I keibiga, "Lageila bi gabu bi wokuva. Nabwaya ba keiita." I kamkwamsi i kwayavi i wokuva.

I kenu Dokinikani, i mimi, "O ula bagula avai tau i veilau? Igau nabwaya gabogi ba la a gisi ula bagula." I sakaula Dokinikani i pela o kalapisila, i keibiga, "O ula bagula availa i kamkwam, kaina bulukwa, kaina toveilau." I tavina o takulumwala. I weiki i waiwai la kaipwesi. I tavina Dokinikani i keibiga, "Availa i kawai ula bagula?" I keibiga kuvivia, "Yaegu." I keibiga Dokinikani, "Ku sasopa." I keibiga kuvivia, "Gala. Yaegu wala." I keibiga Dokinikani, "Aiseiki availa i kawai ula bagula. Mwada toveaka yokwa." "Taga ei wokuva um bagula yaegula." I keibiga Dokinikani,

"Ba kau dakuna ba wem." I kau dakuna Dokinikani i weiya kuvivia i seiki. I pela i tola o kamkokola. I keibiga Dokinikani, "Boina wala um yowola. Ba kau dakuna kweiveaka ba wem." I kau i seiki. I seiki i pela, i tola wa kali. I kau bwata lewa, "Ba wem!" I pela i tola o kavatam. I somata Dokinikani lovalova. I keibiga, "O lubeigu boge a somata. Igau a veiwasasi." I keibiga kuvivia, "Ku veiwasasi, ba keula kala bwadagu ba lau." I sisu Dokinikani. I keula kuvivia. I keula kuvivia makawala i la O'opu'opu, Okaiboma, Ilailima, Kaituvi, Obulaku. I keibiga Dokinikani, "Igau menawena siviyeuweila bi ma." Obulaku i la wa luma i tamwau. I keibiga Dokinikani, "Ambeisa lei mwa? Igau nabwaya ba nei." I masisi.

Gabogi i nei. I nenei o raibwaga. Gala. I nenei o baleku. Gala. I la wa luma Obulaku. I nei Wawela o raibwaga. I nei baleko i wokuva, i somata, i keibiga, "Ba la ba masisi." I masisi. Ei yam i nenei Luba. I keibiga katakela, "Ku teya kaitala waga."

I teya waga kalala. I lali i wokuva, i yuwali i wokuva, Dokinikani bwaina i nenei. I keibiga, "Nabwaya ta keidodigasi toya inada." Ei yam i keidodigasi i nenei Dokinikani. I toli Kupwauwa, i lagi i mwagegasi Mwagea. I keibiga, "Woi! a nenei, i sisusaga o matagu." I nanakwa Dokinikani i sakaula. I sakauli i valapula o si valu, i keibiga, "O kala biga! O kala biga! A nenei, ku sisusaga." I kapwagega Dokinikani, i loki inasi bi koma. I keibiga katakela, "Bwadada Kuvivia, bi ma Dokinikani ku tola o kuvalila, ku bilabala, yaegu Katakela ba kavisi puwala.2 Dokinikani mwada bi lupwalina inasi. I tavina katakela o puwala i geda, i pela kuvivia, i tola o kuvalila i bilabala.

Bwadala i bilabala o kuvalila, tuwala i kaisipu puwala. Boge i kariga Dokinikani. I kapusi i la i kanamwa Mwagea.

I keibiga katakela, "Inamasi, ku soguguwa. Ta lokayasa Tokosikuli ku veiya. I gebilasi si guguwu i kalobusisi Okaiboma. I keibiga Tokosikuli, "Avaka ku vagisa? Gala kami kokola. Dokinikani la valu." I keibiga katakela, "Laka meya inama buku veiya. I keibiga Tokosikuli, "Yaegu gala a gaga tugwa."

I veiya Tokosikuli, i siweisa Okaiboma. I yolisa la bagula Dokinikani, ha beku, la mwali, kala soulava, kala dogu, komwaidona la vaiguwa. I siweisa Okaiboma.

(Taitala i kukwanebu)

GILIBWALA

Gilibwala Wawela mei sikeya, i teya la waga. Yowaga i wokuva i suma la kwava, i valulu. Bogwa i wokuva yowaga i luki la kwava, i keibiga, "Bogiu ba kewa. Nabwaya igau ku vagi agu kwalaga. I masisisi. Ei yam i keidodiga la guguwa, i luki la kwava kawala, "Ba kewa ba la Dobu. Bi yuvi yavata tabwa ku gabu kam mana. Bi yuvi bomatu taga ku gabu kam mana."

Igau i wokuva i yuvi kwaikwaga i gabu kala vana. Ei bogi i mimi togega. I masisi ei yam. Bogwa i lagi bi yam i kapusi togega wa kai, i kapusi o pwaipwaya. I lagi menana vivila i mimi, i keibiga o kala mimi, "Ula kaikwala, sitana i vai-legu." I tepa kayuna o sisuna, i kalobusi, i keibiga vivila igau i masisi, i vitakaula togega o kaukweda, i keibiga, "Kasai masisi. Sitana kalaga ka vakawali valu. Ku ma ku gabu um sopi." I keibiga vivila, "A takainowa." I keibiga togega, "Availa bulubwalola kaigala." I ulemwa bwala, i keibiga togega, "Ku meya kova." Vivila i seiki kova. I yuvi kova, boge i lulu. "Ku meya dakuna i gabu." I gabu dakuna boge i wokuva, i keibiga, "Ku meya sopi, ku meya kaikeiwosi." I ligabu sopi i la wa kaikeiwosi. "Ku sunapula ku ma, ku vakakaya." I kau latula menana vivila, i vakakaya menana gwadi i wokuva. I keibiga togega, "Ku meya, ba yousi." I seiki, i kopwi, i keibiga togega, "Ku kwakaya." I numwasi wowola gwadi. I kakaya inala boge i wokuva, i kanumwasi wowola inala. I simweisa.

I sulu kasi i sisu boge i kwayavi, i tokaya togega i vavila o sisuna. I vina vivila, "Yowaga Waga Gunguyau Kokewa Wa Dobu Sulu Bulami I Kola Som Togega Kalisaki Matam." I keibiga togega, "O lei vina! Igau ku katumapu kam vinavina.

Geisi Gu Bua Dava Wadogu U Dobu Gumguyau Bi
Kakata Bi Lululu. Ku katumapula kam vinavina.
Ku sisu ba laga."

I masisi sola latula, togega i mweina i
la wa kai. I masisi boge bi yam, i kapusi togega,
i la o pwaipwaya, "Tu!" I keibiga vivila i
masisi, "Ula kaikwala yokwa, i valegu sitana."
I tepa togega, i kalobusi kadamalaga. I keibiga
togege, "I yuvem gwemata. Vivila yokwa ku kwanu-
kweni." I lagi kaukula valu. "Ku mamata sitana,
ku gabu um sopi." I ulemwa bwala, i keibiga, "Ku
meya kova, a gabu um sopi." I seiki kova. I gabu
sopi i viavi. "Ku meya kaikeiwosi." I ligabu sopi,
i keibiga, "Ku vakakaya tau. Ku meya a kopwi."
Kakaya boge i wokuva i seiki i kopwi. I kanumwasi
wowola. I keibiga, "Ku kwakaya." I kakaya inala
i wokuva, i kanumwasi wowola inala.

Kanumwasi boge i wokuva, i sulu kaula,
i sulu i kam. Boge i bogi i tepwa togega i la o
kala kai. I vina, "Geisi Gu Bua Dava Wadogu Bi
Kakata Bi Lululu. Ku sisu kami taiyu latuma, ba
laga."

Ei bogi i mimi la mwala Dobu, i keibiga.
"Litugwa boge i bani kayuna." Ei yam i kewa la
mwala. I sakauli i kota o lu valu, i katupoi la
kwava, i keibiga, "Avaka ku vagisa ku sisusa?"
I keibiga la kwava, "O togega i makayamasi." "O
bwaina. Ku tapelasi yabiya." I tapelasi i wokuva,
boge i bogi i masisisi, i keibiga la kwava, "Kala
kauta valu* Bi kapusi!" I gilagelo lekoleko i
kapusi, "Tu!" I keibiga la kwava, "Bogwa ku lagi?"
"A doki kai?" "Gala. Menawena wala. Igau bi ma bi
livala buku lega." I kalobusi o kadamalaga, i kei-

biga, "I yuvem gwemata. Ku masisi ku lagi kaukaula valu, ku mamata. Ku ma ku gabu sopi i kakaya."

La mwala i simati la kwasi, i lagi. I mwa i toli wa lulu. I ulemwa bwala togega, i keibiga, "Ku meya kova." I keibiga la kwava, "Neumwata yoku." I keibiga togega, "O ma wadogu!" I seili kulula o kalapisila. I la i vagi la mwala, i kapituni kayola togega. I lisau wa tapwala i bobu, i lisau wa tapwala tuveila i bobu. I lisau wa yeyuna i bobu. I biya i keibiga, "Kam inia ko-sosopuna, kam inia tobusa (kaukwa kabulatala), kam inia kumidu!" I kau debana i seiki, "Tolam, ku mweyeisa kam inia." Boge i wokuva. Baka simweisa toya litugwa, baka masisisi bi bwaina."

(Taitala i kukwanebu)

KIU

Tovileu

Kiu mei sikeya Silaketa kasi taiyu kadala. Inala i uni latula Kiu sena tominibwaina. Kadala i pogi. I lau o raibwaga, i lai wa sopi o lopola. Inala kala i lilai wa sopi i kamkwam. Kadala i bigubagula, i sulusulu kala inala i weya. La kwava kadala i keibiga, "Ba wekeya latugu sena i lai wa sopi. Yambwata yambwata i sisu wa sopi."

I valugwa kala sopi inala. I gebila i kugwa, i gisemwa i valutu. Kadala la kwava i wekeya i loya tubwalola. I lai kala Kiu wa sopi. I taya kala sopi, i sili i kili ei vina, "Kiu Dolane Kiula Bwaiteta Bwailaga Ku Liluwa Ku Meya Agu Sopi A Kili Ku Kwam Kagu." I liluwa Kiu i sila, i kamkwam. I kilikili kala sopi inala. Kamkwam i wokuva i keibiga inala, "Ku la ku suvi we umbwala. Ku suvi baX laga." I suvi i la o la bwala. I gebila kala sopi inala i la o valu.

I valapula kadala la kwava, i vina, "Kiu Dolane Kiula Bwaiteta Bwailaga Laga Kiu Liluwa Ku Ma Ku Kwamkwam." I keibiga Kiu, "Inagu boge i vina. Ba loki menana i vigaki avai vivila? Bwaina ba la ba gisi." I sunapula i meiki vivila i sisu. I tokaya vivila i yousi. Kiu i peiki. Magila bi suvi. Vivila i yousi. I keibiga vivila, "Ku ma igau a woula kam tilewai, buku laga." "Gala." Vivila boge i komiligaga. I yousi Kiu. I siweisa wa sopi. I sisusa bogwa lei wokuva.

I keibiga vivila, "Nabwaya i ma inam bi la, ba maga a vina. Ku lagi, ku sunapula, ku meiki kam. I suvi tau i la o la bwala. I la o valu vivila. Ei yam i sulu vivila kala. I sulu i wokuva, i gebila kala sopi, kala inala, i gebilaga menana kadala la kwava. I taya o dabala sopi inala, i vina, "Kiu Dolane Kiula Bwaiteta Bwailaga Laga Kiu Ku Liluwa. Ku meiki kam. A kili agu sopi ba

la. I liluva latula, i sili o rokaiwa i kamkwam. I kilikili kala sopi inala. Kilikili i wokuva i keibiga "Ku sisu, ba laga." I luki inala, "Ku weya kam yausa bi bwaina, kaina i banemsi." I la inala, i valapula vivila kadala la kwava, i vina. I sunapula lei ma Kiu. I siweisa wa sopi kasi taiyu. I sisusa i bogi. I suvi tau i la we la bwala, i maga o valu vivila.

I nanamsa guyau. I luki taitala la touwata, "Nabwaya ku simwa, ku weya yausa. Giyovila sena i lolo wa sopi. Gala i bigubagula, i sisu wala i masisi." Ei yam i kugwa inala i la wa sopi. I lolo o luyeki giyovila. I wa i supwepuni guyau la touwata. I taya inala kala sopi, "Kiu Dolane Kiula Bwaiteta Bwailagalaga Kiu Ku Liluva. Ku meiki kam ku kwamkwama. A kiliga agu sopi ba la." I liluva lei ma. I sili i kam. I kilikili la sopi inala. Kamkwam i wokuva i keibiga, "Ku la um bwala, ba laga." I suvi.

Lei wewa vivila i vina. I sunapula tau. I siweisa. I sisusa i kwayavi. Bogwa matouna toweyala yausa i gisi. I lau biga i luki guyau. I keibiga matowena la touwata, "O guyau gala bita keibiga. Kadam i uni lumta. I lau wa sopi. Sena tominbwaina. Tokomada um kwava i teya nanola sena tominibwaina."

Tokaraiwaga i luwawala kadala. "Yoku vivila avaka peila ku lau kadagu, kwiwali wa sopi? Mokwita nabwaya ku la kwoluluvi kadagu, ku meya o valu. I guyau. Taga ku seyewa, i gigadi wowola sopi. Nabwaya ku loki ku meya." I masisisi.

Ei yam i sulu kala inala. Sulusulu i wokuva i kau la guguwa latula, kala wakala, kala

bunadoga, kala kaisapi, kala kwasi, kala tuwetua i lau wa sopi. "O Kiu Dolane Kiula Bwaiteta Bwai-lagalaga Kiu Ku Liluva. Ku meiki kam ku kwam. A kiliga agu sopi ba la. Bogwa i banedasi." I liluva latula i sila o rokaiwa. I kam kala. I livala inala, "Bogwa ei banedasi. Ku kam ku kakaya, ku katubayasa i wokuva, bita losa o valu. Taga buku peiki. Bi weigu kadam."

I katubayasa latula, i keitiasi o valu. I kasobusisi, i melebasi o valu komwaidona Mi-Silaketa. I giseisa Kiu kala kaitubwatubwa. I giseisa i wokuva, i leku k^{la} bua kadala, i meya i-kauⁱ. I kauⁱ i wokuva, i^a keibiga kadala, "I yayana wadogu kadada. Nabwaya ku loki makaina menoni wa yalela." I mweina i teta, i kau menoni. I meya i koma kadala, i luki, "La kau kam kawai-luva kadada, a meya wa yalela." "E makaina, ku meya a kam." I meya i koma.

I sisusa i kwayavi, i keibiga kadala, "Magigu bu kweula militabu ba kam. Gala magigu kai buku sai. Magigu wa yamam wala ku kolukavi." I la i vabusi i weiki militabu, i yousi i kola-kavi. I meya i koma. I simwa kadala, i keibiga, "Nabwaya ku loki uligova. Magigu ku yousi wala. I vabusi i yousi i meya. I komasi i wokuva. Bogwa lei wokuva makwaisina, i keibiga, bogwa i kibwadi matala.

I nanamsa kadala i kwayavi. "E, nabwaya Kiu toya ilungwa, ku la ku likubalisa da wagasi. Ku meyeisa bita kewa, kadada." I keibiga kadala, "Gala magigu buku teya bi kapusi. Magigu wala bu ku yousi wala bi kenu." I teyasi kai. I teyasi i wokuva, bogwa bi kapusi kai, i tokaya Kiu i kam-

numwasi, i piyekwati i vakenu.

lakisisa

I simweisa i bweisisa. I bubweisisa i wokuva, i salisa. I salisa i wokuva, i keibiga, "Nabwaya bibiu. Ku biama waga bi sisu." I keibiga kadala, "Yoku Kiu o uula waga beisa ku toki, tabwa bi kapusi da waga bi katuvi. Bi kapusi, mwada ku kamnumwasi, ku yousi mokita." I biyasi i kamnumwasi Kiu makaina. I bibiyasi i meyeisa o valu, i taisi. Tataisi i wokuva. I tutusi i wokuva. I lisi-tatayasi i wokuva, kavilala i lalisa. I yalalisa i vinausa, wayugo i yovasi, i meyeisa i kali.

Lei yam tabuya, lagim i meyeisa i weiya Kiu. I keibiga kadala, "Nabwaya ku la ku teyasi da lamilasi, ku meyeisa i kali. Kaidabala ku taisi." I losa i taisi lamila. I keibiga kadala, "Da lamila ku teya, ku gisi bogwa bi kapusi, ku tokaya ku kamnumwasi, ku seili bi kenu. Gala magigu bi katuwali lamila." I teyasi i kapusi, i tokaya Kiu i kamnumwasi, i piyekwati i seili o pwaipwaya.

I simweisa i salisa bwadala. Silisali i wokuva, i kausa lamila o kayosi. I keibiga Kiu, Kabulatala komwaidona, kabulatala agumwaleta Kiu ba kau." I kausa, i kokeulasi o valu i seilisa. I kikali si lamila, i kapusi budaka. Makawala i teyasi budaka, i kamnumwasi i seili. I tataisi i wokuva, i kausa i meyeisa o valu, i sopoisa. I sopoisa i wokuva, bogwa i matutula wayugo, i keibiga guyau, "Nabwaya buku taisi kaidabala."

Lei yam i taisi kaidabala. I vakasisi si waga. I vakasisi i wokuva, i keibiga, "Nabwaya ku kausa pitapatila." Ei yam tolilamila i wokuva, i keibiga, "Nabwaya Kaibasi." I kaibasisa i wokuva, i keibiga kadala, "Nabwaya ta libusisa da wagasi."

Lei yam i libusisi, i wolasiga i meisa tasosolia. I ulawolasi Obulaku i kotasi. I yousisa bulukwa. I lausa vaiguwa. Kiu la vaiguwa, kala bulukwa. Kadala gala. I wolasi Tukwaukwa i kotasi. I meyeisa kala kaiovau Mosilibu. Kiu i yousisa bulukwa, i laisa vaiguwa. Kadala gala. I wolasi i losa Kavataria i kotasi. I meyeisa kala kaiovau Pulitala. I yousi kala bulukwa, i lai la vaiguwa Kiu. Kadala gala.

I losa o si valu Silaketa. I kabwasisa kasi bulukwa. I mwalasi i kamsi. Ei yam i keibiga kadala, "Bogiyu bita la Kitava. Ta sou, ta kau wayugo. La maga bita la wa koya." Lei yam i keidodigasi i kewasi. I kotasi Vakuta, i laisa vaiguwa i yousisa bulukwa Kiu, kadala gala. I kewasi Kitava i kotasi, kwailima kwailima, kwailuwatala mwali, kala mwali Kiu, kadala gala. I bisikuleya kadala. I kotasi i valapulasi Kumwagea. I yousisa bulukwa, i laisa vaiguwa Kiu wala, kadala gala.

I keidodigasi i sakaulisa Silaketa i kotasi. I gabusa bulukwa. Tala beau i tomo i kasewa Kiu la vaiguwa. I mwalasi. Bulukwa i kamsi. I kwayavi i tokaya kadala, i luwawala, "Nabwaya ku utuutusi la vataga, ku yuvayovasi kabaliluva. Bogiyu bita kewasi, ta losa Dobu."

Lei yam i kewasi, i kotasi Mmwa. Ei yam i kewasi i ginoulisa i kewasi Teula i kotasi. Ei yam o lumatala Dobu i kotasi. I valaguva Kiu kasi taiyu kadala. I toli Kiu o bikubaku, i laisa vaiguwa. Kwailuwatala Kiu, kadala kwaitiniges i keula.

I kewasi i sakaulasi Gumasila. Kwailuwayu vaiguwa i keula Kiu, kadala kwaiyu, i didagisa o si

waga. I kewasi i losa Dobu. Kwailuwatolu i keula Kiu, kadala kwailuwayu. I losa Tutauna, kwailuwalima i keula Kiu, kadala kwailuwatala. I keidodigasi i keitasi. Ei yam yabiya, luya i keidodigasi. I kewasi i meisa wa salu. I keibiga kadala, "Kiu, ku la ku wota kai, ku meya bi gabu kasi, usagelu bi kamsi." I vabusi, i kau kala kauya, kala mwali. I vabusi i keibiga kadala, "Ku seili kam kwauya o da waga. Ku waga ku wota kai." I keibiga Kiu, "Agu kauya ba meya a keipapi." I vabusi.

I keibiga kadala, "Ku sikeilasa matila bita losa. Ku ligeiweisaga, bi siwa." I vavagi lubeila Kiu, i lai vayola kaitala, "Lei wa kam kweyapapila. Baka kewasi."

I siwa. I sisu ei bogi i kanala o vayola, i beu. I bibeu o uula valu, Kalasia bi salewa. I wa i katuligavi i siwa. O valu Kalasia i sisu. I weiki inala Kalasia i sisu, "Avaka ku vagi O ku ma?" "O ka kula kama taiyu kadagu. Peila vaiguwa i laisi a kau, kadagu i bisikuleya. Ma uula laka wa salu. I lulukweigu a mwa a wota kai. I ginoulasi toya bwadala, i kewasi i losa o si valu. I luveimweigusiga." I keibiga inala Kalasia, "Ku ma ta simweisa." I katubiyasi bwala o sikwawa. I suvi i la i kanamwa Kiu. I keibiga inala Kalasia, "Ku la ku kanawa. Bi ma tomitugaga taga bi gisem, bi komem."

I kenu o sikwawa boge i kwayavi, ei wa Kalasia i keibiga, "Yakaiyei matagu! Yakaiyei matagu! O inagu ku sobwi matagu bi manum. Gala kada tau, gala kada bulukwa." I keibiga inala, "Tau gala ta kamkoma yakida, bulukwa ta kamkoma." I sili i meya kala bulukwa, kala. I kam Kalasia.

Kamkwam i wokuva i masisisi. Boge i yam i vaguli inala Kalasia, i keibiga, "Kalasia ku

mweya kasi lilu gweguya, i kali si baleko, tabwa kanadubaduba." I tokaya i ma i lukiga Kiu, "Kiu, natana bulukwa ku yali ku meya i kumli." I yousi Kiu. I gabu i wokuva, i kam kakasili. Bulukwa i sakeiwa inasi i kumli. I kumli i wokuva i yaya i luki Kiu, "Ku ma ku kwam, buku la o kabam, bi ma-ga Kalasia."

I kam i wokuva, i kalobusi Kalasia, "Yakaiyei matagu! Yakaiyei matagu! Inagu ku sobwi matagu ba kam." I kau sopi, i ligabu, i manum. "Ku meya agu bulukwa a kam." I kau kala kaboma i seiki.

I gisi bulukwa sena bwaina kayala. I luki inala, "Inagu, kwemtuli, bwadagu kaina ku kwiwali." I yakala inala. I keibiga Kalasia, "Ku luki bwadagu bi ma, ka kam. Tabwa kwiwali." I keibiga inala, "Senem kam kikila! Bwaina ba luki bwadam bi ma. Taga a luwai peila tomitugaga yokwa." "O ku luki bwadagu bi ma a gisi." I loki i luki Kiu, "Ku sunapula ku ma, bita mweiki tuwam." I tokaya Kiu i valapula. "O avaka peila ku kwiwali bwadagu. Tokinibogwa baka tuli baka kamkwam."

I sili kasi taiyu tuwala i kamsi. I kamsi i wokuva, i keibiga Kalasia, "Ku yaya ma moi, baka kenu kama taiyu bwadagu." I yova moi i wokuva, i kenusi. I keibiga Kalasia (beisa katudewa Kalasia) "Avai tau yaegu?" I keibiga Kiu, "O yokwa Kalasia. Yaegu Kiu. Tuwagu yokwa." "Ke! A doki buku takainaweigu bwadada. Beisa a udawada wala." I masisisi.

Ei yam i la Kiu Kalasia. I siweisa Kiu kasi taiyu inala. I yousi kasi bulukwa i kamsi kakasili. I vakata inasi, i kumli boge i kwayavi. I keibiga Kiu, "Inagu, bogwa lei wewa Kalasia. I

kayagigina matala." I kasobusi Kalasia i keibiga, "O inagu ku sobwi matagu, baka kam kama taiyu bwadagu." I sobwi matala inala, i manum. I meya kasi bulukwa, kasi. I kamsi. I kamkwamsi i wokuva, kasi kobwaga i sakeisa inasi, i simweisiga.

I livala ~~Kalasisa~~ Kalasia, "Kiu, um malu ambeisa?" I keibiga Kiu, "Buku towota, beisa ula valu Silaketa." I keibiga Kalasia, "Bogwa la lagi inam i valam, "Kavitagi Yagam A Wala Latugu Kiu. A lilagi makawala." I keibiga Kiu, "Ku tagwala tuwada buku laweigu, buku tetetagu." "O bwaina nabwaya masisi i wokuva, ba mamata ba la, ku yousi kada bulukwa. Nayu buku yousi. A ma ta kam. Lei yam ba lawem."

I la tuwala. Natana i yousi nayu. I vakata inasi. Vakata i wokuva i kumli bogwa lei kwayavi. Lei wa Kalasia, "Yakaiye matagu! Yakaiyei matagu! O inagu, ku sobwi matagu, bi manum. Baka kam kama taiyu bwadagu." I sobwi inala i kamsi. Kamkwamsi i wokuva, i luki inasi, "Ku vakata kama bulukwa, kama mona, kama kalaga." I vadobula bi kumli lubu-latola i valutu. I masisisi.

Ei yam i katubayasasi i keidodigasi kasi bulukwa, kasi mona, i keibiga inasi, i luki Kiu, "A buku losa, ku lilosa wa keda, bi katudewa. Bi la i toli i kapwagega wadola, bi makayam." I lilo-lasi wa keda i yobali bwadala, i sakaula i kugwa tuwala, i la i supwepuni. I wa Kiu wa keda i kapwagega Kalasia, "Avai tau yaegu?" I vavagi Kiu, "Gala. Yoku Kalasia. Yaegu Kiu. Tuwagu yokwa. Yokwa bwadam yaegu." "A doki bwadagu buku takainaweigu."

I lolasi i sakaula o tapwala keda, i supwepuni Kalasia. Ei wewaga Kiu, i vavagi Kalasia

"Avai tau yaegu?" I vavagi Kiu, "Galaga avai tauya! Yokwala Kalasia, yaegu Kiu. Bwadam yaegu, tuwagu yokwa." "A ta mweisa ta lola."

I lolasi Silaketa bogwa i kibwatani, i keibiga Kalasia, "Inam me-valamya beisa! A lilagi kaigala sena lei kapisila lopola." I valamsi, i vayaulasi i wokuva. I dau luya, i solina i la wa labuma. I keibiga Kiu, "Ku meya ula guguwa, a didagi-wa luya." I simwa Kiu, i keidodigasi la guguwa wa luya. I didagisa i wokuva i keibiga Kalasia, "Ku sila." I taloisi.

Kiu i lukwemwa makaina luya i giuya. I giginya i ma dogina o pwaipwaya. I vabusi Kiu. I tavili kala bulukwa, kala mona. I seili o pwaipwaya. I keiita luya, i lokaya dokala.

I toli Kiu o kabala. I vaguli inala i mamata. "Avai tau yokwa?" "Yaegu Kiu." "A valam latugu. Ku maga ku yobosa, a dokiga Kiu." "A-yaegu-Kiu." "A yaegu Kiu! Ku ulemwa bwala ba mwa." I ulemwa bwala inala. I suvi i simwa i livala. I livala i wokuva i luki inala, "Ku valam. Ku valam ku matawa." Nani bi ma a tagudu kayola." I valam inala i matawa. Boge i mlatoli i tokaya luleta. I luki inala Kiu, "Ku tokailigu wala." I valam inala i mtoki luleta, "Kweiya inam! Koma kam popu! Boma i kariga!" I keibiga luleta, "Igau a kapituni kayom!" I ulemwa bwala o taboda, i suvi. Bogwa i toto Kiu o taboda. I lisema kema, i kapituni kayola kadala. I tataba i kariga.

I Butusi valu komwaidona. I keibigasi, "Kiu bogwa lei ma. Kadala bogwa i kapituni kayola." I keibiga Kiu, "Ku weisa ku bakusa. Ba guyauga Silaketa. Ba sili Mwa." La kwava kadala komwaidona i semwa la kwava Kiu. Komwaidona Silaketa i kabasisi beisa Kiu. I guyau. I simwa.

(Tovileu i lilimu)

~~THE TAMIL LITERATURE~~

Torileu

Dokinikani mei sikeya o valu Kumilabwaga wa luma o raibwaga. Kulula Dokinikani i la o kailkela. I koma tolesi Kumilabwaga i vinau. I koma Bwadela i vinau. I koma Okayaula tolela i vinau. I luvapela Loya i koma i vinau. I luvapela Silaketa i koma i vinau. I koma tolela Kaulasi i vinaku. I luvapela Wawela i koma i vinaku. Tailima tauau deli lusita i sakaulasi i losa o raibwaga, i supwepunisi.

Dokinikani i nei Obulaku. I koma i vinaku. Kwabula tolela i koma i vinaku. I luvapela Dabwagu i koma i vinaku. I kabi kawala i ma Luba i nenei tomota. I siweisa matosina tomota deli lusita. I valulu lusita, tau. I keikwala, i lukweisa lusita, i keibigasi, "Tabwa senem kova. Bi gisi Dokinikani, bi ma bi komem. Baka losa baka poulasi natana kama inia, ka meyeisa buku kwam." I sisu lusita, i losa i poulasi. I papoulasi i kwayavi i selaguvasi. I meyakeisa lusita i sulu kala inia. I kamkwamsi i wokuva i masisisi.

Ei yam i lukweisa lusita, "Ku sulu kam, ka losa ka poulasi." I losa, Dokinikani i nenei tomota. I valutu Okaiboma. Bogwa i totila nanola i keiita Dokinikani i lolo Obulaku. I luvapela Wawela bi la o lu valu, i toli i gisi la umseu vivila i sulusulu kala. I keibiga Dokinikani, "O a nenei tomota, igau i simweisa i sisusa. Ba loki a gisi umseu. I lolo i weiki vivila i sulusulu. I toli o kaukweda Dokinikani, i katupoi, "Avai vila yokwa?" I keibiga, "Gala. Agumwaleta wala." I keibiga Dokinikani, "Ku sasopa." I vavagi vivila, "Agumwaleta wala a sisu. La valulu kama taiyu latugu." I kau la kaitukwa i pupaya, i vitawa. I keibiga Dokinikani, "Ba vabu. Yagala latuda

ba dou Pwatamelumelu. Ku gabu um sopi ku kwakaya, bita losa." Bi vigaki la kwava.

I kakaya. Kakaya i wokuva i vakakaya latula. I keibiga, "Ku meya Pwatamelumelu ba kopwi. Kwatu-bayasa um guguwa bita losa." "Mokita." I katubayasa i kau binabina, i seila o vataga. Bulami, kala luya i seili o vataga. I kau kala kaikeiwosi i seili o vataga. I kau la dakuna, la viga. I kau la moi i selava o vataga. Bogwa i gebila i keibiga Dokinikani, "Ba vitawa kaitukwa Tukwa-Lelewa. Ku kwau um guguwa ba kopwi Pwatamelumelu." I vitawa kaitukwa, i kopwi latula. I gebila la guguwa la kwava i lolasi.

I lolasi, o kwadewa i valapulasi. I toli Dokinikani lei ma vivila. I luki la kwava. "Vi! O luku ma. Tukwa Lelewaga?" I keibiga la kwava, "Ei towa o valu." (Peila pwanetala totuwala i kokola i ligeimwa). I keibiga Dokinikani, "Lei wa Pwatamelumelu ku kopwi, ba loki Tukwa Lelewa." I yousi latusi menana, i keiita i la matouna. I kalobusi o valu i kau makaina kaitukwa.

Mapula la kwava i tola o silasila i dou luleta, i vina, "Duau Gamagamana Nugutaye Ku Pwapoulasi Kami Yena Lei Ma Tolela La Odila Bi Laweigu." I lagi monagwadi i sisu wa waga, i luki tuwala, "Tauau! Kaigala ludetasi. Bogwa kaina i bani tolela la odila?" I keibigasi tuwala, "Gala daka! Ku sasopa. Ku ma ku poula kala inia vivila, ba waga a sila wa waga ba lagi." I keibiga bwadasi, "Ku ma ku sila. Buku lagi kaina mauna, kaina ludetasi kaigala." I kapusi i la o bwarita. I silaga moluwala.

I kau makaina kaitukwa Dokinikani. I keibiga, "Tukwa Lelewa Tukwa Lelewa." I vitawa, "Ku--- meya Pwatamelumelu a kopwi. Ku gebila." Pwanetala totuwala i kokola vivila. I tomwa kaitukwa o kwadewa.

I doki Dokinikani la kwava bogwa i kau. I lolasi. I lolasi o kwadewa i tovila Dokinikani, i keibiga, "Tukwa Lelewa?" I keibiga vivila, "Bogwa i tomwa kabulutala kwadewa." I keibiga Dokinikani, "Lei wa Pwatamelumelu kwi yousi, ba lokiga tukwa." I keiita i la i kau.

I tolaga la kwava o silasila i vina, "Duau Gamagamana Nugutaye Ku Pwapoulasi Kami Yena Lei Ma Tolela La Odila Bi Laweigu." Bogwa i lagi moluwala luleta, i keibiga, "Bogwa mokita! Kaigala ludetasi." I keibiga taitolula, "Ku ma ku poula, i ba silaga ba lagi, kaina ku sasopa." I sila taitolula.

I lolasi, i katupoi Dokinikani, "Avaka ku vagi?" I keibiga vivila, "Gala. A luki wala latuda, Nani bi ma tamam, bita losa." I keibiga Dokinikani, "A doki avaka kweibigi. Ku gebila bita losa. Ku meya Pwatamelumelu ba kopwi. Ku kwaugwa tukwa." I gebila la kwava la guguwa. I vitubwalola, i tomwaga kaitukwa. I lilolasi kabulutala kwadewa, i tovila i luki pwapwawa, "Igau i ma inam." Lei wa vivila i katupoi, "Tukwa?" I keibiga la kwava, "Lei vitawa o kabulutala kwadewa. I towa la maga." I keibiga Dokinikani, "Lei wa Pwatamelumelu ku kopwi, ba lokiga tukwa."

I tolaga la kwava o guvagava, i vina, "Duau Gamagamana Nugutaye Ku Pwapoulasi Kami Yena Lei Maga Tolela La Odila Bi Laweigu." Boge i lagi matouna luleta, i keibiga, "Mokita." I keibiga Taivasila, "Ku ma ku luwa, ba wa ba sila wa waga, ba lagi, kaina ku sasopa." I pela i sila.

I lolasi Dokinikani sola la kwava. I lolasi kabulutala kwadewa i tovila Dokinikani. I gisi la kwava lei ma i katupoi, "Mitaga tukwa?" I keibiga la kwava, "O lei vitawa kabulutala kwadewa, la maga." "O lei wa latuda ku kopwi, ba lokiga kaitukwa a kau."

La kwava kaitukwa sena i kokola. Matouna i la i kau i sakauli. I vina menana, "Tukwa Lelewa Tukwa Lelema O Luwala Tukwa Duau Gamagamana Nugutaye Ku Pwapoulasi Kami Yena Lei Ma Tolela La Odila Bi Laweigu." I keimapu sakawala, i pela luleta i sila. I keibiga taivasila i luki tuwasi, "Mokita. Kaigala ludetasi." I keibiga tuwasi, "Ku meisa ku poulasi. Ba silaga, ba lagi kaigala ludetasi mokita." I kapusisa bwadala i loluwasi. I pela tuwasi i sila wa waga.

I keiitaga Dokinikani, i ma beisa vivila, i vitawa kaitukwa i keibiga, "Ku meya latuda a kopwi. Ku gebila um guguwa, bita lasa. Ku kwaugwa kaitukwa." I vitubwalola, i tomwaga kaitukwa, vivila sena i kokola. I lolasi, bogwa i veisou o kwadewa, i tovila i luki la kwava, "Mitaga tukwa?" Lei vagi la kwava, "Ei towa kabulutala kwadewa, la maga." "Lei wa Pwatamelumelu, ba lokiga tukwa." I kopwi menana latula. I sakauliga i weiki kaitukwa i toto i kau. I kokeula i ma la kwava i vina, "Tukwa Lelewa Tukwa Lelema Tukwa O Luwala Gole (Bi kagwau) Duau Gamagamana Yautopena topena Budamwa Nugutaye Ku Pwapoulasi Kami Yena Lei Maga Tolela La Odila Bi Laweigu." Bogwa i lagi molitomwaya. I luki bwadala, "Ku silasa wa waga, ta lokayasa ta giseisa vivila, kaina i bani tolela la odila." I silasa budala i wolasi. I ulawolasi o si valu. I wakeisa valu, i lotumila lusita.

Mapula Dokinikani sola la kwava i valaguvasi i wakeisa la bwala o la valu Kaikubila. I taya la kwava i keibiga Dokinikani, "Ku gabu sopi ku kwakaya, bita sisusaga." I gabu la sopi la kwava. I gabu i wokuva, i kau kala kaikeiwosi, i ligabu sopi i wokuva i keibiga Dokinikani, "Lei wa Pwatamelumelu ku vakakaya, ku meya a kopwi." Kakaya i wokuva, i seiki i kopwi. I kakayaga inala. Kakaya i wokuva i keibiga Dokinikani, "Ku yaya moi, baka kenu." I kau

dakuna menana i seili i gabu. I gabu i wokuva, i keibiga Dokinikani, "Ku ma ku gisi kutugu, ku kwam." Menana vivila i katuvi kala luya i kouwali. I kau kai i uli kulula. I sigi natana mwata. I lai. I kau luya i gani gunugunu gunugunu. I vavagi Dokinikani, i lagi la gunugunu la kwava, i keibiga, "Gala kwava titolegu i gisi kutugu - tugu! I mwanemwane wowogu."

I kau kai vivila, i uli kulula. I sigi natana kayuna. I lai. I kau kala luya vivila, i kamkwam gungunu gunugunu kudula. I vavagi Dokinikani, "O gala kwava titolegu i gisi kutugu. I mwanemwane wowogu." I sigi kayuna i lai. I doki la kwava ei komkoma. I kau kala luyaga i gunugunu.

Boge i masisi Dokinikani i tokaya la kwava, i kau kulula, i sipu kai o uula. I sipu makaina kaikubila. Komwaidona kulula i sisipu i wokuva. I uguna wala la mwala. Boge ei memeisa luleta kayala i keulasi. I makayasa i giseisa lusita i sisu, i keibigasi, "Bogwa ku vagi." I keibiga lusita, "Bogwa la sipu kulula i wokuva." "Ku meisa ku weiyasi." Ei meisa luleta, Dokinikani i masisi. ~~Vtakala~~ i la o rokaiwa. I lukweisa lusita, "Kwau latum. Ku tokaya ku mweya ku tomwa." I kau latula lusita i mweya i tomwa.

Dakuna bogwa lei yuviyavi. Bogwa lei ma moli-tomwaya i vitawa kayala o ~~vatakola~~ Dokinikani. I tokaya Dokinikani i ~~wawaa~~, "Wai!" I keya i kiwola kawala, "Agumwaleta kaigi toya luleta komwaidona." Kayala i weiyasi. I tokaya Dokinikani i kouwali si kayala i luveimwa. I keibiga, "Ku tolisa igau a liku kulugu." I liku. I liliku i wokuva, i keibiga, "Bogwa i wokuva kulugu, ba wa a komemi." I keibiga lusita vivila, "Yaegula gala ba lova ula lewa." I keibiga Dokinikani, "Yokwaga ku lova wala." I keibiga vivila, "Bwaina ku kapwagega ba lovaga." I keibiga Dokinikani, "Bwaina ba kapwagega."

I vagi Dokinikani i kopinaveaka. I lai lewa vivila
 i weiya o kayola. I semwa bi kasau. Gala. I kani-
 tavila, i doki bi kapusi. Gala. Bogwa i lokwau *burn*
 kayola. I sewa kagota. Gala. Bogwa i kapwani
 kayola. I tatawa i kariga.

I biyasi i lausa o la odila. I laisi i siw a.
 I weisa i vatisa la bwala. I kausa beku, mwali,
 soulava, dogo. I kausa i wokuva i lukweisa lusita,
 "Ku katubayasa bita losa o du valusa." I katu-
 bayasa lusita i wokuva, i gebila i losa o si waga.
 I silasa i meisa Wawela i kotasi. I lausa lusita
 i siwa we la bwala i sulu kasi. Bogwa i manum
 uwasi. I sisu lusita i vakapula kasi, kasi inia.
 Poulaga bwaina i papoulasi. I meyakeisa lusita i
 sulusulu, i kamkwamsi. Bogwa i taboda teigasi,
 bogwa i kariga Dokinikani, i totila ninasi, i
 siweisa.

(Tovileu i kukwanebu)

TOSUVASOVA

(ex Malinowski)

Kumilabwaga mei sikeya vivila i uni taita tau taita vivila. Bogwa i toveakasi latula, i mwa i tatai doba inasi. I sulusulu kai matouna. I sulubuyala makaina kaiwaga. I souya yekwesila, i la i kakaya.

I maga luleta i wota kai. I taya, inasi i luki, "Ku weiki kala sopi luguta." I keibiga inala, "Ku weiki wala, boge i kanaki kaidawaga kaikegu." I suvi menana vivila, i kanamwa sopi. I wouli kulula yakwesi, i busi bulami i bwiki kulula. I vagi yamala i veisi. I sukwani. Bogwa i weiya. Bogwa lei la o lopola, i vagi nanola. I la i kasopi, i meya i seili.

I katupoi inala, "Taga luguta?" Kawalaga, "O latugwa boge i nagowasi. Bogwa lei la wa luma." I vabusi i lokaya wa luma. I vabusi o kadauula, i liku dabela, i seyemwa. I vayali namwadu. I la Bokarauwata. I loki luleta i kakaya Kadiusawasa. I kikaya i vabusi. Lei la i bokovili. I bokovili i la o Kadilawola-Papapa. I towa i sakaula i la, i bokovili i la Olakawa. I toyewa i keimali i la Kadiusawasa, i yousi. I kanalisa wala o bwarita, i kanukwenusi. I kamwainaguvasi i vinausa. I mweinasi i losa Bokarauwata o dubwadebula i kenu-si. I kanukwenusi i masisi. Gala i kamkwamsi, gala i momomsi. Uula i karigasi.

Ei bogi kariyalaga i loki Guma-Iwa, i mimi kariyalela kasi sulumwoya. "O agu mimi, taiyu tomota kasi taiyu luleta nanogu o dubwadebula Bokarauwata i kenu-si. I wola Galeya. I ulawola Kitava i kota waga. I nei. I nenei gala. I w wola Dauya, i ma Kumilabwaga. I ulawola, i tagu-laguva, i ginaga mauna. Dauta deli sala i kokwai-lubasi.

I mwa i mweina i la i gisi. I katuville i gisi boge i kaligeyavi. Lei susinaga sulumwoya o vatikosi i sisu. I kanukwenusi, i vayaliga. I nenei keda, i bani, i kamwainaguva o valu. I kasobusi menana i sisu, i tatai doba. I keibiga, "Avaka o kwadewa? Latugwa ei losa i keitasi, i vagi kasi mwašila?" I livala. "E!" "Ku ma ku kwau meguva." "A lagi."

I kawa, i kikawa i lega. I sisau i vinau. I sawa i sisawa i vinaku i mwa i muli kaisisula. I mimuli i gigisi i wokuva, i keibiga, "Kuneta a kau, kala wosila a kau?" i katupoi matouna Guma-Iwa. "Wosila ku ma ku livala." I livala boge i vinaku, i keibiga, "Buku sisu, ba-laga." "Kai uula kaila Gawa buku seyemwa, matala ba lau kaila Iwa." I vabusi i weiki makaina sulumwoya bogwa lei susina, i toto o vatikosi kwigunigu. I kituni i didagi wa waga. I wola i lau Kitava. I ulawola i talaguva Kitava i veiwasi. I ulawola i talaguva Iwa, kawala, "Matala kaila Iwa la meya.

Beisa uula kaila Gawa i kanawa Kumilabwaga.

USITUMA LIVALELA

Tovileu

Usituma si wosi Mi-Tukwaukwa i keiwosisa. Yaegu Tovileu a lagi uula beisa. A bigaton a wala. A doki kedala wosi makawala. Uula Kaileula. Kaileula i ulaisi bwaima, la bwaima Kuwenaya - uula wosi Oguvagava. I keibigasi matosina Baloma, "Matosina M'Okaiboma gala i toki ei utusi wosi." Yakidas i ta utusi kada wosisi pilatala. Matosina, "Ka kidodina kwisi," ei utusi wosi. I ulaisi wa bwaima komwaidona Mina-Wakanawakana. Baloma i sisusa i giseisa i ulaisi, i lukweisa, "Matouna teu i sisu o pulou." I sisusa Baloma, i lukweisa i utusa mapana wosi, "Ba tona o pulou, kaigagu ku nagisa." I sekeili, "Matouna mitakwabu. I tola Bosu i kabi mitakwabu." I livalasi Baloma i keibigasi, "Ku vabusi bi mwa." I keibiasi sesiya, "Gala bi mwa. Sena tomadagi biga, kaigimala nona." I keibigasi Baloma, "Sena tosipoma, bi ma taitala tominibwaina bi sila, bi kabi mitakwabu." I keibigasi sesiya, "Sena tomadagi biga, bwaina bi lavatula, ta gigilasi ta neganegasi." Uula beisa Usituma ma uula.

I kariga inala Tobesaula yagala Bolapasa. I kariga i weiki Baloma i keiwosisi. I simwa i gisi bisila kaiwala. Kupi i gigisi i wokuva. I valapula o valu, i keibigasi Baloma (kariga i lolasi bilomasi wa Tuma i sisusa), i katupoisa Bolapasa, "Yokwa ku mebogwa?" I keibiga vivila, "Gala. Makaneki wala la ma." "Kaina bogwa ku gisikama wosi?" I keibiga vivila, "Gala. Makaneki la ma." I siwa.

I sulusa kaula i kam. Bogwa i kwayavi i keibiga, "Ku sisusa ba la." I ma i meiki latula Tobesaula, "Ku sulu kagu ba kam, kam puwaya

Usituma." I keibiga latula, "Avai wosi?" I keibiga inala, "Usituma! O ku sulu kagu bi bwaina ba kam." I sulu i menu, i keibiga inala, "Nabwaya ku giseigu ba kenu, ku sisu bogwa i kwayavi. Agu kulia kulikekita ku meya. I kwayavi ku sulu kagu. Ba yasigina ba ma ba kam." Ei yam i masisi inala bogwa i kwayavi. I kau kala kulia i vitawa i sulu kala toyamata. I tulatula bogwa i salili kalasia, i yasigina inala lei ma. Igau i wala wosi Usituma. I ulawala i ligalega latula. I youli bisila i gigisa latula bogwa i wokuva. I keibiga inala, "Ku meya kagu a kam." I kam.

Kamkwam i vanoki i keibiga inala, "E tuda kam puwaya Usituma ba meya, buku kuli um meguva, kam bulukwa buku kuleya. Igau ku mitukubwailigu, ba meya kam wosi." Lei yam i luki latula, "Ba masisi, ku gisi kalasia i salili, ku ma ku sulu kagu; a yasigina ba kam." I kariga inala, i weiki i kanukwenu. I ma i kebwani kaula. Kebwana i wokuva i tulatula inala i yasigina. Bogwa ikwayavi i meiki latula i sisu, "Bogwa kwa menu kagu?" I tokaya i simwa i youla kala bisila. Yayoula bogwa i wokuva, i luki latula, "Nabwaya ba la ba sigaga Tuma. Igau ku tulatula."

Ei yam i kariga, i weiki luleta i sisusa. I keibigasi luleta, "Ku ma ku suvi wa bwala. Bi keiwosisi makawala." I suvi we la bwala. I luki luleta, i mwa i simwa o tapwala. Luleta i sibwadi lulu. I meisa Baloma i weiyasi i lulausi kasosau. I weisa i kalaisi kasi dagula, kasi wawega bogwa i wokuva. I sikamsi dabesi i vitawa wosi Usituma. I keiwosisi Baloma. Menana vivila i kau kala bisila. I keiwosisi Baloma, i kikeiwosi vivila wa bwala. I

keiwosisi Usituma i wokuva. I weiyasi Vesali, i keiwosisi i wokuva, i katusausa. I weiyasi Ovatoi, i keiwosisi i wokuva. I weiyasi Oluwalawa, i keiwosisi i wokuva. I weiyasi Usiwawaga, i keiwosisi i wokuva. I weiyasi Okaisai, i keiwosisi i wokuva. I weiyasi Usi-Kabilia, i keiwosisi i wokuva. I weiyasi Salibu i keiwosisi i wokuva.

I katulogusasi i sunapula menana vivila. I keibigasi Baloma, "Ku mebogwa?" I keibiga Bolapasa, "Bogwa lei wokuva wosi, la maga." Kawasi, "Ka dokeisa ku mebogwa, keigi makaneki ku kwalobusi." I siweisa i sisusa. Bogwa lei bogi i ma i meiki latula. I simwa i kam kala i vanoki, i luki latula, "Bogwala a keiwosi wosi, bogwa lei wokuva. Nabwaya ku la ku kwabi kwaitala baleku. Bi vatowa ula wosi, a keiwosi buku gisi. Lei yam i tokaya latula Tobesaula, i la i kabi baleku i wokuva, i ma i luki inala, "Bogwa la kabi baleku, bita la ku kweiwosi ba gisi."

I katubayasa inala. I lolasi i wakeisa kala baku bogwa i kabi. I tolisa. I luki latula, "Ku toli, ba keiwosi buku gisi." I wala latula i keiwosi inala. I keiwosi Usituma, i keiwosi i vinau. I luvapela Vesali i keiwosi i vinau; i luvapela O-Kaisai i keiwosi i wokuva; i luvapela O-Vatoi i keiwosi i wokuva; i luvapela O-Luwalawa i keiwosi i wokuva; Salibu i keiwosi i wokuva; Usikabilia i keiwosi i wokuva; i luki latula Tobesaula, "Bogwa ku gisi wosi bogwa lei wokuva. Bita losa o valu." I meisa o valu.

I supwanasi tomota, i pwayasi kasi baku. Ei yam i keitasi sola latula, i losa mwada bi keiwosisa. I wakeisa bogwa lei pwayasi. I luvapelas i losa o kaiwota, i kabisa. I kabisa i wokuva i luki latula, "Bwaina ba wala wosi, bu kwei-

wosi." I wala inala, i keiwosi Tobesaula. I keiwosi bogwa i wokuva. I keibiga Bolapasa, "Nabwaya ku luki taitala gwadi bi meisa, ku kweiwosisi ba gisi." I masisi.

Ei yam i losa o kaiwota. Bogwa kasosau i weiyasi i keiwosisi. Bogwa komwaidona i tolasi i keiwosisi. I kwayavi i meisa o valu, i yakaulasi wosi sena piliminibwaina. I keibiga si guyau Kuwenaya, "Nabwaya ku sagusa wosi, ba wa a gisi." Lei yam i losa, i kalibubulisa i wokuva, i keiwosisi. Matouna Kuwenaya i supwana i la o la odila i toli, i gigisi wosi. I gigisi bogwa lei walasi mailasina. I waweyasi i vinausa. I keiita si guyau, i ma o valu i sisu. I keiwosisi bogwa i kwayavi. I meisa i kamsi bogwa i wokuva, i tomaula si guyau i luwawala, i keibiga, "Nabwaya ku kwalaisi kami dagula, bu kweiwosisi o valu O-Bwelaki." I kalaisi kasi dagula i simweisa, i keiwosisi. I gigisasi boge i wokuva. I mwasawasi taiyuweilasi. "Kada wosisa boge i bani inadasi, lei meya kada wosisa. I keiwosisi boge i wokuva i simweisa.

Ei wa Pulitala Kavataria guyoula, i la i gisi wosi. I gigisa boge i wokuva, i lulu bisila Tobesaula, "La lulu bisalela Usituma, ba lau Mulusaido. Nabwaya, bogiu ku weya agu wosi, ku seyewa buku maga." Ei yam i yousasi bulukwa, i sulusa kaula, i lekusa bua, i kamsi o valu. I kamsi i wokuva, lei yam i dodigasi. I meisa Mulusaido i keiwosisi Usituma. I kau vaiguwa i lagi i keiwosisi. O-Kaisai i kau vaiguwa Pulitala i lagi. I keiwosisi Vesali i kau Pulitala vaiguwa i lagi Vesali. I luvapelasi O-Luwawala, i kau vaiguwa Pulitala i lagi. I luvapelasi O-Vatoi i kau vaiguwa i lagi Pulitala. I luvapelasi Usiwawaga i keiwosisi i wokuva, i kau vaiguwa Pulitala i lagi. I luvapelasi Salibu i kau vaiguwa Pulitala i lagi. I luvapelasi Usi-Kabilia i semwa

vaiguwa Pulitala i keiwosisi i wokuva. Lei yam i mtuli bulukwa, i ligabu kaula, i leku bua, i lappaasi Kaileula. I keidodigasi o si waga, i lausa Kaileula. I tapelasi kasi, kasi bulukwa, kasi bua i seweisa. Bogwa i vinau Pulitala. Makadana Kavataria lei ma wosi.

I keiwosisi Kavataria, i tokaya guyau Kaboka, "Ta losa ta giseisa wosi i keiwosisi Kavataria." I keiwosi Tobesaula. I keibiga guyau Kaboka, "Tobesaula, sena pilikubwailigu wosi. Magigu baka yoi, ba meya agu wosi, ka meyeisa Tukwaukwa. Ei bogi i luwawala, "Kadomala, Kailagega, ku kwausa kaitala wakala, ku lausa kala vakola Tobesaula, bi ma i keiwosi agu wosi." I losa Lobuwa, i kalobusisi o kanakenuva i silasi, i wolasi, i laguvasi beisa Tobesaula. I katupoi, i keibiga Tobesaula, "Avaka ku vagisa buku meisa?" I keibiga Kailagega, "Magila Kaboka buku wa, buku kweiwosi kala wosi." I keibiga Tobesaula, "Ku silisa igau a kamsi."

Ei yam i yousi bulukwa Kaboka, i kamtulaisa Mi-Kavataria, i kodagumasi i meisa. Bogwa i meisa o talila Kavataria, i tokayasi i bokoviliisa, i keitiasi Kaileula. I keitiasi Kadomala, Kailagega i losa Kaisiga, i keiwosisi. I keiwosisi i wokuva, i meisa Kailagega kasi taiyu Kadomala i meisa o ma valusa, i lukweisa Kaboka, i keibigasi, "Bogwa ei bokovilisa Mi-Kavataria, i keitiasi Mi-Kaileula." I keibiga Kaboka, "Bwaina, ku silasa wa waga, ku losa ku vakolisa ku meyeisa." I kau kaitala beku, i seiki bwadala deli matouna. I losa i wakeisa Kaisiga, bogwa i keiwosisi. I silasa o si waga i losa o si valu.

Ei kotasi, i lupasewasi si guguwa i la o valu. Bogwa ei wewa bigala Kaboka, i keibiga Tobe-

saula, "Bwaina, bita keiita." I keimalisa i kei-dodigasi, i meyeisa bwadasi. I vataisi Kavataria, komiligaga Kaboka i meki wosi Tukwaukwa. I meki bwala bogwa i wokuva papapa. Boge i bogi i masisi. Boge i gilagela lekoleko i keiwosisi. I yousi natana bulukwa gubala kasi, i kamsi. I kalatalasi wosi. Lei yam i kaliyuweisa. I yousi nayu bulukwa i kamsi. I keibiga guyau, "Bogiu buku lapulasi."

Ei yam i losa i poulasi, i laisi kuyu. I meyeisa i kamsi Kaileula. Ei yam lapula i yousi bulukwa nayu, i kamsi i lapulasi. I vatowasi kai, i keidodigasi kaula peila Kaileula kasi. Tokwai-yelu, Tobesaula i kalimatalasi i keiwosisi. I keibiga guyau, "Nabwaya ku kweidodigasi nalima bulukwa, bi lausa."

Makadana i saiyasi Mi-Kavataria Mi-Tukwaukwa peila togigisasi Usi-Tuma.

KALIVA

Kaliva i sisu Kovila. Giyoveaka guyau Kavataria mei siki, kweveaka kala bwala, la kwava tailima i kausa la ulai - Kavataria mei siki.

I sisu i kwayavi, i kausa kala la kwava, i seilisa o kabudoga bi kam. Mwada i vavagi - puu - i piu Kaliva. I vavagi guyau matouna, Mulusaido i sisu i lagi i luki kalaga, "Ku la ku loki avai tau i pipiu taigagu, mwada ba kam." Ei piu, i semwa kaula.

I yowa kalaga. I yoyowe Kovila i toli, "Avai tau yokwa ku pipiu taigala guyau?" I keibiga Kaliva, "Ku tavina ku mwa o tubwalogu, ba sakeim biga buku yaki guyau." I lega i vina Kaliva, "Aveto E Toto O Matagu Avelo E Toto O Tubwalogu Silibukwai Namanamila. I kapwagega pwala i kapatu, i suvi kalaga i la o lopola i towa.

I kwayavi i tulatula guyau. Gala. Keibiga, "Kasai touwata kalaga, gala i meya biga a lega. I kwayavi i ya isi la kwava kala. Mwada bi kam, i vagi Kaliva, "Puu!" I piu. Guyau i luki muluveaka, "Ku yowa ku la ku gisi tau, avai tau i pipiu. Gala a kam." I la muluveaka i yoyowa Kovila, i toli, "Avai tau yokwa ku pipiu taigala guyau?" "Avai tau yokwa?" "Yaegu muluveaka." "O ku ma o tubwalogu, ba sakeim biga buku yaki guyau." I vina Kaliva, "Aveto E Toto O Tubwalogu Avelo E Toto O Matagu Silibukwai Namanamila." I kapwagega pwala Kaliva i kapatu, i suvi muluveaka, i weiki kalaga i toto. "Mwa ku toto?" "A suvi la ma a toto." "O ku toli, bita sisu."

I tulatula guyau. Gala. I kwayavi i seilisa kaula i kam. I vavagi Kaliva, "Puu!" "O i koma kala popu. Mwada sitana ba kam ei piu. Kweimalisa

kaula ku seiweisa wa bwala. Igau ba luki taitala tomota bi la i gisi." I luki bubuna. I yowa i sakauli i weiki i kanukwenu, "Avai tau yokwa ku pipiu taigala guyau. Bogwa i somata molu. Ku piu gala i kam." "Ku tavina ku ma o tubwalogu, ba sakeim biga buku yaki guyau." I vina Kaliva, "Aveto E Toto O Matagu Avelo E Toto O Tubwalogu Silibukwai Namanamila." Kapwagega pwala Kaliva i kapatu. I suvi bubuna i weiki sala i totasa, "Ta! Yokwami O ku meisa O ku totasi." I towa.

I tulatula guyau i bogi. I vakapulisa kaula la kwava, i seilisa kwayu i kam. I piu Kaliva, "Woi!" "I koma kala popu. Gala a kam. Yoku posisikwa, ku yowa ku loki. Sitana ku meya biga a lega." Ei vagi posisikwa, "Pisi! Pisi!" I yowa, i yoyowa Kovila i toli, i katupoi, "Avai tau yokwa? Gala i kam guyau? Bwaina ku piu?" "Ku tavina ku mwa o tubwalola, ba sakeim biga." I tavina. I vina Kaliva, "Aveto O Matagu Avelo O Tubwalogu E Toto Silibukwai Namanamila." Kapwagega pwala Kaliva i kapatu, posisikwa i suvi, i weiki selaya i totasi, "Ta! Komwaidomi gala ku weyesa biga i lega guyau." "Gala. Laka meisa ka totasa wala."

I ula posisikwa, i ulemwa. I ulemwa o wadola, i sunapula, "Pisi, ba lau i lega biga guyau." I yowa i yoyowa i toli Mulusaído. I katupoi guyau, "Avai tau ei piu posisikwa?" I keibiga posisikwa, "Kaliva ei piu. Ku legalega komwaidona bwadamwa. ei totasi o lopola Kaliva. Yaegu a ulemwa a sunapula o wadola. A meya biga ku lega, i kam guyau! I kamkwam boge i bogi, i luwawala, "Yokwami Mi-Bokoveva, yokwami Kuwabu, yokwami Muluveaka, yokwami Mi-Mulusaido, nabwaya ku losa ku togusa waga. Ku losa Vakuta, Silaketa wayala, ku losa Kaileula wayala, ku meyeisa, bita losa ta giseisa Kaliva, i sisu Kovila.

I losa i titogusa waga. I meyeisa kavakaveaka

waga. Ei yam i tolasi. I totolasi Kovila, i wa-keisa kanukenuva. I kausa yuwaiyola, i lausa o bwarita. I sipusa Kaliva, i didagisa wa waga. I kobilisa i meyeisa. I meyeisa o kawalawa i kotasi. I luki guyau i kausa kema, "Ku bwabusa bita giseisa o lopola." I tapalisa lopola, i butusi mauna, avai mauna avai mauna i sunapulasi, i mweimwa i mweimwa o la valu. I simweisa Kaliwa i bidumisa i kumlisa, Kavataria i komasi.

Gudisi Kavataria mabwailisa Kaliva.